

Printed by Wm. Lloyd

51-

812


388 f

2
1012

✓

Pigeons

1758





THEMIS DEA,

SEV

DE LEGE DIVINA,

STEPHANI PIGHII

CAMPENSIS.

AD AMPLISS. ANTONIVM PER-
renotum Cardinalem Granuellanum.

Jacobus Pignus

ITEM

MYTHOLOGIA EIVSDEM IN QUA-
tuor anni partes, ab auctore recognita.



ANTVERPIÆ,

Ex officina Christophori Plantini.

M. D. LXVIII.

THE MIST

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

3

STEPHANI PIGHII

CAMPENSIS THEMIS DEA;
SEV DE LEGE DIVINA:
AD ANT. PERRENOTVM
CARDINALEM.

VIDERER profectò, Illu-
strissime Domine, mo-
rem à me tantopere lau-
datum, cùm de strena-
rum vsu, origine & antiquitate scri-
berem, tacitè nunc improbare, nisi
& his anni noui Kalendis absentem
patronum strenula noua prosequi,
votis solennibus omnia prospera ac
læta precari pergerẽ. Cuius rei cau-
sa cùm his diebus schedas meas per-
lustrarem, votis optarem à Deo, vt
felicibus auspiciis annueret, measq;
inuocarem Musas, vt offerrent boni
ominis aliquod argumentum tuis
rationibus quàm maximè congruũ,

*Introductio
ad argumen-
tum per pre-
sopoziam.*

quod dignè mitti à me posset, & à te feliciter accipi; repente oblatum est manibus meis Pantheū, quod olim variis veterum deorū, dæmonūque simulachris atque elogiis instruere adornareque institueram. Cum itaq; eius templi sacraria, cellulas, adytaq; studiosè perlustrarem, & anxius inquirerem, quisnam ex illo cælestiū cœtu nostris votis fauens meo nomine tibi salutem, prosperaq; noui anni kalendas perferre vellet; veneranda Themis spem pudibundo risu faciens mox se facilem præbet, & ad amicum notumque hospitium ituram pollicetur. Gratias itaq; sancto numini immensas egi, utque placidum, benignum, ac felix te adire vellet, supplicavi; nec sine causa. multiformis enim dea est, variasque induere personas nouit. Veniet igitur, verum non incitata, armisue instru-

*Themis èc-
doïn dicta
Hesiodo.*

cta tanquam prauos impiósue casti-
 gare velit, cùm vehemens, tristis ac
 seuera sit; sed vt Orphei verbis dicā,
 ἀγλαόμορφος καὶ σεβάσμιος, quo vultu
 deorum concilium cogere solet, &
 rectæ rationis terminum præscribe-
 re, honesta, splendida, ac venerabili
 maiestate decora. Hanc, patrone, tri-
 bus comitatam filiabus pedisequis
 tua solita humanitate benigniùs ex-
 cipe; non enim ignotam mitto vel
 peregrinam, sed multo antè tibi fa-
 miliarem, amicam ac domesticam,
 atque in sanctiore pectoris tui lara-
 rio religiosissimè semper, nec imme-
 ritò cultam. Potens enim & magna
 est dea, nec nisi fausto feliciq̃ue bo-
 nos visitat. omine, in omnibus rebus
 salutifera atque officiosa, in dubiis
 viam monstrans tutam ac rectam, in
 prosperis consilia tēperans, nec nisi
 moderata suggerens, repellit impe-

*Themidis
 virtutes.*

tus superbos. in aduersis fiduciam
præbens, spem firmat, & victoriam
pollicetur certam, quamuis aliquã-
do tardam ac difficilem, eo tamen
magis securam ac gloriosam. Quis
igitur non lætus hanc aduenam ex-
cipiat? non curiosè obseruet veræ so-
lidæque felicitatis largitricē deam?
quæ animam naturamque huma-
nam perficit, virtutem ipsam docet,
hoc est, vt Lucilij poëtæ verbis dicā:

*Iamblichus
& Metopus
Pythagori-
cus Meta-
pontius.*

— *Scire id quod quæque habeat res.*

— *Scire homini rectum, vtile, quid sit ho-
nestum.*

*Quæ bona, quæ mala, quid sit inutile,
turpe, inhonestum.*

*Hostem esse atque inimicum hominum
morumque malorum.*

*Contrà defensorem hominum morum-
que bonorum.*

*Victoria æn
Tegeæ apud
Athenienses.*

Iam verò si Atheniensis ille populus
Victoriam dubiam, leuē, & incon-
stan-

stantem deam (quam idcirco Homerus *ἑτέραλκEAN, καὶ ἀμφθέουσιν νίκην* appellat) alis sollicitè spoliarunt, & implumē colere, Pausania teste, voluerunt; ne scilicet ab ipsis auolaret, quam nihilominus sæpenuerò perdiderūt;

Si Spartani Martem barbarum, homicidam, perniciosum, & sanguinarium dæmona catenis vinctum sibi retinere voluerunt, vt belli principē

Mars *βροτῶν κτλόν* & *καὶ ἀμφοτέρωθεν* *dictus* *Homero* & *Orpheo*.

Deum præsentem semper haberent, qui imperium, urbem, Spartanumq; nomen omne pessum tandem dedit: quantò magis tibi gratulandū, patrone amplissime, cuius rebus hoc salutare imprimis numen adesse cupiens, ac tanquam permanfurum

Termini personam, ne Ioui quidem cedentis, accipiens diuino atque inuisibili gressu *καὶ ἀχέροτον* vltro occurrit? Qua forma Romæ primū Themidis simulachrum vidi in Pa-

Themis terminalis.

rio marmore exculptum apud Illustrissimum virum Cardinalem Rodolfum Pium Carpentem, quod postea delineatum accuratè ad Antonium tuum Morillonum in Belgicam misi. In cuius quidem hominis nobiscum & studiis iisdem, & amicitiae verustate quondam coniunctissimi, ob eximias ipsius dotes mentionem lubenter incido. magna namque in eo vis ingenij erat, qua picturam sculpturamque difficiles alioquin artes puer sua sponte, atque *αὐτοδίδακτος* ad excellentiam usque perceperat. Magnum adolescèti optimarum disciplinarum studium, tum diuina quædam rerum & verborum memoria, quam ipsemet arte quadam (cùm omnia quæ à puero legerat sibi deinde profutura, succinctè ordinatèq; in classes seu locos quosdam cōmunes digessisset) ita firmarat,

*Antony
Morillon in
genium ac
dotes.*

rat, vt de quauis re difficili et obscura copiose & promptè eruditeque commentari ac differere posset. Orationem verò eius ornabat summa dicendi facilitas, atque grata quædam oris facūdia; qua cū de rebus philosophiæ reconditis ac abstrusis loqueretur, omnes in sui admirationē rapiebat. Denique consuetudinem familiaritatemque illius rara quædā comitas mirè dulcem atque suauem faciebat: neque hoc mirum; occur-
 rebat enim mox animus ab omni fastu atque ambitione alienus, enitebatque confestim candor in eo eximius; atque si quam amplexabatur amicitiam, in ea colenda fidum ac sincerum pectus apparebat. Cum hoc autem adolefcēti mihi primū litterario in tirocinio Louanij quædam cōtracta fuerat amicitia, quam Romæ deinde, cū bona nos quæ-

dam fortuna iunxisset ante annos ab hinc plus minus octodecim, in tantum adauxit studiorum similitudine ingeniique consensu crebrior illa consuetudo, arctiorque familiaritas, ut rari dies interuenerint biennio ferè integro, quo Romæ māsit, quibus litterariæ societatis causa non vnà essemus. Molestior itaque nobis vtrisque fuit discessus ac separatio, cum ille in Germaniam à te reuocatus, urbem nosque relinquere cogeretur. At quæ corpora tunc seiunxit fortunæ inuidia, animorum illud vinculum soluere tamen non potuit. Nam æquè validū semper permansit, immo cum suauissimæ consuetudinis peractæ memoria & desiderio fortius hoc cōstrinxit frequens litterarum vicissitudo, cum ego de communibus studiis multa sæpe mouerem, atque ipse diligenter vsque de
omni-

omnibus responderet. Quamuis igitur gratissima illa familiaritate eius ac conuersatione prima frui mihi deinde nunquam contigerit (nam illud immortalitate dignum ingenium illæ animi summæ dotes Antonij nostri præproprio fato extinctæ liberalibus studiis nobisque cū ipso sunt ereptæ, non admodum diu post meum ex Italia in Belgicam reditum, anno ab hinc ferè decimo) memoria tamē tanti amici mihi perennis erit, quamdiu virtutem litterasque sum amaturus. Quæ quidem faciunt, vt lubenter admodum veteres eius de studiis nostris sermones animo repetam, quia hac ratione mihi videor molestias ex eius desiderio conceptas, vsque animo inhærentes, non nihil alleuare. In præsentiarum igitur de Themide dea facturus verba, ipsum in partē sermonis

nis vocabo, atque aliàs sæpenumero de rebus difficilibus differentē oblata occasione inducam, vt amico gratiam, etſi illius ingenio meritſque nequaquam parē, at pro noſtra beneuolentia ſinceram, certē debitam referamus. Sed antequam ipſum loquentem producam in medium, à te patrone optime, cui dotes Antonij tui probè cognitæ ſunt, impetratam veniam cupio, ſi minus acumini eloquentiæque illius hæc mea reſponderint, & ſi qua ἀπεροσωπολήτως à me effuſa ſenſeris: ab aliis verò quibus ingenium illius minimè perſpectum fuit, & hæc forſan in manus ſument, omnino poſtulamus, quod M. Cicerō L. Craſſi oratoris ſuo ſæculo præſtatiſſimi perſonā ſcriptis inducturus petiit: Vt ſcilicet maius quiddam ſemper de Antonio Morillone ſuſpicetur opineturue, quàm quantu

*Epilogus
cum obſtatione.*

*De oratore
lib. III.*

tum à nobis hic alibiue dicetur vel
 exprimetur. Verùm de his nunc satis
 multa. Quare ipsius iam verba de *Transgressio*
 Themide tua referemus, cùm prius *ad argumen-*
tum.
 dixero, quàm bella & tēpestiua oc-
 casio nos ad disputationē hanc per-
 duxerit.

CVM ANTE ANNOS ALIQVOT *Occasio dia-*
 Romæ kalendis Ianuariis Pontificiū *logi.*
 in Vaticano sacrum, ad quod omnis
 Cardinalium Episcoporumque cœ-
 tus ac ferè totius Christiani orbis
 Principum legati conuenerant, ac-
 cessissim: solēnes illas (quæ tunc bo-
 ni ominis causa fieri solent) saluta-
 tiones attentius cōsiderans, vt quas-
 dam gratas, sinceras, & iucundas;
 sic plurimas rursus ineptas, fuca-
 tas, & frigidas esse vidi. Et quò ma-
 gis ambitiosè sollicitéque obirentur,
 eò

eo molestiores importunioresq; accidere, non sine risu animaduerti. Apparuit proximus mihi subito à dextris meus Morillonus, quem eo die non videram, atque tum opportunè cum clarissimo viro Didaco Hurtado de Mendoza, Cæsareo legato aduenerat. Nec mora, quin salutem felicibus verbis inuicem, ut mos est amicorum, precati, è turba discederemus. INTERIM quàm primùm ille, Quid ridebas, inquit, Pighi, cùm te accederem? MOLESTATA, inquam, atq; importuna ambitioforum istorum studia, quæ cùm infeliciter pluribus euenire viderè, te conspecto, omnino probare illud Plautinum incœpi:

Nihil homini amico est oportuno amicus,
quemadmodum tu mihi. TUM ille suo more renidens, An ne te pudet Democrite hîc curis hominum illudere?

dere? Eia, inquam, nunc Bithus contra Bacchiū: alto tu quidē risisses carchynno si prius adfuisses, qui iisdē, ut aiunt, cæpis lubenter vesci soles. Sciscitantibus deinde nobis, si quid fortè noui è Germania haberetur in ædibus legati Mendozae, in cuius tunc erat ipse familia atque ædibus hospitio exceptus. RESPONDIT, nihil aliud ferre postremas litteras, quàm ab exercitu Cæsareo Magdeburgum arcta admodum obsidione cingi, deditionisq; conditiones eam urbem offerre. SED omitte, quæso, ista, inquit, quæ nec ipse percunctari, nec audire magnopere curo: quæro à te potius, ecquid hisce noui anni kalendis antiqui nobis adfers, nuper in lucem eruti, quod magis intelligere lubet, quàm quid per terrarum orbem moliantur principes. TV M ego: Et ista à te rogare volebā, quem

quem scio omnigenæ antiquitatis monumentis me multò instructiorem esse, & inter præcipuos versari quotidie, quorum cura hæc indagentur. Attamen, ne nihil adferre videar, intellexi hodie ab Antonio Augustino, quem hisce solennibus & feriatis diebus officij causa accedere nonnunquam soleo, Rodolfum Pium Cardinalem Carpensensem nuper dono, à nescio quibus amicis, accepisse pulcherrimum muliebris formæ Terminū marmoreum, quæ Veneris esse nonnulli coniiciunt, propter tres imagunculas, quæ deam confertis manibus circundant, quas Gratias autumant. Sed dubitat Augustinus admodum, quòd non nudas, sed stolas videri dicant, atque alio quàm Gratia solent, ordine dispositas. AD hæc ita mox ille. De Venere Terminali quicquam me lege-

*Antonius
Augustinus*

*Rodolfus
Pius Car-
pensis Car-
dinalis.*

legere profectò non memini ; cupe-
 rem itaque videre simulachrum il-
 lud, atque eam maximè ob causam
 cras ibo salutatum Cardinalem , cū
 quo mihi propter hæc studia , qui-
 bus admodum ille delectatur, fami-
 liaritas satis magna est. I D E M &
 Augustinus animo statuit, inquam:
 Sed cum cum Cardinale vidi collo-
 quentem, cum simul ædem intrarēt
 sacram. Vnde coniecturam capio,
 quòd cēremoniis in templo finitis,
 ipse Cardinalem, cum officij, tum vi-
 dendæ huius statuæ gratia , sit do-
 mum deducturus. Quin igitur huic
 obuiam imus occasioni? & ad ædes
 Cardinalis præcedentes, redeuntem
 exspectamus? Non deerit spero salu-
 tandi , atque simul signum hoc vi-
 dendi oportunitas , maximè si Au-
 gustinus adfuerit. R E C T E sua-
 des, mi Pighi, respondit Antonius,
 B atque

atque omnino eundem censeo. Cardinalem namque spero qua est humanitate, quamprimùm nos viderit, vltro de hac re verba facturum. Lubenter enim monstrat studiosis omnia quæ habet (habet autem plurima atque insignia antiquitatis monumenta) mutuoque dat etiam alacriter. Quin etiam sæpenumero sua sponte me solet inuitare, quando quid non antea visum nactus est. FINITO igitur sacrificio confestim è Vaticano descendentes per pontem Aelium recta in Campum Martium ad ædes Cardinalis properamus, ibidemque in propylæo deambulamus, donec ex strepitu eorum aduenire Cardinalem intelligimus. Obuiam igitur procedentes ipsum Antonio, vt diuinaram, Augustino comitatum reuerenter, vt decebat, felicem anni noui

cur-

cursum optantes salutamus. Et ille, Oportunè, inquit, ades Moriloni cum tuo Pighio. iam enim concilio, te non ob aliam quàm Augustinum causam aduenisse, nempe ut Terminum videres meum, qui mihi super est dono datus. Rarò alioquin qui copiam nobis faceres, nisi quid simile te eliceret, Augustinum verò negotia aliquando impellunt, ut veniat, aliquando etiam idem ille studiorum amor, qui te tenet, nostri memorem facit. Sed nihil nunc ostendam ante prandium; iam dudum enim nos expectant Oeconomus & fructor, eduliaque moram non patientiorem clamitant. Atqui non immeritò gemmis Indicis chariores estimare possum, qualescunque cōtuo & colligo antiquitatis reliquias, quarum ob causam ipse aliquo sum in precio, atque ambior à

*Rodolphi Car-
dinalis lau-
des.*

vobis aliisque eruditis: & meæ insu-
per ædes hortusque in Esquilino à
studiosis artium ingenuarum ple-
runque frequentantur. Tvm Au-
gustinus. Non ob hæc tantum, Ro-
dolphe Cardinalis illustrissime, re co-
lendum observandumque iudica-
mus, sed imprimis ob heroicas illas
animi virtutes, quibus amplissimum
hoc ordinis tui fastigium adornas, &
ob dignam homine nobili rarâque
tuam doctrinam, vt alias omittam
dotes inæstimabiles, quas hîc mo-
destia tua recenseri non pateretur.
Ob hoc verò quòd omnigenæ anti-
quitatis reliquias historia varia ple-
nas diligenti cura, & magno impen-
dio rei litterariæ & artium bonarum
in gratiam è tenebris extractas col-
ligis, restauras, & cōseruas, doctisque
hominibus benignè communicas,
immortales profectò deberi tibi
gra-

gratias ab omnibus, qui ingenuis studiis fauent & delectantur, nemo non fatebitur, cui sensus virtutum inest aliquis. HÆC ferè dum in atrium itur, vbi cùm se Cardinalis toga illa sui ordinis purpurea exuisset, Augustinum manu prehensum ducens, nos sequi iubet in cœnationem proximam, in qua repperit & alios conuiuas expectantes, mensamque instructam. Itaque confestim lotis manibus, conuiuioque sacris verbis benedicto, Augustinum applicans lateri suo, cōsedit, nosque simul accumbere iussit. Sed, vt ad rem nostram veniamus; finito deinde hilariter prandio, dimissisque ceteris cōuiuis, in interius cubiculum à Cardinale ducimur, qui accersito Martino suo elegantis ingenij iuuenē, prouinciali nostro (qui tum erat ex Atrienſibus illius) mandat, vti si-

*Simulachri
Themidis de-
scriptio.*

gnū ex Musæo depromat. Adfertur, atque in tabula statuitur, vt commodè conspici posset. Accedimus, diligentiusque contemplamur. Erat autem Terminus sesquipedali ferè altitudine ex Pario marmore artifice manu sculptus. Eius caput muliebri decora atque honesta facie, crinibus à fronte & occipitio vitta in nodum collectis, ita tamen vt duo longiores cincinni aptè per humeros defluerent. Reliquum corpus iusta proportionem quadratum, æquilateram, vt Termini solent, columnam paribus angulis efficit: quam tres semiplanæ imagunculæ puellares eiusdè habitus, & staturæ in imo coronāt, ita vt prima dextrū latus tegat, altera medium frontispiciū, tertia sinistrum. Et hæc quidem tali erāt forma, quali totum opus hîc delineatum posui.

Quod

OMIS • CARMENTA



DICE

B

4

Quod dum diligenter omnes consideramus , Cardinalis , dispositis ante focum sellis, considerare nos cū iussisset, ita est exorsus. VEHEMENTER Antonij, qui nunc duo adestis, aueo vtriusque vestrū de signo hoc opiniones intelligere, quod iam multis antiquitatū peritis , ingeniosisque hominibus ostendi. Quorum nonnullis Venus cum Gratiis tribus esse videtur; rationes tamē quas hactenus attulerunt, mihi quidem nōdum satisfaciunt. Nam quòd indicari volunt, cupiditatem termino finibusque suis coercendam esse , ad Ethicam magis quàm ad Theologiam illam veterem spectat , atque interim de Gratiis nihil digni adducunt. Tu quæso, mi Augustine, dicas primū, qui his doctis antiquorum symbolis argumentisque mirificè delectari soles : An tibi hæc Venus,

an

an quicquam de eius Termino apud
 veteres, quos plurimos te diligenter
 peruoluisse scio, legeris. T v m ille;
 Nihil quidem expressè me legere
 memini, vt neque de Gratiarum hoc
 habitu atque positura: plurima ta-
 men in similibus antiquorum reli-
 quiis reperiri non diffiteor, de qui-
 bus maiorum scripta, quæ ad nostra
 peruenerunt tempora, memoriæ ni-
 hil prodiderunt: vel quia hæc ad-
 modum tunc vulgata, atque omni-
 bus nota fuerunt; vel quia etiam nō
 pauca ad veteris Theologiæ ipsius
 normam communem in tanta reli-
 gionis libertate minimè facta appa-
 rent: Sed pro cuiusque opinione at-
 que intellectu efficta vel variata,
 quæ vix ipse magnus Apollo nunc
 nobis declararet, vixque Oedipus
 solueret. Hic tamē Terminus, cuius-
 cunque sit ille numinis, ab ipso flo-

*Cur tā mul-
 ta in anti-
 quis symbo-
 lis obscura
 sint.*

*Termini præ-
 sentis simu-
 lachrum qua-
 le sit.*

rentis æui sæculo reliquus, magni auctoris instar nobis esse poterit, quamuis talem non descripserit in Imaginibus suis Philostratus Lemnius, nec Pausanias, Plinius, aliiue, qui de veterum statuis scripserunt, eius mentionem fortè fecerint. Non enim sine Theologica ratione compositū puto, cū sine parergis, simplex, apertus, atque ad eam rem dūtaxat demonstrādam effectus videatur, cuius causa factus est. Attamen hoc tempore mihi difficile foret ipsum declarare, eiusque significata expromere, qui similem nunquam viderim. Onerosum insuper hoc iudicandi munus, cui iam annis aliquot, vt scitis, astringor, litesque illæ forenses, quæ vix me respirare sinunt, felices has Musas animum excolentes à me prorsus auerterunt? quas tamen obseruare & colere diligen-

*Antonius
Augustinus
x. vir litium
iudicand.*

ligentissimè soleo. At illæ, pro
dolor, me tanquam profanum vel
proscriptum fugiunt: adeo ut nisi
rarissimè & quidem procul has vi-
dere mihi contingat, etsi non mi-
nus quàm antea earundem amore
tenear. Morillonus itaque hic no-
ster erit appellandus, si quid de his
intelligere velimus, qui penè solus
nunc eas hic possidet, apud quem
esse volunt, quem exornant, eue-
huntque non immeritò cùm stu-
diosissimè ab eo colantur: ut qui ea-
rū amore percitus ab extremis Gal-
liarum finibus huc se contulerit.

Age mi Morillone, hanc rem nobis
expedias; tu enim facilè poteris ex
Camœnarum tibi fauentium respō-
so, simulachri huius mysteria aperi-
re: Nam forsan ex earum & hæ sunt
consortio, quas Terminò adiunctas
videmus. Musas enim, ut nouisti,
pri-

*Muse pri-
mum tres.*

primas vetustissimorum plerique
tres tantum fuisse putarunt; atque
hoc Ephorū in primis scribere, Eu-
meliumq; poetam Corinthium, te-
stantur commentator Hesiodi Ioan-
nes Tzetzes, & Arnobius in Apolo-
gia cōtra Gētes. EXCEPIT mox
orationem Augustini Cardinalis,
Morillonumq; insuper adhortari
cœpit, vt quæ de hoc signo sentiret,
*Morillon
modestia.* ipse in mediū proferret. AT ille se
primū vehemēter excusare, testa-
riq; nihil prorsus auditorio tanto
dignum, ad quod ipse cum magno
discendi desiderio venisset, adferre
se posse: Alij instare vehementer,
perurgereq; donec tandem Car-
dinalis auctoritate compulsus:
ADMODOVM, inquit, me conturbat
exspectatio vestra tā certa, tā firma,
quæ vereor, ne vos ipsos primū
fallat. Nam boui, vt aiunt, clitellas,
quæ

quæ quia gerendæ sunt, minùs sanè laboro, quàm rectè cōueniant, quæque ea, quæ vestro iussus imperio malè instructus adfero, valde probentur. Dicam enim ea tantùm quæ temerè occurrent: nec ea, in quibus à vobis aliisq̃ue me doctioribus non malim vinci quàm vincere. HÆC præfatus, signum ipsum manibus eleuatum aliquantò diligentius inuetur, atque ita differere incipit.

THEMIDIS illius primæque omni-
no atque antiquissimæ, mihi esse
hoc simulachrū videtur, quam Cæ-
li Tellurisq̃; filiam, Iouisq̃ue secun-
dam coniugem fuisse, Græci fabu-
lantur: deprehensam enim cū Iouis
nuptias fugeret, apud Ichnas Mace-
doniæ, ductamque eidem Ioui pri-
mum peperisse tres filias, quarum
nomina sunt, Eunomia, Dice, &
Irene. T V M Cardinalis. Rectè tu
quidem

*Themidis fa-
bula.*

Ichnæ.

*Themidis
tres filie ex
Ione.*

30 THEMIS DE A,

quidem hæc, quemadmodum me-
mini Hesiodum in Theogonia scri-
bere, post primam vxorem Metin
à Ioue secundam Themida ductam
esse.

Themis se-
cunda Iouis
uxor.

Δεύτερον (inquit) ἡγάγετο λιπαρὴν θέμιν,
ἣ τέκεν ὥρας

Εὐνομίῳ τε, δίκην τε, καὶ εἰρήνῳ τε δαλῆαν.

Quæ sic Latinè sonant :

*Sedula quæ ducta est Themis altera
protulit horas,*

*Eunomiamque, Dicenque, Irenen atque
virentem.*

Ad hæc Morillonus. Multò e-
tiam ante Hesiodum hæc vetustif-
simum poëtam Orphea scripsisse
constat, qui Horas item Themidis
Iouisq; regis filias esse cecinit. Nam
is auctor ætatibus aliquot (vt quidā
volunt) ante bellum Troianum vi-
xit: immò vt Eusebius in Chronico

Orpheus
aliquis
poeta
o tempore
vixit.

&

& Suidas tradunt, non vsque adeo diu post Mosen, iudicium Hebræorum tempore : vir sapientia quadam diuina, quisquis ille fuit, sublimique supra humanū ingenio præstantissimus, cuius hymnos quosdā de diis adhuc habemus superstites arcanis mysteriis refertissimos. Apud Suidam verò vos legisse puto, quæ de summo Deo mundi fabricatore, ac lumine supremo omnia complectente atque illustrante, tum de humani generis conditione sentit Mosaicæ Theologiæ haud incongruētia. Quinimmò Iustinus philosophus & martyr in Ægyptum Orphea religionis ac sapientiæ adipiscendæ causa profectum memorat in Parænetico ad Græcos, atque ibidem ab Hebræis vnius veri dei pietatem & cultum didicisse, atque tum recantasse, quæ πολυθεότητα prius

*Orphea Hebraicam sci-
uisse Theolo-
giam.*

*Moses Mu-
seus à Græcis
quibusdam
appellatus.*

prius cecinisset : eiusque de hac re quosdam versus in medium ad Musæum filium (quem Mosen Græcorum tamen quidam fuisse existimât) scriptos veræ religionis lucem quandam præferentes : quos eosdem & Cyrillus Alexandrinus contra Iulianum Cæsarem, & Aristobulus Iudæus in eo quem ad Ptolemæum scripsit, commemorât. Ex Hebraicæ igitur Theologiæ limpidissimo fonte videtur Orpheus pleraque sua hausisse, variisque fabulis inuoluta promulgasse posteris : quæ etiamnum velut puræ quædam guttulæ, riuuli-que clariores, in turbulentissimo illo prophanæ Theologiæ fluente intercurrentes nonnunquam appa-

*Vnde religio-
num tanta
diuersitas a-
pud veteres.*

rent diligenter aduertentibus. Nam Orphica illa Theologia, variis multarum regionû populis infusa, sensum propagata est, in qua tamen pro
tempo-

temporum locorumque mutatione
ac legislatorum libero iudicio, qui res-
publicas nunquam sine religionis
aliquo fundamēto instituerunt, plu-
rima frequenter sunt variata, immo
contaminata. Horum enim consue-
tudo fuit, auctoritatem novorum
institutorum accepto ac noto alicui
numini attribuere: veterem verò re-
ligionem pro temporum statu im-
mutare, atque non tam pietati anti-
quæ, quam vsui reipublicæ accom-
modare. Hinc illa sacrorum rituum fa-
bularumque diuersitas, quam mirum
in modum adauxit poëtica illa liber-
tas, qua impunè licebat mortalibus
ingenijs non solum inepta, ridicula
& absurda, verum etiam turpia, in-
digna atque impia de dijs confinge-
re. Adeo ut ab Orphica illa prima
puritate plurimum degenerarit Græ-
corum Theologia, ut quæ prorsus non

*Legislatores
mos vetustus
in instituenda
republica.*

C. sibi

*Quinam au-
tiores Or-
phica sequan-
tur.*

sibi similis stolidæ opinionum collu-
vie contaminata appareat. Hesiodus
tamen, atq; Homerus alijq; poëtarū
vetustissimi Orphica imprimis ob-
seruarunt, quemadmodum non solū
demonstrant eadem deorum nomi-
na & genealogiæ: sed etiam pluri-
mæ de rerum principijs fabulæ, si
non verbis omnino, at significatio-
ne Orphei hymnis cōuenientes. Ab
Orpheo igitur venire videntur, quæ
Hesiodus, Pindarus, Lycophrō, Dio-
dorus Siculus, Pausanias, Apollo-
dorus Atheniensis in bibliotheca,
Hyginus in fabulis, alijq; posteriores
de Themide & Horis memorię pro-
diderunt. Quorum auctorum dicta
non huc congeram; vobis enim nota
esse existimo, & mihi ad commemo-
randū nunc minimè necessaria: quā-
doquidem pro disputationis cursu
probandi causa suis locis sparsim ea
adducere

adducere, & inter se conciliare fortasse cogemur. APPROBO tuum (inquit Augustinus) consilium; Terminum ipsum igitur aggredere: imprimis autem exspectamus, cur hac forma Themidem nobis exprimere, quidq; per eam significare voluerit antiquitas. Scio mi Morillone pro tuo singulari ingenio atque eruditione, eximiaq; memoria disputationem te doctam non solū; sed & variam, iucundam, pulchramq; nobis introducturum esse. T V M ille. Equidem scio me rem arduam difficilemque aggredi, quæ iuris diuini humaniq; fundamenta; immò ipsius naturæ, omnisque philosophiæ principia in se complectitur. Cum philosophiam hic dico; non ex Solonis, atque Hypipiæ sophistæ sententia polymathiam, vel omnium artium cupiditatē peritiāve intelligo: sed eā dico,

*Philosophia
quid.*

*Eius duo of-
ficia.*

cuius duo esse officia, nos Plato in Amatoribus docet, nosse scilicet diuina, & gubernare humana: Magnum & minimè opus humanum vtrunque, ne dum nostris par humeris onus, quod à me vel ferri, vel exponi in medium rectè possit. Quapropter admodum te rogatum cupio, mi Augustine, vti mecum prouideas, ne in tam vberis materiæ amplissimo campo latius euagemur, noscè perdamus: immo Terminum termino etiam angustiore concludamus. Admonet enim id deæ signum, vltra quàm fas est, diuinitatis conditionem inquirere non permissum esse demonstrans. AGE, inquit Cardinalis, magna ex parte aperire cœpisti, quid Terminus hic noster velit: docet enim, vt videtur, certos fines à Deo omnipotenti propositos esse, quos etiam numinum inferiorum

*Cur termini
forma The-
mis, prima
ratio.*

rum potentijs egredi non datum est: tantò magis nos tale quid vt conemur ingenij nostri confidentia, sacrosque terminos vt trāsgrediamur, omnino nefas, temerarium, atque impium fore. Neque hoc fugit sagacem illam antiquitatem, quæ nobis complurium deorum Terminos idcirco prodidit, varijsque fabellis vulgus à diuinitatis curiosa nimis inquisitione detertere voluit. Eò enim spectant, quæ de Gyantum, Promethei, Ixionis, Tantalique apud inferos pœnis legimus. Sed ne à Termino nostro & ipse discedam, iam mente repeto, quæ olim de Themide me apud Sex. Pompeium legere memini: deam scilicet hanc esse, quæ præcipiat hominibus id petere, quod fas est: eamque id esse existimari, quod & fas est. Hæc quidem Pompeij verba non absurda,

*Themida fas
ac licitum in
se complexi*

38 THEMIS DEA,
videntur. Quid enim aliud apud
Græcos *Θέμις* quàm fas , honestum,
ac licitum significat? Atque ideo in-
stitutum antiquitus , vt ad Themidis
simulachrum concionaturi se-
derent; quo dea hæc moneret, ho-
nesta, iusta, & æqua esse debere, quæ
dicere ac suadere quis publicè vel-
let: Hinc Agoræam appellauit Ho-
merus, & eius commentator Eusta-
tius, Themis & Iustitiam deam ean-
dem esse putauit: alij verò Themis
dicunt deorum esse: Iustitiam quam
Δίκη appellât, hominum. de qua re
plura Phauorinus disputat: Nam
Dike iudicat homines; Themis ve-
rò Iustitia est, qua dii iudicant, quæ
& ipsa hominum fora soluit. Itaque
Plato de rep. libro secundo, multis
asserens, Deum causam esse boni,
non mali, inuehitur in poëticas il-
las Homeri aliorumque fabulas,
quibus

Cur ad The-
midis simu-
lachrum con-
cionaturi se-
derent.

Quid discre-
pet Themis
& Iustitia.

Deum boni
causam esse,
non mali.

quibus stultè Iouem ex duobus sortium dolijs bonorum atque malorum velut promum conduinque faciunt, reprehensioneque dignum iudicat, si quis deorum controuersias, dissensiones & iudicia per Themis atque Iouem concitari, nō terminari dicat. T v m Morillonus. Bene quidem hæc, & eandem ob causam dicitur Themis deorum cogere concilium, quòd in hoc nisi bona & iusta tractentur, numinūque inferiorum potestates huic deæ etiam subsint. Et pulchrè Plato idem De legibus x 1. Themis inter iurisiurandi deos idcirco tertiam nominat post Iouem & Apollinem : timore diuino, veritate ipsa, ac æquitate summa sanciri debere iuramenta docens. In Ioue enim summi numinis potestatem falsi ac periurij vindicem, in Apolline veritatis lumen

Arguitur à Platone fabula Homerica de duobus sortium dolijs.

Themis deorum concilium cogere cur dicatur.

40 THEMIS DE A,

sua se sponte prodens, in Themide
ius fas atque licitum esse intelligit.

*Themida le-
gem diuinā
esse*

Est autem Themis, vt breuiter di-
cam, ipsa lex æterna atque vniuer-
salis, quam velut edictum perpe-
tuum Deus mundo ac rerum naturę
præscripsit. Hanc legem Cicero de
rep. libro tertio definire volens, ra-
tionem rectam naturæ congruen-
tem appellauit, Chrysippus vim di-
uinam in ratione positam, Zeno
Stoicus vim quandam diuinam ef-
se censuit, recta imperantem pro-
hibentemque contraria; atque ali-
bi rationem quandam vocat ad om-
nium naturam rerum pertinentem,
per astra atque elementa corporaq;
omnia se motu quodam certo & or-
dinato diffundentem. Non igitur
mali causa Themis, quatenus lex di-
uina est. Atqui non nocebit altius
diligentiusq; Deæ naturam condi-
tionem-

*Veterum de-
finitiones le-
gis diuinę
seu naturalis*

tionemque scrutari. Ipsa enim licet
 'Termini forma hic sit conclusa, ex
 sese tamen hoc habet, vt labore ac
 studio perquiri inuestigarique velit.
 Nec enim ipse Iupiter, quem animæ
 mundi mentem esse intelligit Plato,
 eam aliter assequi potuit: Nam vt
 habent fabulæ, fugientem Themida
 latentemque persequendo de-
 prehendit in locis, quibus pedum
 eius impressa erāt vestigia, vnde ipsa
 Ichnæa, & locus κατ' ἰχνας, id est, se-
 cundum vestigia, est appellatus, op-
 pidumque loco vicinum Ichnæ di-
 ctum, velut Stephanus Grammati-
 cus de vrbibus scribens ex Phileta &
 Herodoto memoriæ prodidit. Stra-
 bo item Geographiæ libro nono in
 Phthiotica Thessaliæ plaga Phyllon
 esse dicit, ibidemque Phyllæi Apolli-
 nis fanum & oraculum, atq; Ichnas,
 quo in loco (inquit) & Ichnæa The-

*Iupiter mens
 animæ mun-
 di Platoni-
 cis.*

*Fabula de
 Ioue & The-
 mide expli-
 catur*

*Cur Ichnæa
 Themis di-
 cta*

mis colitur. Quidnam igitur hæc aliud significant? quàm studio vestigationeque, nobis opus esse diligentibus, ut ad rectæ veræque, rationis cognitionem perueniamus? quæ non prima statim frõte imbecillo nostro ingenio occurrit. Idcirco & Themida Hesichius *ἰχνέμεν* vult dici, ab *ἰχναόμαι* quod est *ἰχνοσκοπεῖν*, vel per vestigia scrutari. At Lycophron in Cassandra Ichnæam, ut alij, nominant, & Solis filiã esse dicit, cuius verba sunt hæc de Proteo iustissimo iudice:

Κεῖνός σε γουνεὺς ὥσπερ ἐργάτης δίκης,
Τῆς δ' ἡλίου θυγατρὸς ἰχναίας βραβεὺς
Ἐπεσβολίσας λυγρὰ νοσφιεῖ γάμων.

Q u o loco commentator Ioannes Tzetzes Ichnæam vocari dicit, ab insequendo per vestigia & pedes Gygantum. Ioui enim bello Gyganteo viam ad hostes monstrasse Themis fingitur, eò quòd obscura & latitans

Themis
ἰχνέμεν

Vestigia Gy-
gantum de-
text Ioui
Themis.

titans per eam iniquitas recta ratione detegatur. Alij nutrice Iouis cum Amalthea nymp̃ha Them̃in faciũt, vt ex Orpheo Hyginus, quòd animę mundi mentem ipsam rectę rationis lege subsistere ac vegetari Deus voluerit. Rationes insuper adfert Tzetzes non ineptas cũm Solis filiã Them̃in esse dicat Lycophron: quòd videlicet Sol ipse nō solũ omnia videat, audiatq̃ue; verũ etiam obseruet, visitet, vegetet ac recenscat, obscura & occulta aperiat: quodq̃ue ipsa Them̃is in morem Solis splendeat, seq̃; possidentes animos, quẽadmodum Sol inferiora corpora, illustret. Mox Cardinalis, pulcherrimum fanẽ hunc locum nō meminime vidisse. Adfer librum Martine, vt eum nobis pręlegas. Allato libro Morillonus locum indicauit, quem Martinus ita legit: ἡ Θέμις ἡλίου θυγά-

Nutrix Iouis Themis.

Cur Solis filia Themis.

τηρ,

τηρ, δίοτι κ' αὐτὸς πάντα εἶφορᾷ, κ' πάντων
ἐπακούει. οὐκ ἰχνία; διὰ τὸ κατ' ἰχνας, κ' κατὰ
πόδας τῶν γιγάντων ἐπεδαι, καὶ λάμπειν δι-
κην ἡλίου, ἢ διὰ τὸ λαμπρύνειν τοὺς αὐτὴν κεκ-
τημένους, δίοτι εἰς γῆν ἀνεδόθησεν.

*Quid per so-
lem intelli-
gant Plato-
nici.*

T V M rursus Morillonus : Non
lucidum illud corpus cæleste diem
nobis promens & condens ; quod
ferrum candens Anaxagoras , glebā
auream Euripides appellarunt, com-
mentator intelligit : sed secundum
Platonem, illud Ens, Bonumque in-
comprehensibile Deum supremum
mundi conditorem rectoremque.

Brachmanni

Quemadmodum & Brachmanno-
rum philosophia Deum solem ac lu-
men esse dicebat rationis , quo oc-
cultas mysteria sapientibus videtur,
ut ait Origenes . Quin & antiquos
nostrę religionis interpretes frequē-
tissimè Deum soli comparare con-
stat. Nam Vnum, Bonum, ac lumen
animi

*Solem Deo
cur comparēt
Christiani.*

animi Deus est, sicut & Sol vnus, à
 solitudine scilicet dictus, & lumen
 corpora omnia illustrans, & bonus,
 vt cognoscitur ex effectibus, experi-
 mento quotidiano, cum omnia ca-
 lore suo producat in vitam, nutriat
 & conseruet. Quare nullum sole ma-
 gis congruū Dei ipsius hieroglyphi-
 cum inter mundana corpora reperi-
 tur, de quo multa diligētissimè Dio-
 nysius Areopagita, & alij plures dis-
 serunt, quæ breuitatis causa præter-
 eo. Quinimmo & sæpè sacræ literæ
 Christum seruatorem nostrum Dei
 summi filium, qui vnus idem cum
 patre est, cum imaginantur, Solem
 nominant fulgentem in terris, hoc
 est, in nobis, quos visitat oriens ex
 alto, & illuminās in tenebris, atque
 in vmbra mortis sedētes, dirigensq;
 pedes nostros in viā pacis. Sic etiam
 Eucherius interpretatur, quæ repro-
 bos

*Christus sol
 fulgens in
 terris.*

*Sol iustitiæ.**Christiana
Themis lex
Christi.*

bos dicturos legimus apud Salomone-
nem; ergo sol iustitiæ non luxit no-
bis. Huius verò sacrosanctâ legem,
qua nobis vt Deum supra omnia co-
lamus, diligamusque, proximûque
etiam inimicum non minùs, quàm
nosmetipsos præscribitur; quid ve-
tat, quæso, nostram dicere Themis-
da? veræ pietatis ac iustitię basem ab
ipso positam velut Terminum vel
scopum, in quem cogitationes &
actus nostros dirigamus, demon-
strantem nobis illud animæ saluti-
ferum bonum, Dei quippe similitu-
dinem, vt appellat Plato, quod Deo
summo bono nos vicinos collocat.
Ab hoc enim illud promanat, quæ-
admodum lumen quoddam ab ipso
luminis primi fonte defluens. An ne
igitur hæc Themis nostra Christi ve-
ri Solis filia patrem suû referre, seque
possidentes illustrare videri poterit?
quan-

quando hanc ipse nobis velut sui splendoris imaginē offerat, ad quam in mēte nostra ab ipso acceptam luminis scintillam foueamus excitemusq; . In eum quippe finem nobis hanc legem præscriptam, hunc Terminum scopúmve ab illo positum nemo negabit, ex ijs quibus clarum illud vel à longinquo videre datum fuerit. Quod non omnibus datum, vt Homerus etiam affirmat:

οὐ γὰρ πᾶσι πάντας θεοὶ φαίνονται ἐν ἔργῃς.

N O N enim cuius, inquit, manifesta numina diuûm, sed ijs duntaxat quibus ipse Sol pater radiis suis interpositis hanc Themida suam ostendere voluerit. magnum profectò bonum, sed ad æternæ felicitatis fastigium assequendû (animæ summum illud bonum dico) nec dum pollens potensq; fatis : nisi ipse Sol noster Christus nobis per tot tenebricosos

Christi meritum ac diuinam gratiam nos beare

bricosos tramites tendentibus suæ
 diuinæ gratiæ lucidissimam facem
 assiduè præferat, viam ineffabili mi-
 sericordia sua non solum monstret;
 sed etiã cruce passionis suę per abru-
 pta imperuiaq; imbecillitati nostræ
 loca pontem præstruat, per quẽ im-
 mensę bonitatis suæ salutifera manu
 nos perducatur. Hęc autem de nostra,
 id est, Christiana Themide apud vos
 iam satis. Redeo igitur ad poëtarum
 philosophicam, cuius signũ præ ma-
 nibus est: quamq; Solis filiam Lyco-
 phron asserit esse, re ipsa nihil dissen-
 tiens ab Orpheo, qui ex Cælo &
 Tellure progeneratam fingit, Deum ac
 naturæ vim secretam intelligens, cui
 à Deo hanc legem impositam con-
 stat, atque per eam rebus creatis om-
 nibus inductã. Nam Platonici quo-
 que summum Deum appellant Cæ-
 lum: quia sicut istud sublime corpus
 omnia

*Themis Celi
 ac Telluris
 filia secun-
 dũ Orphea.*

*Cur Platoni
 ei Celo Deũ
 summum cõ-
 parent.*

omnia corpora regit & continet: sic Deus omnes spiritus excedit, & gubernat. Nec dissentiunt Hesiodus, Apollodorus & alij, qui Vranū deū primum apud vetustissimos homines Atlantides iustitia & pietate celeberrimos regnasse, & Deorum genus omne procreasse fabulantur, velut longa historia declarat Diodorus Siculus libro IIII. bibliothecēs rerū antiquarum. Rem eandem aperte nobis & pulchrè exponit Plato, vbi de regno disputat, olim quippe aureo illo Saturni sæculo regem vnum humani generis, quem Homericomore pastorem nominat, fuisse Deū: Atque ab hoc primo monarcha rerum omnium administrationem, secundum vnā quandam generalē regulam institutam esse. fieri enim aliter non posse, vt tam vasta rerum varietas, tam diuersæ gentes ad vnū

Vranus deus antiquissimus apud Atlantides

Aureo Saturni sæculo Deus vnus monarcha legem primam vniuersalem instituit.

D omnium

omnium cōmupemq̃ue finem perducantur, nisi ab vno, per vnā quandam legem communis boni causa latam, qua mundus tāto sæculorum ambitu sit administratus. AT QV E hic cū Morillonus paullum respirando substitisset; Augustinus excipit. RECTA atque euidenti prorsus ratione hæc probat Plato, quem

Lex nō modo tantum vniuerso, sed rebus etiam singulis imposita.

inemini item asserere, nō tantum ab initio hanc legem mundo vniuerso, sed rebus etiam singulis impositam: immò simul cum rationis lumine à Deo infundi hominū animis, velut rectissimum veri falsiq̃, boni maliq̃ue examen, secundum quod actiones vitæ ad bonum dirigatur. A qua

A lege diuina lex scripta promanat.

deinde lex scripta ducit originem, vt in exordio libri legum testatur, docens non ab homine, sed ab ipso Deo leges habuisse initium, vt etiam indicat in Protagora, cū dicit,

Iouem

SEV DE LEGE DIVINA. §1

Iouem per Mercurium, quem diuinae rationis cuncta percurrentis actum intelligunt esse veteres, condidisse legem, qua iubeatur omnes ciuilitatis esse participes; hoc est temperantiam & iustitiam colere: quæ solæ virtutes ciuitatem formant ac conseruāt, harumq; omnino expertes eliminādos esse censet. Sed quādoquidē hanc Themida legem esse illam primā diuinam Morillone putat, quam Orpheus peculiari hymno nobis decantat, cur alio mascula Dei persona νόμον ἐράνιον inuocans, etiam hanc legem plurimis pulcherrimisq; exornat epithetis? immortalium mortaliumque regem castum appellans, astrorū positorem, signaculum iustū maris & terræ, atq; inflexibile robur naturæ, seditione carentem, semper legibus obseruatum, quibus ipse supergreditur magnū cælum ferens &

*Mercurius
quid Platonis.*

*Iouis prima
lex.*

*Nomus Uranus
deus apud Orpheum.*

*Legis diuinæ
epitheta &
proprietas.*

iniquam inuidiam sibilo ingenti explodens. Quiq; mortalibus vitæ finem bonum excitat: ipse enim solus, inquit, viuentium gubernaculû firmat, sententijs rectissimis agens, immutabilis semper: priscus, & multæ experientiæ, innocēter omnibus iustis cohabitans, iniustis ferens perniciem grauē. Quibus profectò verbis præclaras legis diuinę virtutes nobis exprimit Orpheus, atq; ita in cælum euehit, vt Arnobio teste, Zeno Citæus Deû ipsum hanc putauerit, & simul æthera, quam Themida tu esse dicis, atq; Orpheus etiam Nomum cælestem appellat. RESPONDIT illico Morillonus. Et hæc quidē difficultas me quoque aliquandiu perplexum tenuit: Sed vbi animaduertem Lunum Deû antiquos vocasse, & eandem Lunā Deam, maremq; & feminam diuerso tamē respectu ab

Zenonis sententia de lege diuina.

*Lunus deus,
& Luna dea.*

ab Orpheo & Ægyptijs existimatam,
 Veneremq; bifor-
 micum, atque Platonicos in super
 obseruasse nomina Deorum mascu-
 lina significare in diuinis actum effi-
 cientē: feminina verò virtutem ip-
 sam ac potentiam capientem numi-
 nis. Et rursus nomina, quę in diuinis
 significāt statum, referri ad numinis
 substantiam: quę verò motū, ad eius
 actionē applicari: mox est exemptus
 ille mihi scrupulus. Nam lex diuina
 Themis à positione, vt mox dicam,
 nuncupata femininè, substantiā &
 potentiam capacem propriè signat,
 qua vim diuinam in se recipit: Eadē
 cū νόμος dicitur, παρὰ τὸ νέμεν, à di-
 stribuēdo: masculo nomine eius ef-
 ficientia atque operatio in inferiora
 corpora notatur. Et quamuis poēti-
 ca illa libertas veterum istas differē-
 tias nō tam religiosè obseruet, apud

*Venus bifor-
micis.*

*Nomina de-
orum mascu-
lina quid si-
gnēt, et quid
feminina.*

Orpheum tamen has diuersas eiusdē
 numinis naturas ac proprietates v-
 trunque hymnū diligentius perpen-
 dentes haud difficile perspiciunt.
 Pulcherrimas enim legis cælestis &
 diuinæ virtutes, quibus totum hoc
 vniuersum administraur, abunde
 nobis expressit Augustinus ex Nomi
 hymno: in Themidis autem cogno-
 scimus varijs epithetis potentiam &
 perfectionē legis, quā à Deo lato-
 re accepit, cū ex eadē honores bea-
 torum, atque religionis vaticinijque
 mysteria pura prouenie canat, Cæ-
 li, hoc est Dei, castam filiam vocans,
 atque Telluris, seu primæ materiæ,
 nouū germen: dicensq; bonis paren-
 tibus ortam, beatam, præclaram, au-
 gustam, atq; hominibus honoratam
 esse, gaudereq; dulci & læto cōsilio.
 Hanc igitur Themidē, ex qua leges
 omnes bonæ promanant, à summo
 Deo

*Legis diuinæ
 perfectio.*

*Lex diuina à
 summo Deo
 præscripta.*

Deo progeneri constat, siue hunc Solem appellare voluerit poëtica libertas, quòd vnus sit; siue Vranum, eo quòd omnia videat, finiat, & custodiat, siue Aethera, ἡ θεὸν, ἡ ἥλιον, à motu quo omnia creauit primū, creataque iam gubernat. Zeno quidē Stoicus, vt Augustinus paulò antè ex Arnobio, & etiam apud Ciceronem libro de naturæ Deorum primo legimus, Deum Aethera nominauit. Et amplius Orpheus poëta diuinus incomprehensibilem quendā & omnium supremū, ac natu maiore, omniumq; opifcem hunc supremū dixit Aethera, à Tellurem inuisibilem vocauit. Vnde Hyginum existimo Themida filia Aetheris dixisse: quod nomen exponunt Plato & Aristoteles, quasi ἀεὶ κίνητος quoniā semper currat moueaturq;. A qua motus natura τὸν θεὸν quoq; volūt appellari, καὶ ἥλιον

Deus Aether dictus.

Themis Aetheris filia.

Dei & Solis etymologia.

Cur ad mo-
tum nomina
referantur
diuina.

ex eo quod αἰεὶ ἐλθεῖ id est semper re-
uoluatur. Nam, vt ibidem Plato tra-
dit in Cratylo, cū prisci illi Cælum,
Solem, Lunam, Stellas, Ignem,
aërem, aquam, terram, & quæ ex his
generatur, in perpetuo esse motu vi-
derent, atq; per hunc maximè cōser-
uari: deos etiam ipsos creatarum re-
rum numina ac potestates eiusdē ef-
fe naturæ putarunt; omnesquē θεοὺς,
hoc est, cursores, appellandos, moto-
riq; omnium supremo ab eodem ef-
fectu nomen dandū esse censuerunt;
non secus ac alia etiam nomina huic
à diuersis operationibus proprieta-
tibusq; attributa cognoscimus. Ita-
que & deorum antiquissimū & sum-
mum Atlantides, aliique vetustiores
in orbe populi Vranum appellarunt
παρὰ τὸ ὁρᾶν, τὸ βλέπω, quòd omnia
Deus consideret ac videat; ἢ παρὰ τὸ
φυλάττω, τὸ φυλάττω, quòd omnia custo-
diat,

Vranus unde
d. εἶναι.

diat, cōseruet & foueat: ἢ παρὰ τὸ ὁρίσας
quòd omnia terminet ac definiat.

T V M ita Cardinalis. Atqui video
M. Tullium ex antiquorum opini-
one terminatorem extremum cæ-
lestem circulum Deum dixisse.

*Extremus
cælestis circulus
deus dictus.*

V E R V M est, inquit Morillonus,
nam in somnio Scipionis vbi de no-
uem mundanis orbibus differit, ita
loquitur: Quorum vnus est cælestis
extimus, qui reliquos omnes com-
plectitur, summus ipse Deus, arcens
& continens ceteros. Quo loco Deū,
supremum motorem intelligit. Ve-
rùm D. Lactantius Vranum Latine
Cælestum interpretatur; à nobis au-
tem, an ne Cælus masculino voca-
bulo appellari posset? Quid ais Pi-
ghi? de ea namq; re nescio quid he-
ri adferebas. T V M ego. Adfere-
bam occasione, inquam, antiqui il-
lius tituli.

*Vranus Cæle-
stus dictus.*

Cælus Deus.

OPTIMVS MAXIMVS CAE-
LVS AETERNVS IVPITER.

QVI legitur in aræ marmoreæ fra-
gmento nuper è ruinis castrorū pe-
regrinorū effosso, velut mihi retulit
vir eruditione varia & antiquitatis
peritia excellens Benedictus Ægius,
qui hoc tāquam accessorium quod-
dam testimonium nobis attulit, ra-
tionem reddens cur Apollodori sui
initium (quam Bibliothecam hacte-
nus prælo non editam, simul latini-
tate donatam, breui, vt spero, stu-
diosis publicabit) hoc modo trans-
”ferre voluerit. Cælus primus orbis
”totius imperio præfuit. In qua qui-
”dem voce imprimis Ennij auctori-
tatem se sequi affirmat, qui Deum
intelligens, Quem Cælus genuit, di-
xit. Atque ideo eundem hunc Ennij
locum Flavius Sosipater grammati-
cus probatissimus annotavit, indi-
cans

cans non malè pro Deo singulariter
& masculinè hanc vocem pronun-
ciari . DEINDE Morillonus. Sed
hæc de Themidis patre, inquit, dicta
sufficiant, quam meritò vocat *ἐυπατέ-*

ἐυπατέρα
Themis.

πειαν Orpheus, velut à summo bono
procreatam. eandemq; Telluri, id est
vniuersi materiæ primæ, vel naturæ
principijs infusam à Cælo fabulan-
tur poëtæ : è qua deinde per omnes
mundi partes omniaq; corpora pro-
pagatur . Tellus namque Græcis *γῆ*

Tellus.

vel *γαῖα* dicitur à *γῶ*, τὸ χωρῶ καὶ τίπτω,
quòd omnia suscipiat & pariat lege
quadam diuinitus imposita . vnde
γενήτειρα vocatur, & mater magna Ro-

manis. Cuius filia Themis à Ioue cō-
iunx adsciscitur, eidemq; gignit Ho-
ras . Non hic tamen est Iupiter ille
optimus maximus, supremus Deus,
quem nobis Orpheus apud Proclū
describit, sed mens animæ mundi,

Iouis coniunx
Themis.

Iupiter mens
animæ mūdi.

atque

atque vis illa benefica Dei prouidēs
rebus omnibus, vt volunt Platonici,
quem poëtarū deos diuerfos vnius
summi numinis plures esse potesta-
tes interpretantur. His enim Cælus

*Celi dei va-
rie significa-
tiones apud
Platonicos.*

Deus prima simpliciq; nominis po-
sitione animam sphaerę stelliferę si-
gnificat: secunda Deum ipsum: ter-
tia Dei fecundā virtutē, qua omnia
procreauit: quarta Dei aspectum ad
superiora. Sic Iupiter his primo no-
minis intellectu anima est sphaerę ter-
tiæ, secunda mens animæ mūdi, ter-
tia voluntas benefica numinis om-
nibus prouidens, quarta numinis
aspectus ad inferiora. Igitur secunda
& tertia nominis impositione Cælū
vel Iouem intelligunt, cū Themis
hic coniugem habere dicitur, ille
procreasse. Ideoq; Orpheum puto
Iouem Horarum patrem appellare
non βασιλέα, sed ἀνάντα, cū dicit, ὦραι.

*Iouis varie
significatio-
nes apud eos-
dem.*

θυγα-

θυγατέρες Θέμιδος, καὶ Ζηνὸς ἀνακτος. Iso-
 crati enim alijsque Græcorum anti-
 quissimis probatissimisque ἀναξ mi-
 nus est quàm βασιλεύς, vnde Iouem
 supremū vocant βασιλέα, ceteros ve-
 rò minores deos ἀνακτες. Verūm hæc
 nimis prolixè; eas enim Cæli, Satur-
 ni, Iouis, aliorumq; deorum potesta-
 tes & significantias ex Orpheo, Pla-
 tone, Trismegisto, Porphyrio, Pro-
 clo, & Iamblichō harum rerum stu-
 diosus colligere poterit. Nobis autē
 constitutus terminus hæc Themis
 nostra, cuius interpretationem quæ-
 rimus, per quam, vt dixi, prudēs an-
 tiquitas nihil aliud mihi videtur in-
 tellexisse, quàm legem illam peren-
 nem à Deo naturæ impositam; at- *Lex diuina*
 que ita sanctè præscriptam, vt sine *terminus à*
 hac ipsa nihil possit. Quæ quidē lex *Deo natura*
 εὐλογον illud in se continet, quod Græ- *præscriptus.*
 cis κατ' οὐσίαν λόγος, ἢ ὁριστικὸς, μόνιμος, καὶ
 αἰ-

ἀμετάπτοτος appellatur, hoc est, ipsius
essentiae definitiva vel terminatrix,
immobilis atque irrefutabilis ratio
eius rei cuius est interpret, quemq; ali-
ter esse non potest. Non mirum igitur
si Termini forma deam effinxe-
runt, quam à positione appellatam
esse ipsum eius nomen indicat. cu-
ius etymologiam ita deducunt veteres

*Themis unde
dicta.*

*θέμις ὅθεν
μὸς idē fere.*

Grammatici. *θέμις δηλοῖ καὶ τὸ πρέπον, καὶ
τὴν σωματικὴν θεάν. γίνεται δὲ παρὰ τὸ θεσ-
μὸν θέμις, καὶ ἀποβολῇ τοῦ σ. θέμις. Τὸ δὲ
θεσμὸς ὄνομα, ἀπὸ τῆς θέσεως. ἕκαστος γὰρ νο-
μοθέτης ὡς ἐβούλετο, ἐτίθετο τοὺς νόμους. ἐκ τοῦ
θεσμὸς οὖν, ὃ σημαίνει τὸν νόμον, γίνεται θέμις,
ἐκ τοῦ τίθημι, θεμὸς καὶ θεσμὸς, καὶ θέμις καὶ
θέμις. Huius itaq; legis nulla alia est
ratio quam quia legislatori Deo sic
visum: à quo tamen nihil nisi sum-
mè bonum atque εὐλογον constitui-
tur. Quapropter ipsum fas esse inter-
pretatur Sex. Pompeius: ἀξίον, πρέπον,
ἀνάλογον, καὶ ἀρμόζον Hesychius, alijque
Græci.*

*Themis ip-
sum fas.*

Græci. Ea enim omnia lex ista in se continet, atque Themidis potestati conueniunt; cuius esse inter nos pacisci, compactaque custodire Phurnutus scribit: θέμις δὲ, inquit, ἡ τοῦ συντίθεσθαι τι μετὰ ξυῖν ἡμῶν & φυλάττεσθαι. Cuius item actus omnes ad Dei cognitionem, hominum beatitudinem, rerumque omnium procreationem, ac naturæ conseruationem tendunt. Quod idem docent Deæ diuersa epitheta ab antiquis ei attributa, quibus insigniter adornatur, depingiturque pulcherrimè. Orpheus enim ipsam appellat ἀγνήν, παντιμόν, σεβασμίον, ἀγλαόμορφον, καὶ χαλκωπίδα κούρην: nempe ab innocentia, maiestate, atque decore. Sic Hesiodus αἰδέειν vocat à pudore ingenuo ac temperantia. Pindarus σωτήραν καὶ εὐβουλον, à salute, prouidentia, & bono consilio. Hæc enim præbet dona verè se colētibus, id est,

Themida pacisci, pactaque custodire inter homines.

Themidis variae laudes varique virtutes.

αἰδέειν cur dicta Themis.

64 T H E M I S D E A,
id est, fas ipsum obseruantibus. Hæc
munera intelligit Catullus poëta ad
Mallium scribens:

*Huc addent diui quàm plurima, quæ
Themis olim*

Antiquis solita est munera ferre pijs.

AT Q V E hæc locutus, signū de-
nuò manibus apprehensum diligen-
tiùs considerat, tãquam ad alia per-
recturus. Tum ego summa disputa-
tionis huius amœnitate affectus, at-
que sciscitãdi cupiditate instinctus:
Atqui, inquam, eleganter admodū
mi Morillone, plures legis diuinæ
dotes, quibus animum perficit, no-
bis in Themide hac explicasti. Sed

*Cur Somati-
cam Themis
veteres ap-
pellarint.*

*In Cratylō.
Sepulchrum
animæ cor-
pus.*

quæso ne prætereas cur *σωματικὴν καὶ
σωματικὴν θεῶν* veteres appellarint,
istud item nobis explica. NEQ V E
hoc, inquit, caret mysterio, *σῶμα* nã-
que sicut nouistis, Plato *παρὰ τὸ σῆμα*
vult deriuari, quod nō modò sepul-
chrum

chrum animæ sit corpus : sed etiã signum monumentumue , per quod σημαει id est significat , quæcunque significare potest . Itaque Somatica vocatur dea Themis , quia nobis velut signum ac nota voluntatis diuinæ est , rerumque agendarum terminus à Deo constitutus ; vel quòd seruet animam & corpus lex diuina : nam σῶμα vocant Orphici & Pythagorici , idcirco corpus , quòd anima in eo σώζεται , seruetur & custodiatur , vt ibidem Plato testatur in Cratylo . Quinetiam corporalis dea idcirco dici poterit , quòd procreatione rerum promoueat , quæ legem à Deo statutam excedere nō potest . Quod si contingat monstra portentaque nascuntur , quibus iram diuinam ostendi volūt , grauissimaq; reip. imminere pericula ob legem hanc cælestem spretam vel violatā . Non abs

E reigi-

re igitur Somaticam vocarūt Deam,
 quando ad eius proportionē iustam
 elementa rerū congregantur coacer-
 uanturque ad corporum generatio-
 nem. Est enim *σωματοῦδαι* concre-
 re, atque vt Quintilianus loquitur,
 in corpus ire. Cū autē duæ sint po-
 tissimum Themidis virtutes & tan-
 quam binæ leges à Deo positæ, qua-
 rum vna corpori est præscripta, vt
 iam dictum est, quam *σωματικὴν θεάν*.
 altera menti animæque, quam *νοητικὴν*
 appellarunt: Duas etiam Themides
 multi antiquorum putarunt esse, at-
 que imprimis Romani, Carmentas
 eas nominantes. Quarum bina sacra
 Carmētalìa, pontificū vnum, ad ani-
 morum curam pertinens, matrona-
 rum alterum ad corporum sanitatē
 generationisq; felicitatem expeten-
 dam à Numa rege Ianuario mense
 instituta fuisse, memini te Pighi in
 tuo

*Themides seu
 Carmentis
 due.*

*Carmētalìa
 bina.*

tuo fastorum seu Kalendarij antiqui
cōmentario non malè exposuisse, at-
que eandē esse cum Themide Car-
mentam, & Dionysij antiquitatū li-
bro primo, & Plutarchi Problemati-
bus abunde probasse, vt qui aucto-
res, atque etiam ipse Ouidius in suis
fastis ea de re hanc narrent fabulam
Arcadicam nympham Themida,
quam & Nicolstratam appellarunt
Græci, velut vi rectæ rationis inui-
ctam, ex Mercurio Euandrum pepe-
risse, intelligentes *εὐανδρίαν* id est, pul-
chram vim, generosamque virtutem
nasci ex naturæ lege, motu diuinæ
rationis, qui Mercurius est. Deinde
cum filio Euandro ex Arcadia ab
improbis pulso, in Italiam nauigas-
se, sexaginta fermè annis ante bel-
lum Troianum, atque eo loci vbi
nunc Roma est, Palantium oppidum
in colle Palatino post dicto cum suis

*Themis cum
Carmenta
eadem.*

*Carmenta
fabula.*

extruxisse, ibidemque mansisse, & Aborigenes rudem incultamque Italiae gentem, deorum cultum, leges, mores bonos, atque litteras docuisse, rationisque gubernaculis subiecisse. Vnde propter diuinam sapientiam vaticinandi; peritiam Latino nomine vocarunt pro Themide vel Nicostrata Carmentam seu Carmentem, à mentis scilicet raptu, vel priuatione, aut *διὰ τὰς θεοφορούσεις*, vt Plurarchi verbis dicam. Hinc enim metra, quibus oracula legesque edebat diuino afflata numine, nominarunt carmina. Vnde & Dionysius græcè Carmentam *θεσπιῶδες* ab oraculorum cantu dici existimat. Ceterum, vt antè dixi, pro duplici numinis potestate, duas etiam Carmentas poëtæ finxerant. Vt enim D. Augustinus de ciuitate dei libro quarto ex Varrone, ni fallor, scribit, Ioui deas adesse

*Carmenta
vnde.*

*Carmina
vnde.*

θεσπιῶδες.

adesse putarunt, quæ fata nascentibus canunt, & vocantur Carmentes. Quo loco fata intelligi debent, non necessitates illæ causarum primæ, sed naturæ leges à deo nascentibus rebus datæ. Alioquin & oracula, quæ item leges diuinæ sunt, appellantur fata quod à Deo fantur. Tales duas nobis Carmentes monstrauit nuper noster Pighius in arca sepulchrali mar-
morea in historia Iudicij Paridis, ubi Iuppiter medius inter duas hæc deas sedens conspicitur, quo nobis signatur, diuinitatis aptissimas hæc esse comites, atque ab ipso Ioue tanquā summo bono prouenire, illique adhærere, sine eo nihil esse. Iam verò Carmentā cum Themide vel Nomo eandem esse, illudquæ numen aliquando secerni, atque haberi duplex, satis constare ex iam dictis existimo. Cùm enim elementa, ex qui-

*Carmentas
Ioui adesse.*

*Fata nature
leges.
Oracula
fata.*

*Carmentes
in arca sepulchrali Romæ.*

*Carmentes
seu Themides
qua ratione
sint due.*

bus corpora inferiora componuntur, rectè disponit & æquè digerit, vna videtur; cùm mentes animosq; ad pietatis, æqui, boniquè cognitionem ac regulam format, actusq; hominum ad hunc scopum dirigit, altera. Quapropter vti prior à matronis colitur ob causas iam dictas, ita hæc ad animi bona adipiscenda sacro pontificio propitiatur, tanquam nobilius & maiestate augustius numen, quāto mens animaquè corpore est præstantior. Atq; hæc etiam splendidioribus ornatur titulis σωτεíρα, βουλαῖα, εὐβουλος, αἰδεíης, ab auctoribus appellata. Nec non ab Orpheo decorata non minùs digno quàm proprio elogio, dum ad Musæum hymnos Deorũ & sacra scripturus, eam inter alios inuocans θέμιντ' ἱερόσκοπον ἀνδρῶν, id est sacram obseruatricem hominũ appellat: quippe quæ hominum cogitatio-

*Que Carmẽ
ta matrona-
rum, & quæ
pontificum.*

*Themis ἱε-
ρόσκοπος.*

gitationes & acta inspicere, & aruspici-
 cis in morem diuini numinis volun-
 tatē ipsis patefacere soleat. Hæc ita-
 que est illa *θεσπιώδης* & fatidica Ro-
 manis Carmenta, quæ mētes agitat,
 cuiusq; arbitrio oracula nō solū om-
 nia subijcit Ammianus Marcellinus;
 verū etiam Deos ipsos, à quibus illa
 prouenire putabantur, quos substan-
 tiales vocat potestates. Immo & ra-
 tionē nostram ex elementorū peren-
 nium spiritu, vt autumat, vim suam
 habentem, omniaq; alia media,
 per quæ futurorum aliquam noti-
 tiam assequi possumus, huic deę sub-
 esse dicit. Indicat insuper summum
 Iouis numen fas illud primum seu
 legem hanc suam in se complecti,
 nihilq; contra illam facere, cum in
 cubili Iouis Themin manere scri-
 bat, nimirum Orpheo atque alijs as-
 sentiens, qui hanc secundā Iouis cō-

*Fatidica
Themis.*

*Ammiani
Marcellini
sententia de
Themide.*

*Themis in
cubili Iouis.*

*Themis Atlā-
lantidum ve-
na atque Io-
nis nutrix.*

iugem volunt esse. Cū verò Athlā-
tidum vnam Themis fingunt, at-
que cum Amalthæa nympha Iouem
nutricasse : mentem animæ mundi
cum Platone intelligētes, in lege illa
æterna subsistere, & foueri docent.
Ad hæc ita Cardinalis : Haud sanè
vulgaria mihi videntur quæ memo-
ras, sed cognitione prorsus digna.
Quare ipsum Marcellinū lubenter
audirem. Deprome librum Martine,
vt nobis locum prælegas. Is cū at-
tulisset librum, verba ipsa ex histo-
riarum xxi. sic recitauit. Elemen-
torum omniū spiritus, vtpote per-
ennium corporum, præsentienti
motu semper & vbiq̃ue vicens, ex
his quæ per disciplinas varias affe-
ctamus, participat nobiscum mune-
ra diuinandi, & substantiales pote-
states, ritu diuerso placatæ, velut
ex perpetuis fontium venis, vaticina
morta-

mortalitati suppeditant verba. Qui-
 bus numen præesse dicitur Themis.
 Quam ex eo quòd fixa fatali le-
 ge decreta præscire fas sit in posterũ
 (quæ rethimema sermo Græcus ap-
 pellat) ita cognominatam in cubili
 foliòque Iouis vigoris viuifici Theo-
 logi veteres collocarũt. T V M Au-
 gustinus: An igitur existimas Moril-
 lione semper vnã eandemque hanc
 esse Themis legemve de qua hæcte-
 nus es locutus? I M M O eandem,
 respondit Morillonus; nõ enim nisi
 vnã Themida, vnũ lumẽ, vnãq; *Themis, &
 lex vna.*
 legem intelligo: quam non malè Ci-
 cero, tam (vt dixi) de republica libro
 tertio, quàm de natura Deorum se-
 cundo, rationem rectam summi Io- *Themis, ratio
 recta summi
 Iouis.*
 uis appellat, perpetuam, atq; vt alibi
 dicit à numine Deorum tractã, cum
 mũdo natam, vniuersitati, singulisq;
 rebus conuenientem. Nec dissentire

*Mundū vna
lege guberna-
ri secundum
Platonicos,
utq; per vni-
uersa propa-
getur lex di-
uina.*

Platonem nouistis, qui variis locis docet, non solum humanum genus, verum etiam mundum ipsum, atq; ea quæ in eo producuntur, ad vnum boni finem à Deo vna quadam lege dirigi atque pèrduci. Quæ ab ipso promanans, tanquam à primo summi boni fonte ac luminū patre, per inferiorum Deorum dæmonumque potestates, & corporum cælestium elementorumque species ideæsvē diuersis radiis diffunditur, variisq; riuis profluit, atq; inde etiam in mentes animasque & corpora inferiora singula: sed certo pulchroq; ordine & proportionē iusta, ut vnūquodq; pro suæ conditionis, naturæ, & materiæ qualitate, plus minúsve accipiat à Themide muneris, quantum supremo rerum omniū gubernatori placuerit. Adeo ut videatur quidem multæ Themides, multæue leges, eò quòd

quòd diuersis gradibus distinctæ plus minúsve polleant, cùm tamen reipsa non nisi sit vna. DEINDE rursus Augustin. Iam mihi in mentem, inquit, reuocasti, quod de legis diuinę veræq; naturalis quatuor differentiis seu gradibus Platonici sentiunt, quasq; pulchrè Ficinus ex ipso philosopho collegit. Legem vnã quippe æternam esse, ac penitus immutabilem, apudque omnes gentes eandem de rebus ijsdem. Nam quæ temporibus, locis, opinionibus permutatur, non legẽ sed constitutionẽ dici debere. Legis verò illius æternæ species quatuor Platonem ponere, quarum prima diuina, in summi Dei mente posita sit, quam prouidentiam, & ex Orpheo Saturni legem appellat. Secunda cælestis in superiore animæ mundi parte, quam fatum vocans Iouis legem dicit. Ter-

*Legis diuinæ
quatuor gradus
seu differentie.*

tia

tia mouens in mouente inferioreq̃.
 illius potentia , quam primæ Veneris . Quarta in hominis mente animaq̃; rerum creatarum, quam secundæ Veneris legem nominat. Harum primam , ait, à summo bono, quod supra mentem est , profluere in vniuersa: Secundam à mente & summo bono: Tertiam ab vniuersali anima, mente & summo itidē bono: Quartam ab eodem, mente & anima, omnesq̃; ad ipsum bonum quoque reflecti. Primam versari in Idæis circa summum bonum supra rationes: Secundam in rationibus circa Idæas supra semina: Tertiam in seminibus circa rationes supra formas: Quartā verò in notionibus ac formis circa rationes supra actus atque artes . Et hanc regiam appellat legem supernæ legis imitatricem , qua homines reliquaq̃; animata gubernantur.

*Regia lex
 qua homines
 animataq̃;
 gubernantur*

HIC

HIC denuo Morillonus : Non adeo quidem, inquit, hæc extra scopum ; ad terminum enim nostrum quoque pertinent, quem quadrangulum nunc constituis ; aperisq; illas specierum inter se conuersiones, vtque ad vnum idemque principiū, à quo promanant, regrediantur. Sed hoc aduertendum, duas priores sapientiam illam diuinam in se complecti, hoc est, cognitionem earum rerum, de quibus vix à nobis haberi scientia potest : vt sunt summa rerū principia, & æternæ rationes, quas diuinas appellat Plato, qui diuinarū rerum scientiam asserit esse sapientiam absolutam. Ex his duabus itaq; prior virgo etiamnum Themis Cæli vel Solis filia, supremi boni contēplationē sacratissimam præstat, Saturni aureum sæculū menti repræsentans. Altera in rationibus circa Idæas versatur,

Noetica Themis seu due priores legis diuine species quid contineant.

Themis virginis.

*Themis Iouis
coniunx.*

*Somaticæ
Themidis, seu
legis diuinæ
posteriores
duæ species.*

*Quid ad legis
diuinæ verū
intellectum
requiratur.*

satur, & oracula diuina pandit, & nunc Iouis coniunx esse Themis dicitur, atque in eius habitare cubili, Parcasq; producere vt tradit Hesiodus. Reliquæ duæ species ad inferiora hæc pertinent: quarum prior Horas Ioui, atque Mercurio Euandrum protulit, circaq; rationis motum potens supra formas versatur, quam Plato primæ Veneris appellat. Posterior in notionibus ac formis efficax, secundæ Veneris Platoni, poëtis Eurinome dicitur, atque Ioui Gratias gignit, generationi actibusque præfecta. Atque hæ duæ non diuinarum rerum, sed humanarum scientiâ docent, quam Plato prudentiam appellat. Harum quidem specierum quatuor legis diuinæ claram perceptionem atque intellectū sine diuini numinis ope nemo poterit assequi, nemo Themidis huius nostræ virtutes rectè

rectè cognoscere nisi à vitiis purgatus, mentem animæ nobilissimam partem lumine cælitus demissò, illustratam habeat. Quamvis faculã rationis nobis Deus sit largitus, quæ cæteris animatibus præstamus, quæ, ut Homerus ait, τὸ τῆς ψυχῆς κέαρ, hoc est, illud animæ cor non habet. Hæc sola nos aptiores reddit ad percipiendam Deæ virtutem, cui radius diuini luminis si accedat, magis etiã viget, causas consecutionesque rerum facilius videt, celerrimè multa simul agit, similitudines transfert, disiuncta coniungit, præteritis præsentia comparando, mox futura simul concipit. Hinc Romanis, ut Macrobius refert, Anteuorta & Postuorta, vel ut Ovidius, Porrima & Postueta Deæ, quæ fatidicæ illius Themidis seu Carmentæ sorores ne fuerint, an comites, poëta dubitat Fastorum libro primo

Ratio, cor animæ Homero dicitur.

Rationis diuinitus illustratæ vi.

Anteuorta & Postuorta Deæ, vel Porrima & Postueta.

80 THEMIS DEA,

primo canens ita :

Si quis amas veteres ritus, adsisse pre-
canti,

Nomina percipies non tibi nota prius.

Porrimum placatur Postuentaque, siue so-
rores,

Siue fugæ comites Menali diua tuæ.

Altera, quod porro fuerat, cecinisse pu-
tatur;

Altera venturum post modo, quid-
quid erat,

A L I I autem existimant vnius
Deæ diuinatricis hæc esse cognomi-
na, quæ opinio mihi non displicet :
nam easdem puto esse Carmentas
duas, quarum Gellius libro & capite
x v i. meminit, & ex Varrone nomi-
nat Profam & Postuertam, à recti
peruersiq; partus & potestate & no-
mine, quibus aras Romæ difficilis
partus auertendi causa statutas fuisse
scribit, quæ *σωματικῆς*, vel procreatri-
cis

Profa & Po-
stuerta.

cis Themidis item videntur esse cognomina. Sed hæc Pighio declaranda relinquamus. Mox Augustinus. Antequam tamen (inquit) progrediare ulterius Morillone, velim explices latius, vnde Themidi oracula, quæ deinde ipsam Apollini tradidisse legimus. Hoc eò familiarius à te postulare audeo, quò Pighio felicius cessisse video, quòd tuā orationem de Somatica Dea interrogando paulò antè tam audacter interpel-
larit. AD hæc Morillonus. Quidlibet vobis pro vestra in me auctoritate ac iure in his licitū putate, quod iam dudū Pighius sibi licere pro nostra amicitia & mutua benevolentia nouit. Queris vnde Themidi oracula, rem certè quæsitū dignam: sed magis tibi Augustine (vt autumo) quàm mihi notam. Quia tamen pro ingenij tui elegātia dissertatiunculis hisce

*Scientiæ fru-
ctus ac dele-
ctatio.*

te plurimum delectari scio, lubenter ea quæ nunc occurrunt, in medium adferam. Indagatio enim hæc rerum cum maximarum, tum etiam occultissimarum habet oblectationem suam. Si verò quid occurrat prius non cognitum, amœnissima completur animus voluptate; quæ quidem & me mirificè ad horum studiorum amorem trahit, omnemque laborem leniens fastidia procul abigit. Quapropter mea quoque causa interrogationibus hisce vestris lubenter respondeo. Iam verò satis demonstratum puto, Themida nostram nihil aliud quam legem esse diuinam ab ipso summo promanantem bono, naturæque vniuersitatis ita præscriptam, ut sine hac consistere nequeat. Igitur & oraculorum diuinationisq; fontem purum continere arbitrantur Platonici, atque diuini nominis, (quod ipsum

*Cur Themis
oraculis præ-
sit.*

*Lex diuina
fontem ora-
culorum, ac di-
uini nominis
interpretatio
non continet.*

ipsum bonum ac verum est) claram
 complecti scientiam, planamq; in-
 terpretationem. Cui scientiæ sapien-
 tes Hebræi tantam tribuerunt au-
 ctoritatem, vt eam non modò scien-
 tijs omnibus, verùm etiam legi di-
 uinæ scriptæ præferant: affirmantes
 ipsam à Deo S. Patribus ac Mofi
 fuisse traditā: Mosen literis suæ legis
 imaginem quādam eius expressisse:
 genuinam tamen ipsam mentibus
 sanctorum hominum, seu propheta-
 rum à solo Deo infundi, quibus le-
 gem suam interpretandi dederit au-
 ctoritatem. Horum itaque effata at-
 que interpretationes legitima ora-
 cula & vaticinia dici possunt, quip-
 pe cū mentem interpretum Deus
 suo lumine illustret, & Themis hæc
 gubernet. Cetera, quæcunq; aliunde
 proueniunt, malorum geniorū præ-
 stigiae, fascinationes, ac meræ sunt

*Lex nō scrip-
 ta legi scrip-
 tæ præcellit.*

*Legis nō scrip-
 tæ interpreta-
 tionem à solo
 Deo infun-
 di mentibus
 sanctorū ho-
 minum.*

*Oracula &
 vaticinia in-
 terpretatio-
 nes esse legis
 non scriptæ.*

imposturæ. Lex autem summi boni regula, atque volūtatis diuinæ signū est. Oraculum verò legis interpreta-
 tio, adeo ut nihil à lege differat; ita videlicet nuncupatum, quòd in eo Dei contineatur oratio, quæ voluntatis est index. Hoc quidem Cicero in Topicis affirmat. Oracula, inquit, ex ipso appellata sunt, quòd est in his Deorum oratio. Atque ab eodem

*Oraculum
vnde dicatur*

*Fata, καὶ τὰ
λόγια vnde.*

*Χρησμός
quid.*

etymo ducūtur fata, καὶ τὰ λόγια, nempe à fando, & oratione vel sermone. χρησμός autē oraculum vocatur, quasi index voluntatis diuinæ, quodq; indigentiam seu necessitatem quandā adferat vi rationis impellentem, ut illud sequamur quod iubet. τὸ τεθεί-

τὸ τεθείμενον.

μενον verò (quo ipso & oraculum appellari testatur Marcellinus) ut eiusdem est significationis cum lege & Themide: ita ab vna & eadem voce deriuatur, qua θεμός, καὶ δεσμός, καὶ δέσ-

*Legis scripta
te, & oracu-
li vicinitas.*

μις,

μῆς, καὶ Θέμῆς, nempè ἀτίθημι, eo quòd terminum ponant ac præscribant, quem excedere nefas est. Hinc etiam est, quòd θεμῖς ἐναι tam significet vaticinari, & responsa dare, quàm leges ferre, & iura reddere. Atq; ex his manifestum opinor, cur Themis oraculis præesse dicant poëtæ, cùm ab ea provenire, legisq; diuinæ oracula esse interpretationes docuerimus. Ut autem his applicemus fabulas, Ovidius canit diluvij tempore Themis in Beotica iuxta Cephisum habuisse templum, & responsa ibidem dedisse Deucalioni & Pyrrhæ consulentibus post diluvium de reparatione generis humani. Orpheus autem in Themidis hymno eam hominibus primam vaticinium purum declarasse dicit, ac Delphico in specu responsa dantem in Pythijs regnasse, Phœbumq; regem æquè recta con-

Themidis oraculum in Beotica diluvij tempore.

Oraculum Delphicum Themida obtinuisse, & postea Apollinem.

filia seu oracula docuisse, quæ pulchrius & breuius poëta sic cecinit.

ἡ πρώτη κατέδειξε βροτοῖς μαντήιον ἄγνον
 Δελφικῶν ἐν κεντρῶνι θεμισέουσας θεοῖσι
 πυθίῳ ἐν δαπέδῳ ὅθι πυθοῖ ἐμβασίλευεν,
 ἡ καὶ φοῖβον ἀνάκτα θεμισοσύνας ἐδίδαξε.

*Python draco
 Delphicus.*

VETVSTISSIMUM autem atque olim toto orbe celeberrimū illud Delphicum antrum fabulantur primum à dracone belua dira obsesum diu desertum, hominibusq; interclusum fuisse. Quem natum ibi volunt ex terræ putredine post Deucalionis diluuium, & postea Apollinis occisum sagittis ibidem computruisse, inde & ipsi nomen Python, cū prius Delphines appellaretur, mansisse, vt refert Suidas. Apollinē deinde tam hac quàm Cyclosum, qui Ioui fulmen fabricauerat, cæde pollutum, Olympo depulsum, diuinæque potestate spoliatum, nouem
 annos

Apollinis exilium.

annos in Thessalia exulasse ad Tempe, atque Admeti regis boues pascisse. Cuius fabulæ interpretationem, quia ad nostrum scopum non adeò pertinet, nunc quærere superfedebimus. Alij nõ exilium illud fuisse volunt, sed eum huius orbis solum alio orbe mutasse, & illic (vt refert Plutarchus de oraculorum defectu) nouem magnorum annorum anfractibus purgatum, vereque Phœbum, id est, mundum rediisse, atq; oraculum apud Delphos à Themide accepisse.

*Apollo cur
Phœbus dictus.*

Vt autẽ iam libro dicto Plutarchus asserit, Apollo præstat idem menti, quod sol corpori; cùm eam foucat, illuminet, temperet, & expurget. Pura itaque & nitida mens esse debet ab affectuũ passionumq; tabe, priusquam diuinorum cõsiliõrum veram interpretationem assequi possit. Et illa ipsa supremi luminis à Deo pro-

*Apollinis &
Solis comparatio.*

*Apollo quid
in mente.*

manantis agitatio ignea mentes cō-
mouens expurgando, quam Apolli-
nem vōcant, in illa putri inferiorum
corporum corruptione diu plerun-
que laborat ac luctatur: sed tandem
exuperans diuinę legis cognitionem
amplexa, veritatis ingens lumē adi-
piscitur. Hinc est quod Plutarchus
idem de fera numinis vindicta scri-
bat, ex tripode Delphico splendidis-
simum lumen per Themidis sinus in
Parnassum transparere, quo signifi-
cat per diuinam legem totum illud
Musarum domicilium vera diuina-
rum humanarumq; rerum cognitio-
ne illustrari. Inde etiam Homerus
Themis immortalibus manibus A-
pollini nectar & amabilem ambrosiā
propinare dicit in Apollinis hymno.

*Per Themidis
sinus lumen
ingens inPar-
nassum trās-
parere.*

*Themis Apol-
lini nectar
& ambrosiā
propinat.*

Ἀλλὰ Θέμις νέκταρ τε καὶ ἀμβροσίην
ἔρατεινὴν

Ἀ΄ θανάτῃσιν χερσὶν ἐπήρξατο.

ET quidem scitissimè. Sed quid intelligit quæso per nectar & ambrosiam? non aliud (vt autumo) quàm ipsas Deæ seu legis diuinæ virtutes, innocentiam atq; immortalitatem.

Nectar & Ambrosia quid significent.

Deducūt enim νέκταρ παρὰ τὸ νε σέρητικόν, *Nectar unde dicatur.*

καὶ τὸ κτώ, τὸ ἀναιρῶ, ἢ φονέω quasi minimè destruens vel occidens. Et ἀμβρο-

Ambrosia unde dicatur.

σία, vt aiunt etymologici, σημαίνει τὴν ἀθανασίαν. ἀμβροσία δ' ἐ, ἢ ὄντως σοφία τοῦ θεοῦ.

ἀμβροσία, θεῖα τροφή, ἥς βροτῶν οὐ μετέχουσιν.

ἢ ἥς οὐχ οἶοντε βροτὸν ἀΨαθαι. ἔστιν οὖν βρόσις,

καὶ βροσία, καὶ κατὰ σέρησιν καὶ πλεονασμῷ

τοῦ μ. ἀμβροσία. Tria verò significare

videmus apud Græcos veteres am-

brosiæ vocabulum, nempè immor-

talitatem, sapientiam Dei, & diuinū

nutrimentum, cuius mortales non

participant, aut cuius vsus immorta-

litate præstat. Itaque Plato de pul-

chritudine in Phædro nec nō in Phi-

lebo de summo bono, vbi de cælesti

F s &

Tria significare ambrosiam apud veteres.

*Anime bonū
esse diuini
luminis con-
secutionem.*

& vera differit vita, animę bonū esse probat integram diuini luminis cōsecutionem. Id lumen in mente primò, in voluntatem deinde descēdere dicit. In mente veritatem esse, vocarique poëtico inuolucro ambrosiam: in volūtate gaudium, & appellari nect̃ar. Gaudiū verò illud in Ioue de vaticinio differens à Deo provenire, mentemque supra hominis naturam erigere, ac velut in Deum transferre docet, furoremq; esse quēdam diuinum ac poëticum, appellatque illustrationem rationalis animæ, per quam Deus eandem ex alto delapsam ad infera, ex imo retrahit ad supera, sibi que vicinam collocat. Motus autem igneus ille diuini luminis calore suo mentes exagitans, quem Apollinem nominarunt, eas illustrat per Themidis sinus, hoc est, per legis diuinæ rationes atque præcepta,

*Furor poeti-
cus quid sit.*

cepta, in Deum supra omnia mortalia vertit atque erigit, ibidemq; veritatis æternæ cognitione tanquam ambrosia pascit, eiusdemq; cognitæ gaudio vel nectare voluntatem inebriat, atque in furorem quendâ diuinum vertit, animunq; totum felicem ac beatum & immortalem reddit. Igitur cùm Apollini ambrosiam & nectar Themis infundere dicitur legis diuinæ virtute, mentem æternæ sapientiæ participē fieri intelligunt; qua quidem sapientia non solū præteritorum ac præsentium, verum etiā futurorum certa continetur notitia. Quapropter mihi quidem est dubiū, an vlla salubrior vel auspiciator reperiri possit salutationis formula, quàm illa Græcorū, χαῖρε. Hac enim vna voce accedentes abeuntesue simul valere, sapere, & gaudere iubemus, omnigenæ felicitatis ambrosiā
atque

χαῖρε, Græcorum saluatio.

atque nectar imprecantes. Sed hæc de vaticinatrice Themide, quam *von-mey* appellari diximus, eiusq; oraculis iam satis multa. Somaticam verò, quam Pighio nostro monente obiter attigimus, eidem relinquemus alio loco exactius examinandam. Nō malè etenim hoc tēpore me nauasse operā arbitror, si priorem illam, quæ regit animos, vtcunque explicarim. Neq; enim quicquam obstat, quin plurima quæ de hac disseruimus, atque dicemus deinde, etiam de altera possint intelligi. Vnam namq; Themis vnamq; legem probauimus esse, eamque non aliter plures videri, quàm diuerso respectu, in quantum eadem est rebus diuersis præscripta. Cur autem Termini quadrati forma hanc nobis representarit antiquitas, haud obscuras etiam rationes quasdam suis locis pro argumenti occasione

Cur Themis
Termini forma.

sione adduximus. Neq; verò legi diuinæ conuenientior figura reperiri posse videtur, quàm illa quadrata, recta, alta, plana, simplex, virtutibus eius congruens, humanam quidem exprimens proportionem altitudine sua septem pedum, vel quatuor cubitorum; sed imaginem reliqua corporis forma minimè, præterquam capite, in quo rationem cum virtute Platonici tanquam in arce collocāt. Ideoq; mentis animæque rationalis sedem appellat Galenus. Quam in vertice præsidere dicit Xenocrates, in cerebro cubare Hippocrates, vel circa cerebri fundamentū Erasistratus. Non ineptè igitur Homerus & Democritus in Physiologumenis caput Ioui sacrum esse dixerunt, quando is anima mundi mens esse putatur. Sanè caput præcipuum ac maximè diuinum corporis membrū æstimant

*Caput mentis
ac animæ ra-
tionalis sedes*

*Caput Ioui
sacrum.*

*Caput præci-
puum mem-
brum.*

marunt veterum philosophorū doctissimi quique, quod ad mundani orbis similitudinē compactū videatur. In eoque duos animę diuinę circulos positos Plato tradat, rationis scilicet atque memorię. Quodq; reliquorum omnino membrorū, velut princeps, ministerio vtatur, significatq; id ipsum quoque diadema regni insigne, seu fascia quę caput Themidis cingit, indicans legem diuinā, rectamque rationem mundo rebusq; in eo creatis omnibus imperare.

*Diadema
Themidis
quid signet.*

*Lex Diuina
domina ac
regina om-
nium.*

Quam idcirco Tullius aptissimē Tullianarum quęstionū secundo, dominam atq; reginam omniū appellat. Neque ab hac sententia discrepāt nostrę religionis antistites antiqui, vt D. Augustinus de Ciuitate Dei libro primo cap. xvi. affirmans virtutem qua rectē viuitur ab animi sede membris corporis imperare, sanctum-

etumq; corpus vſu fieri ſanctæ volū-
 tatis. Caput item docet Heſichius *Caput mentē
ſignificare.*
 Hieroſolymitanus allegoricè vniuf-
 cuiuſque animalis ratione pollentis
 mentem dici, cuius (inquit) ſedes ce-
 rebrum, vnde caput & cuncta, quæ
 adhærent iecori, ſuper altare in holo-
 cauſtum ponere iubemur. Nam &
 cor & iecur concupiſcentiæ noſtræ
 impetum motumq; continent. Qua
 propter (vt ad Terminū noſtrum re-
 deamus) honoratiſſimæ apud Athe- *Terminales
ſtatue hono-
ratiſſimæ.*
 nienſes olim, alioſq; Græcos fuerunt
 ſtatuae illæ terminales, effigiem tan-
 tum capite, ſine manibus, ſine pedi-
 bus, & humanam altitudinem recta
 quadrangula columna ab humeris
 deorſum exprimentes, vt quæ men-
 tis ingenijq; vim quandam diuinam
 ſignificent, cui nec manibus nec pe-
 dibus eſt opus, vt quod facere deſti-
 narit, efficiat. Nec minus firmam ac
 conſtan-

Forma quadrata quid notet.

Heroum statuas terminales.

Quinam heroes dicantur.

constantem designat iustitiam recta & æqualis illa forma quadrata, proportionem vndiq; iustam, & immotam stabilitatem retinēs. Quare nec his statuis donabantur nisi heroës virtutis ergô, nempè ingenio, prudentia, doctrina, rebusue præclarè gestis conspicui, quorum vita ad legis diuinæ vel virtutis regulam probè facta erat, quos Plato passim sapientes ac diuinos appellat. Homerus verò θεοεικέλες, καὶ θεοτιδεῖς. Inter quos etiam referendos censet apud Tullium Africanus, qui præstantibus ingenijs in vita humana diuina studia colūt. Hic denuo Cardinalis. Profecto verum dicis mi Morillone, plures enim eius generis statuas & illustriū ducum, & doctorum hominum adhuc videmus, quas partim è Græcia allatas, partim ad imitationem Græcarū factas arbitror. Multæ enim nomina

mina sua pectori inscripta præ se fe-
runt, vt Miltiadis, Socratis, Platonis,
Theophrasti, P. Valerij Pöblicolæ, a-
liorumq;. Reperitur & Numæ Pom-
piliij effigies terminali forma in de-
narijs argenteis, qui Numa Termini-
num Deum Romæ primus consecra-
uit. T v m ego, Cardinalis verba
comprobans: Rectè, inquam; vidi e-
nim denariũ illum his diebus apud
humanissimum eruditissimumq; vi-
rum Achillem Massæum, qui cusus
à M. Varrone fuerat cùm legatus ef-
set, proquestore Cn. Pompeij Magni
bello Piratico & Mithridatico. Cete-
rũ plurimas eius generis statuas è
Græcia in villam suam Tiburtinam
transtulisse Hadrianum Imperatorẽ
colligo ex fragmētis; quæ nuper ibi-
dem vidi cum titulis adhuc suis, vt
potè Themistoclis, Cimonis, Alci-
biadis, Heracliti, Andocidis, Isocra-

*Heroum sta-
tue quæ Ro-
mæ visantur*

G . . . tis,

tis, Aeschinis, Aristotelis, Carneadis, Aristogitonis, & Aristophanis: Sed capita (quod dolendum) ferè omnia temporis iniuria perierunt: Tituli Græci quadratis litteris elegatissimè insculpti permanent. Hic iterum Morillonus. O miram antiquorum in obferuando decore, atque in exprimenda ratione diligentiam, qui quadraturam illam æquitatis & iustitiæ non solùm in æquilatèro termino, sed etià in litterarum figura retinere voluerunt! Hanc enim vel in corpore vel in plano vel in numeris mathematici inter rectilineas figuras perfectissimam existimant: ideoq; vt veteres Fortunam in volubili globo solent pingere, propter inconstantiam: ita Sapientiam in quadrato statuebant, cuius sedes firma atq; inconcussa est, nempe ipsa lex diuina, quæ vitijs omnibus resectis excisisq;, quadratū vitæ iustioris

*Quadrata
litteræ in he-
roum termi-
nis.*

*Fortuna in
globo.
Sapientia in
quadrato.*

iustioris tenorem, & ex omni parte
 libratum demonstrat. Quapropter
 apud Arcades nō Mercurij tantum,
 verumetiam Iouis aliorumq; Deorū,
 vt Pausanias auctor est, statuæ qua-
 dratæ fiebant, rectam, iustam, & cō-
 stantem numinis potentiā designan-
 tes. Nam & Poëta quidam cecinit.

Deorum statu-
 e quadratæ
 apud Ar-
 cades.

*Iupiter ipse manens stabilis facile om-
 nia voluit.*

QVADRATVM insuper homi-
 nem antiquo prouerbio virum om-
 nibus numeris absolutum, probum,
 ac iustum appellarunt, veram felici-
 tatem atque gloriam in animi bonis
 & lege diuina collocantem: qui assi-
 duè faciet, cogitabitq; omnino, quæ
 sunt virtutis, & fortunæ casus opti-
 mē feret, vbiq; moderatus & rectus,
 ὅς ὥς (inquit Aristoteles Ethicorū pri-
 mo) ἀληθῶς ἀγαθός, καὶ τετραγώνος ἀνευ ψό-
 γου, hoc est, is verè bonus & quadrā-

Homo qua-
 dratus qui
 dicatur.

gulus sine nota vel vitio. Rhetoricorum quoque libro tertio ad Theodecten perfectum virum metaphoricè quadrágulum vocari dicit. Sed raram semper fuisse hanc in terris a-

*Rarus vir
quadratus.*

apud Stobæum sermone XLIIII. hæc legimus. τίς οὖν οὕτω, κατὰ τὸν Σιμωνίδου λόγον, τεξάγωνος, ὅς κατὰ πᾶσαν τύχην, καὶ περιγμάτων μετέσσειν ἀσφαλῶς ἐσῆζεται; συναρμόζων μὲν ἑαυτὸν τοῖς τε ἄρχουσι, καὶ ἀρχομένοις, καὶ πρὸς ἑαυτὸν ἀρμόζων ἅπαντας πᾶσαν δὲ πάντων διαφορὰν πρὸς ἓνα τὸν τοῦ χαλοῦ συναφάινων λόγον. Dubitat enim vehementer quisnā adeò iuxta Simonidis poëtæ dictū, quadratus reperiri possit, qui per omnē fortunam rerumq; mutationem firmiter consistat, accommodās se principibus, simul & subditis, & sibi ipsi concilians cunctos, atque omne rerum omnium dissidiū ad vnam recti rationem componēs. Igitur cū lex diuina sit optima at-

que

que perfectissima, Themis Deam
 aptissimè veteres quadrangulā quo-
 que formarunt, quæ verè se colentes
 reddit bonos, perfectos, atque qua-
 dratos. Eademq; figura quaternarij
 numeri vim atque perfectionem cō-
 plectitur, æqualibus quatuor lateri-
 bus semper recta, & quatuor lineis
 totidemq; angulis vndequaq; con-
 spicua, & sibi vbique similis. Adde
 quòd Themis ipsa cum tribus filia-
 bus quaternarium expleat, atque ita
 vt super tria imponatur ipsum vnū,
 principium scilicet omnium, aucto-
 re Pythagora. Cui vni quidam ex ve-
 teribus adeò fauere visi sunt, vt deū
 supremū illud esse dixerint, qui vnus
 simplex, & immobilis omnia terna-
 rio conficit, quem & ipsum in se cō-
 plectitur. Trias namq; princeps im-
 pariū perfectus numerus ipsum om-
 ne significat, principio, medio & fi-

*Themida vo-
 num ac tria
 completi.*

Vnum.

Trias.

ne cōtentum. vt Aristoteles in libro de Cælo differit. Itaque Pythagorici rerum omnium mensurā esse dixerūt Triada, ob eam opinior causam, quòd Deus per legem suam ternario mundum gubernet. Vnde est & Maronis illud: *Numero Deus impare gaudet.* id est, bono, iusto, & pulchro. Bono, vbi creat: iusto, vbi disponit: pulchro, vbi singula perficit. Huic igitur Triadi si monada ipsam adiungas, cōficitur insignis quaternio, seu *τετρακτύς* illa Deum opificem cum toto vniuerso suo opificio representans, facerrimum Pythagoreis olim iusiurandum: quam perennis naturæ fontem in se complecti dicebant. Illud autem iusiurandum tale fuisse Plutarchus nobis prodidit de Philosophorum placitis libro primo.

τετρακτύς
Pythagorica.

Οὐ μὲν

Οὐ μὰ τὸν ἀμετέρα ψυχᾷ παραδόντα τε-
 ξαντῶ
 παρὰν ἀενάου φύσεως ριζώματ' ἔχουσιν.

PORRÒ quaternariam cunctas
 tum numerandi, tum canendi pro-
 portiones continere, ex Pythagori-
 corum sententia tradit Athenago-
 ras. Quem idcirco numerum omnē

Quaternius
 numerus om-
 nis, mundo
 sacer apud
 Pythagori-
 cos.

vocabant, quod denarij numeri ab

ipsis τέλειος appellati, atq; mundo cō-

secrati, vim plenitudinemque cōti-

neat, velut cardo numerorū omniū.

Nā vnū, duo, tria, quatuor si iungan-

tur, summā decadis cō-

stituūt. quam quadratu

ram primā appellāt, tri-

gono æquilatero consi-

stentem, cuius principiū monas est.

Idem triagulus per de-

cades iteratus centena-

rij summā explebit: at-

que deinde per cente-

G 4 narios

narios millenarij. Deniq; per millenarios myriada conficiet. Cùm igitur

Tetras quater variata.

tur quater variata te-

C

tras perfectissimã vbi-

C C

que summã cõstituat,

C C C

profectò & ipsa sum-

C C C C

mã debet esse perfe-

ctionis, & quę habea-

M

tur in precio dignissi-

M M

ma. Omnia namque

M M M

*Quaternarij
numeri vis
eadem quę
legis diuine.*

quę sunt, quaterna-

M M M M

rius numerus conficere colligareque

videtur. Elementa namq; rerum ferè

omnium quatuor esse constat: Atq;

etiam consensu quodam tacito gen-

tes plerasque omnes præcipuum Dei

nomen quatuor litterarum elemētis

scribere nouistis; quod profectò for-

tuitum cenferi nõ debet; nam absq;

diuinæ potestatis ordine non vide-

tur euenisse. Appellatur igitur rectis-

*Tetras solidi
perfectio.*

simè tetras solidi perfectio; nam om-

nia

nia quæ cōsistunt, pūctum, lineam,
 superficiem & corpus habēt. Appel-
 latur & harmonia; nam epitritus est
 ad ternariū, ad binarium diplasius,
 ad vnitatē tetraplasius. Adijcere hic
 nō fuerit fortassis absurdum symbo-
 lorum Themidis quaternionē my-
 sticum, quem Græci olim religiosissi-
 mē inter arcana seruabant; videlicet
 organum, lucernam, ensem, & pecti-
 nem muliebrem, quibus deæ virtu-
 tes designabantur. Per organū enim
 notabant mentem eleuatam atque
 contemplantem summum bonum,
 quæ legis diuinæ vim nobis decla-
 rat: organum namq; montibus atq;
 alto gaudere, & visum illustrare, no-
 men ipsum indicat. Summos autem
 montes, vt Olympum, cælo compa-
 rarunt veteres, atq; ab Indis Caucasi
 summum vocatur deorum domici-
 lium, vt Philostratus in Apollonij

*Tetras har-
monia.*

*Quaternio
mysticus sym-
bolorum The-
midis.*

*Organum
quid nolet.*

*Organi na-
tura.*

*Montes altos
cælo compa-
rari.*

vita libro secundo testatur. Sic Han-

Deorum vehi-
biculum.

no θεῶν ὄχημα rupem altam appella-
uit, hoc est, deorum vehiculū. Quin

Deorū simu-
lachra in so-
ro transitorio

etiam nunc temporis in Fori transi-
torij vetustis illis sculpturis Deos ex
rupium cacuminibus se monstrātes

Ida mons.

videmus. Hos fingit & Homerus ex
Ida monte praelia Græcorum Troia-

Origani vis

norumq; spectare. Sed hæc de mon-
tibus satis. Valet insuper origanum

mirificè contra venena & serpentes,
vt Aristotelem & Pliniū auctores ha-

bemus. Quare sanitatis atque salutis
quoq; mysterium est, quæ cælestē il-

lam contemplationem sequitur. Lu-
cerna autem antiquis vitam animū-

Lucernæ si-
gnificatio.

que signat; vnde illud Euripidis, χαῖρε
φίλον φῶς, quod morituri dicere solēt.

Lampadum
ludus.

Hinc lāpadū quoq; ludus antiquis-
simus vitæ propagationē significat,
cū per vices alter alteri succedunt.

Et quasi cursores vitæ lāpada tradūt.

vt

SEV DE LEGE DIVINA. 107
vt Lucretij verbis dicam.

N E C ineptè Plutarchus lucernæ hominem comparat rationis lumine præditū, quo obscura & incognita nobis illustrantur. Cedunt enim tenebræ, vbi veræ scientiæ lumen effulserit, quod legis diuinæ imprimis studio adipiscimur, quam ipsam lucernam nobis esse dicit magnus propheta: Lucerna pedibus meis lex tua[”] & lumē semitis meis. Mentem enim[”] atque intellectum illustrat hæc sola, & veri vaticinij fontem detegit. Atque hæc duo Noëticiæ Themidis sunt symbola. Sequentia ad Somaticam pertinere videntur. Per ensem *Ensis significatio.* namq; malorum depulsionem, iustitiam, atq; recti executionem intelligunt: potestatis enim publicæ indicium est gladius, quē à Deo non sine causa magistratui traditum affirmat Apostolus. Vindex enim legis diuinæ is

næ is esse debet, atq; eos punire qui contra eam malè operantur. Quinetiam Origenes Esaię verba exponēs, quibus fertur Dominus intentato nos gladio visitare, per gladiũ intelligit dissectionē, vt ait, spiritus à carne, quam facit legis diuinę studium, virtutis amorem producens. Is enim rectæ rationis gladius affectuũ, passionum, aliorumq; vitiorum superflua ac fœda impedimēta ab animo abscindit ac aufert. Pecten denique muliebris generationis signum est, quam propagare Themida diximus. Nam & pudendum muliebri *κτενὰ* vocant Græci, atque hoc occultè per pectinem intelligi testatur Clemens Alexādrinus in Protreptico ad Gentes, vbi nobis hæc symbōla sic prodidit: *καὶ προσέπι τῆς Θέμιδος τὰ ἀπόρρητα σύμβολα, ὀρίγανον, λύχνος, ξίφος, κτεὶς γυναικεῖος· ὃ ἐστὶν εὐφήμως, καὶ μουσικῶς εἰπεῖν, μόριον γυναικεῖον.*

Pectinis significatio.

ἑρμηνεύων. Itaque Veneri sacer pecten Pecten Veneri sacer.
est, quem idcirco Cytheriacum ap-
pellat Naso poëta de Salmaci canēs.

Sæpe Cytheriaco deducit pectine crines.

VERVM hæc de Themidis sym-
bolis hætenus; breuitati enim vt de-
mus operam, nunc tempus suadet.
Videmus igitur vt nihil ociosum in
hoc simulachro, vt formarum excel-
lencia, numerorumq; sacerrimorum
proportione legis illius primariæ vir-
tutes atque ipsam diuinitatē demō-
stret, vt Themidis antiquissimæ Ho-
rarumq; pulcherrimarum potesta-
tes exprimat; quarum illius quidem
contemplatio sapientes, harum verò
cognitio prudentes, deniq; omnium
plena τετρακτύς percepta, prorsus di-
uinos facit. De numeris hæc dicta
sufficiant; iam enim tempus est, vt ad
Horas descendamus, Themidis tres Horæ Themidis ac Iouis
filias καὶ τινὸς ἀναιδέος, quemadmodum Regis filie.
Orpheus

Orpheus cecinit, & nos antè declarauimus ex Hesiodo atq; alijs. Neque verò ineptas eas esse fabulas nūc docebo. Mundum, vt nouimus omnes, Deus omnipotēs sibi similem, atque omnibus numeris absolutū creauit, tribusq; dotibus à se proueniētibus insignē Themide procreata, seu lege sua diuina imposita reddidit: nempe bono, iusto, atque pulchro. Quæ primum, vt Platonici volūt, menti atq; animæ vniuersali mūdānæ à Deo infusæ, ab eadem deinde in potentias cælestes lege illa cælesti propagātur, & hinc in rerū ideas, naturā, ac materiā, corporaq; vniuersa, vt his creata singula perfectionem suam declarēt: scilicet vtilitate bonū, ordine iustum, ornamēto pulchrum. Atq; his dotibus ternæ Iouis ex Themide filix præsidere putantur, & quicquid in mundo commodorū felicitatisq; pro-

Mundus absolutus, & tribus dotibus insignis.

prouenit, diuino quodā nutu suppe-
ditare atque administrare. Quas id- Hora celi
ianitricis.
circo celi portas obseruare fabulatur
Homerus, & ex eodem Lucianus &
Pausanias: Apud Ouidiū quoq; Fa-
storum primo Ianus sic loquitur;

Præsideo celi portis cum mitibus Horis.

A cælo namque virtutes omnes
suggerentibus Horis atq; disponen-
tibus profluere, opinione receptum
fuit. Quapropter Horatius poëta
Lyricus Iouem patrem rerum om-
nium cōditorem varijs Horis mun-
dum moderari pulcherriimè cecinit.

*Qui res hominum, deorum,
Qui mare ac terras varijsq; mundum
Temperat Horis.*

VARIAS autē videtur appellare Hora varie.
poëta à multiplici ac diuersa dearum
potestate, quæ cū omnia ad bo-
num iustumq; ac pulchrum dirigāt,
varia subeunt officia, omnigenæque
sunt

sunt felicitatis largitrices, & vbique
benefaciunt. Nam ab Orpheo pro-
pterea splendidis admodum laudan-
tur epithetis à virtutum pulchritu-
dine atque munerum gratitudine
multiplici, quibus tā animos quàm
corpora commodè exornant, atque
afficiunt. Inuocantur enim in hym-
no eius his verbis.

*Horatium
multa virtu-
tes.*

Ειαρινὰ, λειμωνιάδες, πολυάνθεμοι, ἀγναί
παντὰ χροοί, πολύοδοι, ἐν ἀνθεμορείδῃσι
πνοιαῖς,
Ωραι αἰεθάλεες, περικυκλάδες, ἡδυπαγεῖ
σωποι,
πέπλους εὐνόμεναι δροσερούς ἀνθρώπων πολυ-
τέρπων.

Q V I B V S allegoricè significat
virtutes earum perpetuò in ambitū
ire, & florere, atque in vfu, gratia, ho-
nore & oblectatione deorum homi-
numq; semper esse. Quin diuerfa ea-
rum potestas atque administratio e-
tiam vnius & simplicis nominis di-
uerfa

uerſa etymologia ſignificatur. Ap-
pellantur enim ὥραι, παρὰ τὸ ὥρεῖν, τὸ φυ-
λάττειν. Credebantur enim nō modò

*Hore à custo-
diendo dictæ*

Iouis aulæ custodes eſſe cæliue por-
tis præſidere, atque elementorū ſu-
pernos ſpiritus, influentiasue (vt vo-
cant) cæleſtes ad legis diuinæ regulā
dirigere, ſed & hominum acta obſer-
uare, inferioraq; omnia in bono ſta-
tu continere, quemadmodū Heſio-
di ſcholiaſtes tradidit. Sunt item ab

ὥρεῖν ὥραι nominatæ, vt quidā volūt,
inter quos Plato magnus auctor eſt,
veteri Attica lingua ſic ſcribi per ὁ.
ſolere nomen affirmans, propterea
quòd limitibus ſuis omnia iuſtè cir-
cunſcribant, ſtatum anni, ventos, &
fructus æqua temporum proportio-
ne terminent, bonum à malo ſecer-
nant, ad ſua quæq; redigendo, con-
cordiam ac pacem concilient, ge-
nerationem propagent. Has nobis

*Hore à ter-
minando
dictæ.*

H ſaltan-

Hora quadruplices.

faltantes, atq; annū confertis manibus circunagentes graphicè depingit Philostratus Lemnius, quadruplices eas faciens, vernas, æstiuas, autumnales, & hybernas, ternario quater iterato tam diei quàm anni partes æquas pulcherrimè referentes.

Hora Solis assecles.

T V M ego: Benè quidem hæc, inquā, ad numerorum, quæ antè dixisti, sacra myſteria quoq; pertinent. Atque hinc etiam Horas Solis assecles dici existimo, quemadmodum legimus apud Ouidium Metamorphoseos libro secundo, vbi Solis currum describit.

A dextra læuaque Dies, & Mensis,

& Annus,

Sæculaque, & positaſpacijs æqualibus Hora.

Horarum sacrificium apud Athenienses.

S E D cur quæſo Athenienſes Horis carnes lixas sacrificabant, vt Philochorus memoriæ prodidit?

R E S P O N -

RESPONDIT mox Morillonus.

Quo scilicet caloris humorisq; iusta temperie æstus siccitatesq; nimias deæ auerteret. Quarum erat fructuū omnis generis maturitatem atq; abundantia suggerere, elementa temperatè distribuendo. Erant autem Atheniēsis antiquissima sacra Pyanepsia & Thargelia Soli & Horis pri-
 mum instituta, sicut quidam Aristophanis commentatores tradidere, in ijsq; pueri oleaginos ramos lana coronatos gestare solēt: quos idcirco εἰρεσιώνας appellabant, omnis generis fructibus ex ijs dependētibus atque etiam ipsis Horis, eosq; deinde pro foribus ædium consecratos suspendebant, cantantes hos versus:

*Pyanepsia et
Thargelia
sacra.*

εἰρεσιώνη σῦκα φέρει, καὶ ποίονας ἄρτους,
καὶ μέλι ἐν κοτύλῃ, καὶ ἔλαιον ἀνεψήσασθαι,
καὶ κυλικὸν εὐζωρον, ὡς ἂν μεθύσῃ καθεύδῃ.

CRATES autem in suo cōmen-

tario de sacrificijs Atheniensium refert hunc ritum ex oraculo Apollinis institutum esse, cum olim magna fames & fructuum sterilitas urbem premeret. Alij ad Thesei votum referunt, cum is in Cretam nauigaret, ac tempestate actus ad Delum Apollini noua hæc sacra voueret, si interfecto Minotauro saluus redisset. Sed multa de his Aristophanis commentatores scribunt, item Plutarchus in Thesei vita, & Suidas. Nos verò ad Horas nostras redeamus, quæ tertio nominis etymo dicuntur ab ὠραι, id est ab ornando; nam ὦρα pulchritudinem, formam atq; decorem significat. Vnde & ὠραίος dicitur pulcher, maturus, semper flores, atq; in vigore constitutus. Hinc Floræ Deæ comites facit Ouidius Fastorū libro v.

Horæ ab ornando dictæ.

Conueniunt pietis incinctæ vestibus

Horæ:

H

Inque

*Inque leues calathos munera nostra
legunt.*

SATI s itaq; nunc demonstraui-
mus, quàm sub vno nomine triplex
Dearum potestas atque virtus con-
tineatur, quæ ab vno supremi numi-
nis fonte profluens, in ipsa lege di-
uina triplicatur. Ex qua deinde tres
illæ florentissimæ filiæ, quibus cæle-
stia terrestriaq; omnia beantur, atq;
perficiuntur, proueniunt. Has verò
Iouem, vel mentem diuinitus mun-
do infusam fingunt ex Themide seu
rectæ rationis meditullio procreasse.
Quarû Eunomia æquitas est ex bo- *Eunomia.*
ni ratione procedens, vtilitatem ac
bonam rebus qualitatem adducens,
feseque (vt asserit Plato) per omnia
diffundens, cunctaque boni virtute
conseruans. Dice iustitia est, ex iusti *Dice.*
ratione omnia distribuens, quæ re-
ctum rebus ordinem cõstituit. Quo-

H 3 circa

circa diuinam mētem ordinatricem omnium eam appellat Anaxagoras. Plato atque Orpheus diuinā voluntatem omnia penetrantem existimāt esse. Tertia Irene, pax, concordia, atque dilectio dicitur à ratione pulchri proueniens, rebus perfectionem atque ornamētum adiiciens. Mentem, visum, auditum allicit pulchritudo, cui semper adsunt amor, pax atque concordia. Potestatis igitur prorsus diuinę sunt hę tres Iouis filię, in quibus mundi naturæq; vniuersę consistit perfectio, nec minus initium ac fundamētum. Elementa enim æquitate, ordine, atque concordia cōgregantur, generatio & vita promouetur, rerum omniū societas coalescit ac fouetur. Hinc Orpheus deas inuocans, generationes fēcundas, atque irreprehensibiles operationibus suis inducere dicit.

Irene.

Pulchritudinis vis.

Horas generationem promouere.

Εὐναία

Ευκάρπους χειρῶν γενέσεις ἐπάγουσαι
ἀμεμφῶς.

OELENVS poëta vetustissimus
Iunonem ab Horis educatam cecinit in hymno, quo Deam exornauit, vt Pausanias in Corynithiaca meminit. In Polycleti insuper eximiæ magnitudinis signo eiusdem Deæ celeberrimoque, quod Mycenis in fano ex auro & ebore fabricatum extitit, in Iunonis corona Horas & Gratias exsculptas fuisse scribit idem Pausanias. Nec temerè ista; Iunonis enim numé Physiologi volunt naturæ, generationi, ac vitæ præesse. Quinimmo mundanæ animæ vim illam appellant, quæ auram vitalem promouet, vnde & Iouis sororem & coniugem atque etiam ἥραν id est, aëra vocarunt. Iunonē ergo, spiritumūe vitalem corpori infusum ab Horis æqua & matura cōstitutione materiæ,

Horæ nutrices Iunonis.

Horæ et Gratie in corona Iunonis.

Iuno quid.

H 4 quæ

quæ Eunomia dicitur, iustaquæ proportionē atque ordine debito, quæ Dice est; deniq; amica elementorum concordia, quæ Irene putatur, nutricari foueriq; intellexerunt: nec non accedentibus simul Gratijs summi decoris corona cingi & exornari. Magna quidem; vt apparet, naturæ affinitas est, magnaq; virtutum similitudo inter Horas, Parcas & Gratijs, quæ ter terne Iouis filia sacrum Musarum illum chorum cōstituunt nouenario in numero, ex dissimilibus scilicet quibusdam, quæ tamen ad vnum aliquod optimum, cōmunem vtilitatem, vniuersiq; & singulorum conseruationem mirabili cōcentu legis diuinæ vigore referūtur. Nam cū ordinem in rebus iustum ferè Parcæ, Gratiæ decorem administrent, cognoscimus Horas hæc omnia eadem, simulq; bonam qualitatem,

Horarū, Parcarū, & Gratiarum cōiunctio,

tem, vtilemq; maturitatem suppedi-
tare. Quapropter Horas in Apollinis
hymno Homerus cum Gratijs cho-
reas ducere, id est, vna operari coram
Ioue canit. Et ex ijs tertiam Irenen
pulchrā Veneris & Charitum sociā
vocat Aristophanes in Acharn. Quā
rectè apteq; igitur Orpheus in Ho-
rarum hymno cecinit, Proserpinam
Deam has comitari cum Parcis &
Gratijs, quando illam circularibus
choris ad lucem reducunt Ioui gra-
tificantes, & Cereri matri fructuum
largitrici:

*Hora cū Gra-
tijs choreas
ducunt corā
Ioue.*

*Irene, Vene-
ris & Cha-
ritum sociā.*

*Proserpine
comites Ho-
re, Gratie,
Parce.*

Περσεφόνη συμπαίνετες, ἡνίκα μοῖραι ταύτην
ἢ χάριτες κυκλίοισι χοροῖς πρὸς Φῶς ἀνάγωσι,
Ζηνὶ χαρίζομεναι, καὶ μιντέρῃ καρποδοτρεῖν.

VBI Proserpinam hic intelligit
diuinus poëta, atque ex eodem Pla-
tonici, non virtutem seminum, sicut
Eusebius de præparatione Euangeli-
ca libro tertio dicit, sed vim naturæ

*Proserpina
quid.*

H 5 concep-

conceptiuā à sphaëris cælestibus pro-
manantem in elementa , atque per-
meantem corpora inferiora omnia:
quæ deinde Iuppiter mentis mûda-
næ vigor fæcundat, vis terræ genera-
tiua Pluto amplectitur. Hanc enim
precatur idem poëta in hymno Per-
sephones, vt fructum è terra Hora-
rum fauore remittat.

Pluto.

Κλῦθι μαχαίρα θεὰ καρπὸς δ' ἀναπέμπ'
ἀπὸ γαίης

Εἰρήνη θάλλουσα, καὶ ἡπιόχειρ ὑγεία,
καὶ βίῳ εὐόλβῳ λιπαρὸν γῆρας κατάρχοντι.

Irene virens.

V E R V M hic Deas à suis effecti-
bus describit, & nominat Irenen vi-
rentem, eò quòd viuere, crescere, &
gaudere faciat: Dicen verò, quòd as-
pera, iniqua & noxia depellat, Sani-
tatem vocat dulces & lenes manus
habentem. Cōsistit enim hæc virtus
in iusta elementorum complexione,
atque in recta qualitatum primarū
distri-

Dice Sanitas

Sanitatē in
iusta tempera-
tura cōsistere.

distributione, vel temperatura. Quapropter eleganter admodum Plato de republica libro quarto, iustitiæ germanam dicit esse temperantiam; iisdemque rationibus Iustitiæ harmoniam docet esse sanitatem, probatque multis ibidem, tam animo quàm corpori sanitatem à iustitia conciliari, cùm omnia ad diuinā naturæ legem disponat ac digerat. Eadem denique cessante ab officio, succedere morbum, adeo ut virtus ipsa per se tam animi quàm corporis sit sanitas; prauitas seu iniustitia, morbus. Hæc est illa Epicuri isonomia, cuius vim summam atque infinitam Tullius de natura Deorum libro primo dicit esse, ut per eam omnibus omnia, paribus paria respondeant. Quæ æquabilis dispensatio vbicunque fuerit, adesse profectò illi corpori debet ipsa sanitas. Apertissimè igitur iustitiam Orpheus ab effectu

Iustitia harmonia sanitas.

Epicuri isonomia.

effectu suo vocat sanitatem, nō secus
 atque tertiam Horarum Eunomiam
 (quæ bona est qualitas, & recta mate-
 riæ constitutio) vitam beatam & pru-
 dentem appellat, quæ maturam vege-
 tamq; adfert rebus senectutem. Nec
 posset profectò melius Eunomiæ vir-
 tutes exprimere poëta, siue mentem
 animumue, siue corpus respicias. Nā
 εὐνομίαι bonis legibus regi, & bene
 lauteq; viuere nutriríue significat: Ita
 νομὸς nutrimētum & legem significat;
 νομὲς pastorem & regem. Adeoq; non
 temerè principale illud regendi atq;
 pascendi munus vnum idemq; esse
 existimarunt Homerus & Plato, pro
 ea quæ est inter animū & corpus con-
 nexione, gubernaculo & pastu sem-
 per indigente. Et in vtroq; sicut The-
 midis diuinam illam potestatem assi-
 duè operari, iam antè diximus: ita &
 Horarum virtutes omnino quoque
 requi-

*Eunomia, vi-
 ta beata.*

*Eunomie
 etymologia.*

requiruntur in vnum commune, singulorumq; bonum cum matre consentientes. Nec requiruntur solum in quouis genere mortalium singulatum, verum etiam in conuictu familiari ac dispensatione domestica non minus, quam in omni administratione publica. Is igitur verè vir prudens dici poterit, qui harum plenam cognitionem, rectumq; vsum possidet. Easque meritò felices domos, familias atque respublicas appellabimus, in quibus ij vel patres vel principes potiuntur rerum, quorum cogitationes & studia hæ gubernant. Nam omnia quæ ad humanæ vitæ cultum commoditatemq; pertinet, istas procurare veteres crediderunt, vt Diodorus Siculus ex Cretensum antiqua philosophia libro Bibliotheces sexto memoriæ prodidit. Nescio igitur an quis vnquam magis dignè

Vir prudens.

*Corynthum
quomodo lau-
det Pindarus*

*Hora dispen-
satrices diui-
tiarum.*

*Contumelia
Saturitatis
filia.*

dignè Corynthū laudarit, quàm Pin-
darus. poëtarum extra cōtrouerſiam
in ſuo genere ſummus. Non potuiſ-
ſet enim in cælum altiùs haud dubiò
euehere felicem eius reipublicæ ſta-
tum, quàm canendo in eadem ver-
ſari tres aureas diuitiarum diſpenſa-
trices Themidis bene conſulentis fi-
lias coætaneas, vrbium fundatrices,
Eunomiam, Dicenq; cautam, & cō-
cordem Irenen : quæ Saturitatis te-
merariæ & glorioſe loquentis filiam
Cōtumeliam ſemper proſtigare ſtu-
dent. Sed ipſum quæſo audiatis poë-
tam, cuius verba hæc recensenti mi-
hi in labris verſantur. leguntur autē
ode Olympiorum xiii. quam Xe-
nephonti Corynthio ſcripſit, eius pa-
triam imprimis commendans.

Εν τᾷδε δ' Εὐνομία ναίει κασίγνη-
ταίτε βᾶθρον πολίων.
Α' σφαλῆς Δίκη, καὶ ὁμό-

τροπος

τροπος Ειράνα, Τεμίαι
 Ἀνδράσι πλούτου, χεύσσαι
 Παιῖδες ἐμβούλου θέμις.
 Εθέλοντι δ' ἄλγε' εἶν' ὕβρις κέρου
 θυγατέρα θρασύμυθον.

E A S D E M deinde mox Horas pul-
 chrè florentes sæpe cordibus homi-
 num veterem sapientiam, hoc est, ex
 cogitatas primùm artes immittere
 dicit.

πολλὰ δ' ἐν
 καρδίαις ἀνδρῶν ἔβαλον
 ᾧραι πολυάνθεμοι ἄρ-
 χαῖα σοφίσματα.

M E R I T ò itaque beatam atque *Que felix*
 florentem dicemus illam ciuitatem, *ciuitas.*
 in qua ea politia est, vt in ipsa hæc deæ
 tres virgunculæ reperiantur, omnis
 boni, cunctarumq; quas natura dare
 potest, opum largitrices. Nihil enim,
 vt dixi, naturæ magis amicum, nihil
 ad omnium rerum procreationē &
 conseruationem est aptius, magisue
 neces-

necessarium; quàm bona cōstitutio,
 iusta distributio, & amica rerum cō-
 ciliatio. Quæ tria dearum trium offi-
 cia sunt, imò singulæ hæc simul om-
 nia, atque omnes simul singula ad-
 ministrant. Itaque manibus inter se
 connexæ, conformes, vnoque vestitu
 similes conspiciuntur, stolatæ, breui-
 busq; pallis amictæ, vittis vel tenijs
 capita cinctæ, & pectora zonis. Qui
 habitus virgineum pudorem, conti-
 nentiam, atq; honestatem ingenuam
 designat. Castitas autem atque hone-
 stas vt D. Cyprianus moris antiqui
 non imperitus asserit, nō in sola car-
 nis integritate consistit, sed etiam in
 cultus & ornatus decore pariter ac
 pudore. Quocirca cuiusq; sexus, æ-
 tatis, conditionis, atque ordinis ho-
 nestas in habitu semper obseruata &
 expressa fuit, tam apud Romanos,
 quàm apud Græcos. Quod ipsum

*Cur manibus
 connexis Ho-
 re' visantur.*

*Earum descri-
 ptio.*

vno

vno alteróue hic exemplo, pro vt argumenti nostri ratio requirit, probare conabor. Valerius Maximus libro VII. cap. III. stola verecundiæ vocat: & Poëta Martialis inter indecora & insueta recenset, meretricem stola vestitam,

Stola pudoris
& verecundie.

*Quis, inquit, Floralia vestit? et stolatū
Permittit meretriculis pudorem?*

T A E N I A S, vittas, & zonas signare temperantiã continentiamúe, Phylostratum in vita Apollonij auctorem habemus, idemque ostendit ipsa vocum Etymologia, atque eorū vinculorū vsus, cūm taniæ vel vittæ crines, zonæ mamillas cōtineant, & compescant, ἀπὸ τοῦ τανίσω, namq; τανίω dicitur, quod coronare, cingere, vel ligare significat, & vittæ à vinciendo nominatæ sunt. Iam dictas ob causas igitur Ovidius amandi præcepta daturus, è schola sua tales ha-

Tente, vitta,
& zone
quid significant.

I bitus

bitus abigit, cùm admoncant casti-
tatis & continentia.

*Este procul vittæ tenues in signe pudoris,
Quæq; tegis medias instita longa pedes.*

Instita quid.

ET quamvis instita propriè extre-
mam stolæ fasciam significet: hoc ta-
men loco eam poëta pro stola ipsa
posuit, partē eius pro toto accipiens.

*Zona quid
notet.*

Zonam verò pectoris, quo fluxæ ani-
morum cupiditates fouetur, vincu-
lum constat virginalem notare pudi-
citiam, quam idcirco sponsus Virgi-
nienſi Deæ, siue Dianæ virginis in
honore, antequam nouæ nuptæ con-
iungeretur, soluere solebat. Vnde &

*Virginienſis
deæ.*

*Lyſizone Dia-
na.*

Lyſizonæ, Dianæ nomen Theocri-
to, Orpheo, & Hesychio. Zonam
igitur soluere, virginitatem eripere
est, quo modo debet intelligi illud
Poëtæ:

λύσαι δὲ παρθένων ζώνων.

Quod

Quod Catullus iisdem pene verbis
sic latinè est imitatus.

Quod zonam soluit diu ligatam.

Eò etiam spectat Ouidij illud:

Castaq; fallaci zona recincta manu.

VERVM hæc nimis forsàn curiosè
nunc persequimur, apud vos præfer-
tim, quibus grauiora sunt curæ, con-
ueniuntq;. Sed elatus differēdi qua-
dam cupiditate sistere cursum, retra-
hereq;ue habenas, in curriculo præ-
fertim tam latè patenti, ac mihi pror-
sus insueto, facile nō possum; ideoq;
non ægrè ferendum, si aliquando à
metis aberrem. IMO per placet, in-
quit Cardinalis, hæc tam varia, tam
iucūda tua disputatio, quæ plena est
omnigenæ eruditionis. Ideoq; & hoc
amplius à te velim intelligere, cū
manibus inter se connexis Horas
dixeris, cur videam tertiam chlamy-
de circumuoluta manibus domissis

*Cur Irene cir-
cum uoluta
chlamyde.*

atque tectis seorsim stantē? IRENE
 est, respondit Morillonus. Pax enim
 tranquillè per summam quietem o-
 peratur: & cū nihil agere videatur;
 omnia tamen commoda, in quibus
 vitæ consistit felicitas, tacitè produ-
 cit. Non, vt apparet, tamen ab alijs
 planè disiuncta est, nam chlamyde
 apprehensam eam tenet media Dice,
 nec inuitam vt videmus, non enim
 refragatur, aut contraninitur. Iustitiā
 enim haud illibenter pax ipsa plerū-
 que comitatur, immo velut præmiū
 operationes & acta duarum sororum
 vsque sequitur. Bonarū enim legum
 atque iustitiæ, quæ lites & bella di-
 rimit, vnicus est finis pax, amicitia, &
 quies. Cur autē priores duæ brachijs
 effictæ sint nudis, vt rectè intelliga-
 mus, altius aliquatò repetendū erit.
 Themidis seu legis diuinæ contem-
 plationem à Platone perfectam atq;
 abso-

Cur chlamy-
de eam te-
neat Dice.

Iustitiā pax
sequitur.

Cur brachijs
nudis Euno-
mia & Dice.

absolutam appellari sapientiam su- *Sapientia.*
 perius diximus. Ex eadem nasci alte-
 ram in Theage multis probat, cōdi-
 tionalem quippe, omnibus artibus
 communem, quam prudentiam vo- *Prudentia.*
 cat, ac rerum humanarum inferiorū-
 que omniū cognitionem. Hanc tunc
 principalem prudentiam, ac regiam *Regia prudē-
 tia.*
 scientiam esse dicit, quando cæteris
 artibus, vt ministris vtitur, nempè
 cū res ciuiles atq; humanas regit.
 Tum autem duo imprimis eius sunt
 officia, leges æquas & iustas cōdere,
 & hæc Eunomia est, & conditas exe-
 qui, legitimum & iustum cuiq; tri-
 buendo, atq; ea Dice vel iustitia est.
 Dextera igitur Eunomia Dicen ap- *Cur Euno-
 mia Dicen
 dextera te-
 neat.*
 prehensam tenet, quia sine hac ipsa
 manca atq; imperfecta est, nam vnā
 operentur necesse est. Quarum dua-
 rū actiones, vt legitimæ & iustæ, quia
 omnibus perspectæ & cognitæ esse
 I 3 debent,

debent, brachia videntur nuda, atq;
manus detectæ sunt. SED cur, ait
Cardinalis, Eunomia sinistram tam
latè expandit? AD hæc Morillo-

*Cur sinistra
expandat
Eunomia.*

nus: Quia olim Ægyptij docuere, si-
nistre manus porrectæ palmā disca-
pedinatam (vt Appulei vocabulo di-
cam) innocentie atq; æquitatis, quas
maximè colit hæc Dea virtutes, sym-

*Sinistræ signi-
ficatio.*

bolum esse: eò quòd sinistra plerun-
que manus debilior sit, & ad rapien-
dum ineptior. Ceterū quia sæpè fur-
ta cēlare, clamūe operari solet, eadem
occultata furacitatem, atque acta fur-
tiua tenebrionum aliquando signa-
ri, plerique auctores satis indicant:
quemadmodū Plautus in Perſa, vbi
Lena, cūm Pechnij pueri manum de-
posceret, & ille dextram porrexif-
ſet, ait:

Vbi illa altera est furtifica laua?

ATQVE ita etiam increpat fura-
cem

cem sinistram Asinij Marrucini Catullus poëta.

Marrucine Asini, manu sinistra

Non bellè vteris in ioco, atque vino:

Tollis lintea negligentiorum,

Hoc falsum esse putas?

IGITUR Dearum nulla tegit si-

nistram, cùm innocentia atq; æqui-

*Irene cur
dextram
occultat.*

tatis sint cultrices omnes. Sola Irene dextram sub palla occultat, quam tacitè & occultè quidem, sed bene atque honestè semper operari diximus. Accedit & alia ratio dextræ occultatæ non indigna relatu. Eò enim spectare Pythagoricum illud symbolum autumo, quod Plutarchus in libello de multorum amicitia refert,

μη παντι ευβάλλειν δεξιαν, non vnicuique dextram porrigendam, hoc est, non temerè quemuis in amicitiaæ fœdus admittendum esse. Quandoquidem hoc ipsum sanctè semper religiosèq;

*Dextera si-
dei atq; ami-
citiae symbo-
lum.*

Solonis præ-
ceptum.

fit colēdum viro bono: Idque etiam ex Solonis præcepto, suadentis amicos non citò comparandos; comparatos autem nunquam abdicandos esse. φίλους μὴ, (inquit) ταχὺ κτῶ, οὐδ' ἀν κτήσῃ μὴ ἀποδοκίμαζε. Itaque fœderis ac fidei symbolum celeberrimū est dextra, vt palàm indicat Virgiliana Dido, dum in Æneæ Troiani religione ac pietate famosi perfidiam decepta stomachatur.

En dextra fidesque,

Quē secū patrios aiunt portare penates.

VT etiam Anchises, cū sit ait:

*Dat dextram, atque animum præsentī
pignore firmat.*

MILLE sunt alia exempla, quæ hoc loco referre superuacaneū esset. Nam & hoc etiam tēpore fidei, pacis, auxiliij, atq; amicitia signū dextra data solet esse, idque ex more antiquissimo, & à multis ante sæculis obser-

obseruato. Quid aliud enim ex Terentij poëtæ verbis colligimus? qui sic in Andria:

*Quod ego per hanc te dextram oro, et
Genium tuum,
Per tuam fidem, per huius solitudinem
Te obtestor.*

Vbi cōmentator Donatus ait, fœderis ac fidei membrum erat dextra. Quapropter ad hanc velut ad aram sacram confugere solent afflicti. Occurrit enim nunc Iuliani Cæsaris dictum, quod apud Ammianum Marcellinum legimus libro historiarum xxi. ad cuius dextram cū Nebri- dius præfectus non admodum amicus, qui vnus contra Constantium Augustū iurare noluerat, in summo vitæ periculo confugisset, atque vt eam porrigeret, suppliciter orasset: Ecquid, inquit, præcipuū amicis seruabitur, si tu dexterā attigeris meā? „

*Dexterā ami-
cis seruandā
esse, nec te-
mere cuius
dandam.*

I 5 Non

Non mirum igitur, si Pax ipsa, quæ sine fœdere, fide, atque amicitia diu in statu suo permanere non potest, dextram velut charissimum fidei pignus sanctè tutetur, religiosè conseruet, atque obtegit: nec cuius temerè violādam exponat, simul nos omnes docens, fidē sanctissimè, ac summa cum cura custodiendam esse:

*Qua sine non tellus pacem, non aquora
norunt.*

Q V E M A D M O D V M Silius Punicorum secundo cecinit. Quod ipsum antiquissimo ritu Numa Pompilius rex Fidei sacra instituens Romanis suis, eodem ferè modo demonstravit, iubens huic deæ sacrificare dextra panno obuoluta albo, sicut apud Seruium Virgilij commentatorem legimus. Et hæc quidem de dextera pacis obuoluta satis; restat vt ad pedes dearum nos demittamus, vt,
(quod

*Numæ regis
institutum.*

Fidei sacrificabant dextera obuoluta

(quod vobis placere video) nihil
omittatur, atque ita finem sermoni

huic imponamus. Socculis indutas *Socculorum
significatio.*

esse Deas videmus, quod modeste,
lenes, nec non faciles sint: non iracū-

dæ, superbæ, vel intractabiles. Hoc
enim genus calciamenti, apud anti-

quos modestiæ, facilitatis, atque hu-

mitatis erat indicium, ideoq; Co- *Soccus Comæ
die proprius
modestiam
signans.*

micis personis proprium solet esse, vt
econtra cothurnus calciamentum su-

blime atq; altum Tragicis, quod id- *Cothurnus
Tragœdia, su-
perbiam no-
tans.*

ter. Hinc Quintilianus libro x. cap.

II. Nec Comœdia, inquit, in cothur-
nos assurgit, nec contrà Tragœdia

focco ingreditur. Iam vt Tragœdiæ

argumentum grande, altum, ac subli-

me est; ita plerunq; inamœnū & tri-

ste, cū interim Comœdia non nisi

humilia ac læta tractet. Itaque Am-

mianus Marcellinus, cuius iam pau-

lo an-

lo antè memini , libro XXVII. non

” ineptè probi præfecti prætorio mores

” describens, ait. Erat tamen interdum

” timidus in audaces , contra timidos

” celsior, vt videretur, cùm sibi fideret,

” de cothurno strepere Tragico; & vbi

” paueret , omni humilior focco . Et

” rursus libro XXVIII. eadem vsus

est metaphora, additque ex Ennio &

Terentio personas Comicas & Tragi-

cas aptissimas. Cùm mutuū, inquit,

illi quid petunt , foccos & Mitiones

” videbis & Lachetas , cùm adigun-

” tur vt reddāt, ita cothurnatos & tur-

” gidos, vt Heraclidas illos Cresphon-

” tem & Themenum putes. Superbiā

igitur designat cothurnus , velut ex

antedictis patet: nec minus incōstan-

tiam & lubricam fidem, prorsus alie-

na à moribus dearū vitia. Nam am-

bidexter erat cothurnus , & vtrilibet

cōueniens pedi , vt etiam prouerbio

vetusto

*Vide rhetori-
cam ad He-
rennium se-
cundo, &
Non. Mar-
cell.*

*Cothurnus
ambidexter.*

vetusto occasionem dederit, quo co-
thurnos, vel cothurno versatiliores *Cothurno
versatilior.*

appellarunt olim inconstantes: Soc-
culorum contraria est significatio,
de quibus nihil addā præterea; nam
huic tēpori & loco sufficiunt ea, quæ
diximus. Quinimmo videmur, Ru-
dolfe Cardinalis amplissime, iam *Epilogus cū
excusatione.*
abūdè simulachri tui significata ex-
posuisse, nisi proluxa nimis disputa-
tione magis fatigauerimus, quàm
oblectauerimus. Vergit enim in no-
ctem dies, adferuntq; iam candelas
pueri, adeoque partem eius pomeri-
dianam totam dicendo extraximus.
Verùm aurea illa virtutum catena,
quam deæ tuæ connectunt, peram-
plam disserēdi materiam nobis præ-
stitit. T v m Cardinalis. Profectò
aduētus Morillone cum Pighio tuus
hodie mihi meritò gratissimus fuit,
ideoq; kalēdas anni noui primas no-
bis

Lis auspiciatissimas existimo, quod his inexpectato ter felices hæc Deæ tuarum Musarum ductu tãquam de cælo descendentes, in nostram arctiorem familiaritatem notitiamq; se insinuarint, quæ mihi quidẽ hæctenus ignotæ & obscuræ fuerant. Qua de causa si vnquam hoc signum mihi propter raritatem fuit charum, certè nunc in sanctiore ceimeliarchio inter res charissimas preciosissimasque seruabitur. Mox Cardinali assensus Augustinus. Admodum (inquit) dignæ sunt antiquitatis reliquæ, quæ amentur seruenturque ab homine virtutum studioso. Equidẽ mihi valdè cuperem signi huius typum ex gypso mea impensa effingi, quod esset ornamētum musæo proprium meo, studijsque atque professioni meæ prorsus accommodum.

AD hæc Cardinalis : Immò sine tua
impen-

impensa hoc habebis , nam plastes domi mihi est , qui probè curabit. Dabo suum quoque signum Morillone nostro, cuius ingenio & eruditioni debemus hoc lumē, quod hodie velut ex ipsius Themidis Deæ sinu, atque Delphico Tripode nobis clarissimum effulsit. Nec prætermittendus mihi Pighius est , cuius curæ & consilio nobis hæc tam oportuna iucundæ disputationis occasio est suggesta. Has igitur anni noui strenas à nobis expectate, & quid vestris virtutibus magis dignum rependi possit , post hac cogitabo. DVM nos hic reuerenter, vt decet, Cardinali gratias agimus ob summam eius humanitatem atq; beneuolentiam, leniter arridens Augustinus , ait: STRENAM nullam Morillone putata Cardinali vnquam fuisse gratiore, quàm hodierna tua de Themide hac differ-

differtatio ei accidit; nam virtutem verā rectè nouit æstimare, cuius limpidissimum fontem has Deas diserte pro tuo ingenio dum explicas, nobis aperuisti: quæ cū adeo charæ fuerint ipsi necdum cognitæ, nunc multo magis eas pectore atque oculis est obseruaturus, elegorum Theognidis poëtę memor, qui nos cum bonis af-
 fiduē conuersari, comedere, bibere, atque vnā sedere iubet. Ab his enim quorum magna potestas est, nos bona perdiscere posse. Si verò malis adhæserimus, eam mentem, quam habemus, nos esse perdituros. versus apud Platonē extāt in Menone & apud Xenophontem de dictis & factis Socratis.

*Cum bonis
 viuendum.*

καὶ παρὰ τοῖσι πῖνε, καὶ ἐσθιε, καὶ μετὰ τοῖσι
 ἕξε καὶ ἀνδανε τοῖς ὧν μεγάλη δύναμις.
 ἐσθλῶν μὲν γὰρ ἀπ' ἐσθλὰ διδάξεται. ἢ ὧ δ' ἐ
 κακοῖσι

Συμμιγῆς, ἀπολείς καὶ τὸν ἐόντα νόον.

OPTI-

OPTIME dicis Augustine, Cardinalis inquit, virtutem namque legis diuinæ auxiliante Deo consequamur studio, vsu assiduo, atque industria necesse est, quam hæ Deæ pulcherrimè nobis demōstrant: in quarum familiaritate domestica si versemur assiduè, non possumus tam honesto conuictu, tam sancta cōsuetudine non fieri meliores. Vtinam verò sæpè detur occasio huiusmodi conuentus celebrandi, quo possimus in tam frugifera meditatione frequenter mentē animumq; exercere. Quin vt hoc faciamus, res ipsa postulat, si perfectæ legis diuinæ cognitionem plenius assequi velimus. Morillonus enim apertè satis nobis indicauit, ad hanc disputationem nostram pertinere etiam Parcas & Gratias, easque cum Horis, vt nouenarij numeri plenitudinem constituere, ita & legis

*Nouenarij
numeri plenitudo.*

K diuinæ

diuinæ plenam perfectionem absol-
 uere. Qui numerus perfectissimus ab
 impari primo quadratus, & impari-
 ter impar, in tres triadas, & earum que-
 libet in totidem unitates diuisus, Mu-
Musarum dies. farum dies est Heliconiadum, ut He-
 siodus cecinit, summamque perfectionem demonstrat, utque Græci in-
 quiunt ἰσάνεις ἰσοῦς ἐστίν. Quis igitur explica-
 bit nobis Parcas? quis deinde Gra-
 tias? ut cyclopædiam illam præclarā
 aliquādo perficiamus? Te verò nunc
 rogarem Augustine, ut cum primum
 dabitur conueniendi oportunitas,
Parce. Parcarum, quæ ex iusto illo primo in
 comprehensibili procedunt, & ad tuā
 imprimis professionem spectant, in-
 terpretationem tibi sumeres, nisi te
 prius tam anxie & accuratè excusas-
 ses, & nisi sciremus omnes negotia
 publica talium studiorum verum fru-
 ctum in tui similibus intercipere, at-
 que

que impedire, quæ quia animos hominum distractos particularibus rebus tenent, eos exurgere ad sublimes illas meditationes ægrè patiuntur.

Laborem itaq; geminare Augustino, & aliorum incommodo à negotijs ipsum suis auertere non decet. T V M

Morillonus. Non labor hic futurus est Augustino, sed laxamētum & recreatio.

Nam tanta facilitas ingenij, Antonij Augustini laus. tantaque eruditionis copia est, ut fa-

cilè possit ex tempore de his copiosè differere, atque ex synthesi litteraria elegantissima sua splendide hanc spartam adornare.

Excuset se tamen ipse licet à dicēdi munere, sed adesse omninò debet, atque Thesea suum ad-

ducere Io. Metellum Sequanum, qui Io. Metellus Sequanus. vices eius in hac palæstra subeat.

Q V O D cūm approbaret admodum Cardinalis: BENE (inquit Augustinus) si vobis ita videtur, Metello

K 2 hanc

*Parcarum
penſa.*

hanc ſarcinam imponere poterò, atque hortari eundem, vt Parcarũ penſa diligenter euoluat examinetq; , ne malè inſtructus vobiſcum in arenam deſcendat. Scio lubenter cum mea cauſa ſuſcepturum hanc prouinciã, tum quia hiſce ſtudijs mirificè eſt deditus. Et dolebit procul dubio vehementer, cùm intelliget à me inſignem hanc Morilloni noſtri diſſertationem, quòd huic ſermoni nō interfuerit. Tu verò mi Pighi focculos interim tibi nouos etiam pares neceſſe eſt, præſultor enim Gratiarum eſſe debes, atq; eas deas concinnè in chorum ducere. H I C ego cùm verecundia ſuffuſus erubiſſem : Malè (inquam) mecum agitur, qui in foueam, quam Morillono meo parauì, nunc ipſe etiam incido. Nam veſtro imperio refragari nō poſſum, quãuis intelligam, quàm mihi curta ſit do-
mi

mi supellex, & quàm ridiculus sim
 futurus orchestes. Hic Morillo-
 nus non sine cachinno. Eia quàm re-
 cte, inquit, hic tua Dice rem suam a- *Dice Nemo*
 git Augustine, nam vt vetusto pro- *sis.*
 uerbio fertur, turdus ipse sibi malum
 cacauit. SUBSECUTVS est alio-
 rum risus: nos accepta ab vtrisque
 patronis licentia, domum simul inde
 concessimus.

F I N I S.

AVCTORVM CATALOGVS

QVORVM TESTIMONIIS IN
hoc Dialogo vsi sumus.

A

Arnobius.
Aristobulus Iudæus.
Apollodorus Atheniensis.
Anaxagoras.
Aristoteles.
D. Augustinus.
Ammianus Marcellinus.
Athenagoras.
Aristophanes.
Apuleius.

C

M. Cicero.
Cyrillus Alexandrinus.
Chrysippus.
Catullus.
Clemens Alexandrinus.
Crates.
D. Cyprianus.

D

Diodorus Siculus.
Dionysius Areopagita.
Democritus.

E

Eumelius Corinthius.
Ephorus.
Eusebius.

Eustathius
Euripides.
Eucherius.
Ennius.
Erasistratus.

F

Flavius Sospiter.
Ficinus.

G

A. Gellius.
Galenus.

H

Hesiodus.
Homerus.
Hyginus.
Hippias sophista.
Herodotus.
Hesichius.
Hippocrates.
Hesichius Hierosolymitanus.
Horatius.

I

Iamblichus.
Ioannes Tzetzes.
Iustinus Martyr.
Iulius Firmicus.
Isocrates.

Lucilius

L

Lucilius.
Lycophron.
D. Lactantius.
Lucretius.
Lucianus.

M

Metopus Metapontius.
Macrobius.
Marcellinus.
Martialis.

O

Orpheus.
Origines.
Ovidius.
Oelen.

P

Pausanias.
Plautus.
Philostratus Lemnius.
Plinius.
Pindarus.
Plato.
Sex. Pompeius.
Phauorinus.
Philetas.
Proclus.
Porphyrius.
Phurnutus.
Pythagoras.
Plutarchus.

Philochorus.

Q

Quintilianus.

S

Suidas.
Solon.
Stephanus Grammaticus.
Strabo.
Salomon.
Sopater.
Stobæus.
Simonides poëta.
Silius.
Seruius.

T

Trisgemistus.
Theophrastus.
Theodectes.
Theocritus.
Terentius.
Theognides.

V

Varro.
P. Virgilius Maro.
Valerius Maximus.

X

Xenophon.

Z

Zeno Stoicus.
Zeno Citticus.
Zenocrates.





Back of
Foldout
Not Imaged

MYTHOLOGIA
ΕΙΣ ΤΑΣ ΩΡΑΣ,
vel

ANNI PARTES.

Ex symbolis antiqui cuiusdam Toreumatis argentei, quod extat apud Reuerendissimum Episcopum Atrebatensem.

DOMINICI LAMPSO-
NII EPIGRAMMA IN
Toreuma Antonij Perenotti argenteū
antiquissimum.

*Quod tibi in Atrebatum campis, Perenotte, repertū
Nobile Mentoreæ Sors dedit artis opus,
Tempora perpetuò labentis quattuor anni
Arcanis signans irrequieta notis,
Ceu prius, obscura tectum tellure iaceret,
Nilq; videretur Diva de disse tibi:
Pighius antiqui nisi consultissimus ævi,
Ut vixisse virum plurima secla putes,
Sculpta retexisset diuinis symbola chartis
Non tibi, non aliis sat bene nota prius.
Scilicet huic debes, dulce hoc, atque vile donum
Ut Cræsi anteferas diuitiisque Midæ.
Dulce, quia ars melius facit intellecta, vel auro,
Vel gemma ut spreta suavius inde bibas:
Vtile, purgatam tacita quia voce bibenti
Personat auriculâ: DVM BIBIS, HORA
FUGIT.*

REVE-

REVERENDISSIMO

ET ILLVSTRISSIMO

Atrebatensium Episcopo, D. Antonio Perrenoto, Stephanus Vinādus Pighius, Campensis, S. D.



OREVMA illud argenteum in Atrebatum agro repertum, Præsul amplissime, antiquissimū esse, tam forma, quàm artificis non imperita, sed planè secura manus indicat. Videtur autem ex eo poculorum genere esse, quæ apud veteres ob cælaturæ argumentum vocabantur Dionysiaca, tam in mensis quàm in sacrificijs vsu cognita, & à Græcis ob formā *κότυλοι*, vel si minora erāt *κοτυλίσκοι* vocabulo proprio appellata. De quorū forma & vsu hîc adijcere quædam, non absurdum videtur.

*Dionysiacū
poculum.*

Cotyliscus.

Forma cotylis erat orbiculata, pro-

*Cotylorum
forma.*

fun-

funda, & sine marginis latitudine ampliore. Apollodorus poculi genus altum & profundum esse vult. nam
Cotyle quid. omne concavum antiqui κοτύλλευ (inquit) appellarunt: ut manuum & etiâ coxendicum concavitatem. Sic Æschylus cymbala, vocavit cotylas, ut apud Athenæum legimus. Et in polyphi flagellis extremi caliculi quibus sorbent, & adhærent, deriuatiuè cotyledonas dixere Græci, acetabula vocât Latini, à simili vasculo, quo in mensis acetum apponi solebat, quod Græcis item cotyledō, vel oxybaphū nuncupatur. Varias sè sæpius cotyli formam veteres, ex Athenæo facile colligitur: apud quem Alcæus aurem aliquoties vnam habuisse prodidit. Diodorus aures nō habere, & labello profundo simile esse contendit, adeò ut quandoque ansatum, quandoque verò sine ansa fuisse, fiat verisimile.

Polyporum caliculi.

Cotyledon.

simile. Vino autem potando cōmodū fuisse, & vsitatū docet Ion. Chius, Cotylum vino plenum dicens. Probat hoc itidē vulgatissimū antiquitus prouerbium, quod ex Clitarcho & Zenodoto ita citat Athenæus.

πολλὰ μεταξύ πίνει κοτύλης, ἢ χείλεος
ἀκρε.

Quod paulò apud Gellium aliter recitat Sulpicius Apollinaris grammaticus, pro cotylacalitem ponens: iam verò vt in sacrificijs etiam vsui fuerit, ex Platone, Eubulo, Aristophane, & Polemone latiùs explicat idem Athenæus libro x i. adijcitq; ex Pamphilo proprium Dionysio esse poculum, cui sententię suffragatur etiam Iulius

Cotylus Dionysio proprius.

Pollux libro v i i. ἔστι δὲ πὶ κότυλος (inquit) διονυσιακὸν ἔκπωμα. De cotylisco idem sentit Athenæus libro supra memorato, κοτυλίσκος δὲ καλεῖται, ὃ ἱερὸς τῷ

Cotyliscus.

διονύσιου κρατηρίσκος. Et vas ex quo Bacchi mystæ

mystæ effundunt, etiã cotyliscus appellatur, vti Nicander ait Thyatirenus illud ex Aristophanis Nebulis apponēs, μὴ δὲ σέψω κοτυλίσκον. Nō igitur mirū quod Bacchici argumētice-latura videamus plerunque ornata Dionysio sacra hæc pocula, qualia extant duo magnitudine, & artificio cōspicua. Alterū Neapoli in S. Restitutæ templo ex basalte marmore durissimo, ansas habens duplicatas, hederaceis obuinctas coronis, laruas in super thyrsos, & elemētorū symbola cōtinens: Alterū Caietæ sine ansis ex marmore Pario candidissimo, exprimēs Bacchi infātis educationē, sculptura peritissimi artificis, qui nomē suū operi præclaro adscribere nō erubuit, legitur enim ita eius titulus.

Cotylus Neapolitanus.

Cotylus Caietanus.

Salpion Atheniensis sculptor.

ΣΑΛΠΙΩΝ ΑΘΗΝΑΙΟΣ
ΕΠΟΙΗΣΕ.

Tantæ autem sunt capacitatis hæc
vasa,

vasa , vt nunc in templis pro sacri
 baptismatis lauacris commodè ser-
 uiant , qualia plerumque heroibus
 solis dicari , & *ρῦτα* appellari ob am- *ρῦτα*.
 plitudinem & pondus , auctor est
 Athenæus , licet alibi rhyta inter ca-
 pacia quoque vasa enumeret , quæ
 refrigerando erant accommoda.

Sed hæc de cotylorum forma at-
 que vsu satis multa , si illud vnum
 adiecerim, tuum illud Toreuma mi-
 hi videri nobilis alicuius & percha-
 ri adolescentuli aliquando cinera-
 rium fuisse. Nam aureis argenteisque *Cinerarium.*
 vasis Principum ac nobilium cine-
 res condi solere quis nescit? Cæterũ
 à paucis forsan animaduersum est,
 Romanos symbola , fabulas , & hi-
 storias , quibus monumenta, aras se- *Mose effingẽ-
 di imagines
 in sepulchris.*
 pulchrales & loculos ornabant, plæ-
 rumque ætati vitæ , & conditioni in
 ijs conditorũ accommodare cõsueuif-
 se, id

se, id quod nos diligēti obseruatione didicimus. Imò & deorum personas ad eius effigiem, sæpius effictas vidimus, cuius in gratiam opus illud elaboratum erat neq; secus in hoc tuo argenteo cotylo. Panis larua imberbis, ac planè iuuenilis (Panisci dices magis propriè) cornibus pusillis, ac primùm enascentibus, ætatem indicare videtur immaturam, morte subrepti præpropera, cuius cineres in eo clausos fuisse suspicamur. Eò tendunt etiam cerui & bouis cornua tenella, ex quibus facile animalium anni colliguntur. Animalia quatuor insuper perniciosissimi cursus, in hoc electa apparent, vt vitæ brevis spatiū citissimè præterlapsū exprimerent.

*Argumentū
Toreumaticū.*

Sed vt argumentum operis breuiter aperiāmus, illud nō videtur ex indocti sculptoris arbitrio confictū, verū (vt prisci moris erat) omnino
est

est eruditū: nō magis oculos intuentium pascens, quā animos antiquę religionis, vel potius philosophiæ fundamētis imbuens. Complectitur enim larvas deorū, qui quatuor anni partibus præsidet, intermixtis & adiectis non temerē symbolis alijs, quibus cęli annuam circumuolutionem, elementorū cōiunctiones, Solis ac lunę in rebus omnibus procreandis socias vires, & effectus demonstrat. Naturę igitur speculum hoc tuum Toreuma rectē ne nuncupabimus? si Theopompus Thericleum calicem suum affabrē factum & vino plenum laudans, ita alloquitur aptissimē:

Naturę speculum.

*Theopompi calix.
Thericleus.*

Χώρει σὺ δαῦρ' ὁ θηρικλῆες πινὼν τέκνον
Γενναῖον εἶδος, ὄνομα σοι τιθώμεθα
Ἀρεὶ καὶ ὅππῃρον φύσεως, ἣν πλῆρες δοθῆς.

Imò litterata non minus videri possunt huius generis pocula, quā
L quæ

Litterata pocula.

quæ ob litteras insculptas à Græcis
 γραμματικὰ ποτήρια vocari prodidit A-
 thenæus, quale fuit illud Enalli au-
 reum, quod è mari extractum Me-
 thymnēsibus attulit, cuius in circulo
 vndecim litteræ ΔΙΟΣ ΣΩΤΗΡΟΣ
 conspiciebantur, veluti refert Anti-
 clides Atheniensis libro xvi. de re-
 ditibus: & illud argenteū quod Ca-
 puæ quondam Artemidi depositum
 fuisse scribit idem Athenæus, Home-
 ricis carminibus insignitum.

Porro morem ornandi Toreuma-
 ta & quæuis etiam vasa, Bacchi, A-
 pollinis, Herculis aliorumq; deorū
 fabulis, atque ijs etiam philosophiæ
 symbolis, quibus æquè nobis mun-
 di imaginem, & naturæ ordinem ta-
 citè demonstravit vetustas, multis an-
 tè sæculis, quàm Romanum floruit
 imperiū, apud Græcos in usu fuisse,
 atque ab his ad Romanos defluxisse
 existi-

existimo, à quibus philosophiæ, religionis, & artium bonarum omnium ingens habuerunt augmentum. Docent hoc Græcorum commenta & fabulæ, quæ occasionem & materiam amplissimā artificibus ingenijs primū dedere, vt potuerint diuersimodè in hisce picturæ atque sculpturæ delitijs etiam seriò ludere.

Sed quare in poculis cursum Solis frequenter notis varijs expresse-
rint, dicendū erit, in causa esse videtur: quod vt Baccho, & Herculi, ita Soli cognato numini pocula sacrarit capacia Græcorum religio. Habere enim Solem aureū poculum à Vulcan-
cano fabrefactum fingunt Stesichorus, Antimachus, & Æschylus poëtarum vetustissimi, in quo Oceanū ab occasu Orientem versus nauigare solet. Theoclytus autem ἐν δευτέρῳ ὥρῳν, lebetem vocat Solis hoc nauigium,

*Solis aureum
poculum.*

*Lebes nau-
gium Solis.*

veluti & ille, qui multo prior Titonomachiam conscripsit. Plutarchus verò περὶ σαρκοφαγίας oratione prima ex poëta forsitan aliquo vetusto, calycem appellare videtur, quasi receptaculū in se continens florum & fructuum omnium semina. Dicit enim mundi atque aurei illius sæculi primordio Solem curru suo incertū tenuisse tramitem, & vix auroram ab occasu separasse, neque ut nunc conuersas anni partes frugiferis calycis coronis circumduxisse. Extant Mimnermi poëtæ versus pulcherrimi apud Athenæū, quibus Solem fingit in aureo lecto dormientem, in hunc usum sibi à Vulcano facto, ab Hesperidum terris per summa Oceani ad Æthiopes trajcere: per ænigma tale poculi profunditatem significans, ut ait Athenæus.

Eius itaque generis fabulas, occasionem

Solis calyx.

Solis lectus.

sionem dedisse veteribus arbitror, ut voluerint cæli & astrorum rationes, Solis atque Lunæ meatus per fabulosa ænigmata in ipsis etiam poculis repræsentare, & aptè compositis figuris rerum causas, tanquam muta quadam poësi exprimere: ut non solum inani spectaculo delectarēt oculos, sed animos etiam tacitis religionis, & philosophiæ præceptis instruerent, & vitam humanam ad bonos mores pellicerēt. Multa enim in hoc videntur efficta, ut templis, aris, atq; sepulchris conuenirent, plurima etiā reperta cognoscimus, quæ coenaculis, balneis, triclinijs, & vasculis etiā omnis generis sunt accommodata. Nonnulla quoque ob argumenti fecunditatem & præstantiam, tam sacris quàm profanis locis sunt apta. Sic quatuor anni tēpestates, quæ à Græcis vnico vocabulo *ἔρως* vocantur, in

*Cur fabule
in poculis.*

*Fabularum
rationes di-
uersæ.*

Bacchi, Apollinis & Herculis tēplis, Solis & Lunæ operationes, effectusque demōstrant. In sepulchris vitam mortalium terminis circumscribūt, & omnia in lucem exorta, ad mortē & tenebras necessariò recidere docent. Auferunt vitę pręsentis desiderium, & ad immortalitatis studium animos accendunt: In profanis autē locis, nempe cœnaculis, balneis & conuiuijs oblatę τὸ ὁρῶν picturæ, temporis præterlabentis, & vitæ fugacis memoria, ab ocio & ludicris ad seria & res agendas, à luxu ad frugem sollicitant, vel saltem (quod corruptissimo illo sæculo non rarò interuenisse puto) mortis necessitate persuasa, explosis curis, animos ad lætitiā excitant, illud poëtæ auribus hominum tacitè occinentes:

*Quid cineri ingrato seruas bene olentia
serta?*

An

An ne coronato vis lapide ista tegi?

Pone merum, & talos, pereat qui crastina curat.

Mors aurē vellens, viuite ait, venio.

Adeo nihil tam præclarè inuentum, quod non tādē in abusum trahant humana vitia. Sed in meliorem profectò finē, clarissime Antistes, magnā veteris picturæ partem excogitatam videmus luce clarius. Monstrat idem tui Toreumatis cælatura. Namq; eos typos, nō Gryllos esse (vt Plinius ap- ^{Grylli.} pellat varias & ridiculas picturas) sed serij quid omnino cōtinere viso opere ipsemet primo statim aspectu agnouisti. Igitur me accersito, poculoq; tradito, vt viderem omnino voluisti, nunquid abstrusi possem ex ijs quæ cōplectitur, è tenebris in lucem eruere. Parui tuis iussis ex animo lubens. Et licet ab ea philosophiæ parte me non parum alienarit historiæ

studium, quod me iam quadrienniū ferè tenuit, nihilominus pro mei ingenioli modulo, symbolorum omnium contextum ordine interpretari, & quam potui breuissimè eorum rationes veterum auctorum testimonijs probare conatus sum. In quo labore, si vel ex parte aliqua tuæ expectationi me satisfecisse intelligam, nihil est quod cerebrosa morer amplius quorundam iudicia, animusq; ad maiora in huiusmodi argumento tentandum tuis auspicijs mihi plurimum augebitur. Sed interim vt instituiamus, ad rem ipsam pergamus.

VER.

*Ordinis sym-
bolorū ratio.*

ET in primis, vt ordinē sequamur naturæ (quæ artifex ex vetustissimo scribendi vsu in dirigendis per vasis ambitū symbolis, cursum Solis diurnum imitando obseruauit) à notis
Verni

Verni temporis, nobis etiam aptissimè incipiendum erit. Veri enim ad-
scribunt philosophorum probatissi- <sup>ver mundi
initium,</sup>
mi quique, nō solum anni, sed etiam
mundi & sæculi initium. Eius autem
est symbolū Veneris larua, quæ Dea <sup>Ver Veneri
sacer.</sup>
presidet verno tempori, & in eius pe-
culiari tutela est mensis Aprilis, ani-
malium generationi accommodus :
Cum enim omnia per eam veniant,
id est oriantur, rectè Venus est dicta, <sup>Venus vnde
dicta.</sup>
ut testatur Cicero de natura Deorū
libro secundo.

Pulchrè igitur operis sui exordio
Lucretius, ubi Venerem inuocat:

*Per te quoniā genus omne animantum
Concipitur, visitq; exortū lumina solis.*

Et iterum,

*Nam simul ac species patefacta est ver-
na diei;*

*Aërie primū volucres te diua, tuumq;
Significant initū percussæ corda tui vi.*

L 5

Et

Et postea.

*Quæ quoniã rerũ naturam sola gubernas,
Nec sine te quicquã dias in luminis oras
Exoritur.*

Sic alia multa ibidem canit, quibus vernam illam temperiem, & animantum omniũ procreationẽ Veneri attribuit. Rationes plurimas enarrare latissimè ex Ouidio, Macrobio, & alijs multis auctoribus, nisi propositum esset obiter tantũ causas rerũ attingere, quæ ad præsens spectant argumentum: alioqui nimis longa texenda mihi esset historia.

De hastarũ religione & significatione varia, quas summa superstitione colebant veteres, nos multa in sacris Quirinalibus. In hac autẽ cælatura singulas singulis Deorum laruis adiunctas videmus cuspidum varietate differentes, sed vittis obligatas omnes: vt dijs sacratas esse constet: quod

Hasta Deorum sacra.

quod signum etiam victimis addere solent ad aram ducendis. Alioquin & propriam hoc loco habent interpretationem hastæ tēnijs obuinctæ. Solis enim & Lunę consensum in rebus procreandis indicant. Nam hastam Osiridi vel Soli, tēnias verò seu vittas Isidi (quę Luna est) tribuere solēt Ægyptij. Isidis ideo statuas multicoloribus fascijs vestiebant, Lunæ varias in elementorum coaugmētatione operationes & effectus his representantes: Licet Heliodorus ad varias Lunæ *φάσεις* id est facies, vel aspectus hanc tēniarum diuersitatem referat. In tabula tua hieroglyphica, quam ex ahenea Bembi antiquissima depingi tibi curauit vir omnigena eruditione præclarus Antonius Morillonius (vt haberes etiam typū eius philosophię, cuius in gratiā philosophorum omnium præstantissimi qui-

Haste Osiridis.

Vittæ Isidis.

Tabula ahenea Bembi.

quiq; sunt peregrinati) videmus Isidem alibi candidis, alibi versicoloribus toto corpore vittis obuolutam.

*Pomum ac
rose quid
notent.*

Pomum Veneris.

Venus victrix.

*Diademata
Venus.*

Sed quod ad Veneris hastam attinet, in eius cuspide vides pomum rosæ folijs cinctum, quod florum & fructuum primitias signare videtur aduenientis æstatis. Poma autē Veneris in tutela esse, maximè *ἑαρινὰ καὶ γλυκέα*, auctor est Artemidorus: & licet pomorū inuentorem Dionysium velit Theocritus, Veneri tamē ea tribuunt Antiphanes, & alij quidam. Romani ob victoriam formæ, quam Paridis iudicio est adepta, Victtricem Venerem cum pomo, & palmæ ramo depingunt, qua specie frequenter videmus in antiquis statuis & numismatibus.

Addunt fronti diadema, vt in larua eius vides, victoriæ & Imperij insigne, quod simul cum triumpho inuenit

uenit primū Dionysius deuictis Indis, vt apud Plinium legimus.

Rosis autē gaudere Venerem poëtæ fabulantur omnes, quod odorum suauitate, & aspectus lepore & gratia excitetur Venus. Ob pulchritudinis sanè opinionē Veneri rosam esse sacram & propriam testatur Pausanias in Eliacis. Quā ipsa primum inuenit odoris gratitudine ducta, cū in formæ cōtrouersia à Iunone, & Pallade cestum amoris fasciā deponere cogeretur, veluti diserta ludit fabella Libanius Sophista. Cū igitur pulchritudinis augmentū & victoriæ adminiculū fuerit Veneri rosa, nō mirum in delitijs illi esse poëtas canere, vt Martialis ad rosam libro VII.

Rosa Veneri
cur sacra.

*ſ felix rosa, mollibusque fertis
Noſtri cinge comas Apollinaris,
Quas tu neſtere candidas, ſed olim;
Sic te ſemper amet Venus, memento.*

Eandem

Rosa rubra
re facta sit.

Eandem quoq; fingunt suo sanguine ex alba rubram fecisse, pede in rosarum spinis vulnerato, cum Adonidi sub apro periclitati vellet succurrere. Fabulā lepidissimè recitat Aphthonius in progymnasmatibus. Attingit etiam Claudianus de raptu Proserpine libro secundo de Venere in campis Siculis rosas colligente, ita canens:

Sic fata, cruoris

Carpit signa sui.

Quam lectionē sequitur Politianus. In multis tamen exemplaribus, *doloris*, non *cruoris* habetur, quod neque potest improbari, ut de Adonio etiā flore locus intelligatur. Tam enim in rosa, quàm in Adonio flore signa doloris sui reliquit Venus, sanguinem amasij in hunc mutando, & illā proprio cruore tingendo. In rosæ autem elegidio, quod quidam Virgilij, quidam

Flos Adon-
ninus.

dam verò Aufonij esse volunt, aurore
rosa comparatur aptissimè, & in Ve-
neris tutela esse sic canitur.

Ambigeres raperet ne rosis aurora ruborè,

An daret, & flores tingeret orta dies.

Ros vnus, color vnus, et vnū mane duorū,

Sideris, et floris est domina vna Venus:

*Forsan & vnus odor, sed celsior ille per
auras*

Diffatur, spirat proximus iste magis.

Cōmunis Paphiæ dea sideris, et dea floris

Præcipit vnus muricis esse habitum.

Fax ardens, & erecta vt orientis & af- *Facis symbo-
lum.*

cendentis est Solis; ita etiam amoris,

ac vitæ nota creditur: hinc Veneri nō

tantum, & Cupidini tribuitur, sed e-

tiam Ilithyæ quæ parientibus adest, *Ilithyia.*

& Lucina vocabatur, id quod Ho-

merus testatur aliquoties, neq; præ-

terit Pausanias.

Quin etiam Matrem magnā, quā *Mater Ma-
gna.*

terram credebant, cum face erecta, &

tympano

tympano pingebāt: cuius sacra quot annis Megalesia principio mensis Aprilis summo cultu celebrabant Romani.

Tympanum.

Per tympanum verò quale etiam Veneris laruæ subiacet, terræ superficiem intelligebant aëri contiguam, quæ magis fertilis & germinabūda, animantibus vitam & alimenta sup-
peditat. Hæc de Verni tēporis sym-
bolis hoc loco satis.

ÆSTAS.

Pānis larua.

SEquitur Panis larua, Solis æstiu
hoc loco symbolum, quando coo-
perante cæli & astrorum virtute vim
genitalem per orbem vniuersum di-
stribuit, omnia prognata vegetat, &
calore suo matura reddit: Semina e-
nim mundi propellere, & diffundere
credebatur Pan Deus (qui sol est) vt
multis probat Macrobius, vimq; ge-
nitalem

nitalem illi curæ esse dicebāt. Quam
ob causam *ἑρπυρίων* Pana fingunt *Hircus Pan.*
Ægyptij, & *μένδω* eodem quo hircū
nomine vocabant. Hoc enim animal
natura libidinosissimū Pani sacrū est,
& maxima religione colunt Mende-
sij apud Ægyptios. Auctores sunt He-
rodotus, Diodorus, Suidas, & alij.

Porro ad vegetandi augmentādi-
que potentiam Solis pertinet, quod
ἀδρός καὶ αὐξητής Pan appellatur à Græ- *Pan ἀδρός
καὶ αὐξητής.*
cis, quo etiam respiciunt principes
poëte, cūm Orpheus de Pane Deo in
hymnis ita canens:

Βόσκων ἀνθρώπων γενέω κατ' ἀπείρονα κόσμον,
tum Homerus qui Deum pastorale
appellat dicens,

Παν' ἀνακεκλόμηναι νόμιον θεὸν ἀγλαέθειρον.

Sic pedom pastorale datur illi pro *Pedū pasto-
rale Panis
dei.*
hasta, baculus scilicet incuruus, &
impolitus, qui res quascūque è ter-
ra natas, pro cursu temporis rursū

M in

in terram redire significat.

*Cornua &
iubæ.*

Cæterū cornua, & iubæ in Panis fronte, item capilli setarum in modū obdurati, filuas ac segetes, æstiuo solis calore adultas, & maturas signare volunt quidā, sed radios solis intensos interpretantur Macrobius, Placides, D. Augustinus, Eusebius, Valerius Probus, & alij multi. Neque dissentiunt Græcorum vetustissimi quique, qui aurea illi cornua & rutillam splendentemq; comam tribuūt. Ex quibus Homerus in superiore versu ἀγλαέθειρον, & alius quidam apud Hephestionem χρυσόκερειον Pana inuocant, radiorum Solis splendorem intelligentes.

Fistula Panis.

Larux adiacet Panis fistula ex septem cannis cōpacta, quam eius inuentionē esse testatur Virgilius: ait enim;

*Pan primus calamos cera coniungere
plures Instituit.*

In

In septemplici hac fistula licet aliqui spirantium in orbe toto ventorū imitationē esse velint: plures tamen harmoniam cælestē, hoc est, mundi, septem planetarum, aliorumq; siderum consensum interpretantur. Quibus accedit Orphei auctoritas, qui Panadeum ἀρμονίαν κόσμου κρέκειν scribit, & amplissimis nominibus κοσμοκράτορα καὶ ἀστροδίατον appellat, insinuās quod mundi & astrorū concors virtus Solis vigori viuificè subseruiat, & materiam feminum suppeditet per corpora inferiora distribuendam.

Adest larvæ pini vel piceæ conus *Pini conus.* in patella, sacrificijs frequentissimus fructus, flammis adhibitus gratissimi odoris. Cæterum non solum Matri Magnæ, sed & Pani Deo sacra pinus est, Solis ac naturæ imaginē quandā referens, vertice videlicet globato altissimè crescens, folijs radios solares

imitantibus, quæ prætenuia, longa, & acuta nunquam decidunt, & semper virent. Ipsa etiam nux pinea flammæ ascendentis speciem præbet, lacunatis reticulatim toris, & in turbinem ascendentibus. Sed qua ratione Matri Magnæ tribuatur, & naturæ terreve symbola contineat, exponere huius loci non est. Etenim nostro argumento subseruisse sufficiet. Adijcimus tantum ob alimenti præstantiâ, & vbertatē pastoralī deo hanc arbo-rem quoq; sacrari, quam ἀπὸ τοῦ πίτουρος appellari posse existimo, licet ἀπὸ τοῦ πίτουρος quidam deducant: Eius enim πίτουρος, id est, nuclei, vel strobili plurimum (vt auctor est Diphilus) præbent nutrimenti. Mnasitheus verò pinguefacere corpora scribit, & ad bene digerendū conferre plurimum, vrinam ciere, & ventrem bene disponere. Rectè igitur Pani Deo quem se-
mina

*Pani sacra
pinus.*

mina vniuersi propellere, ac omnia vegetare diximus, pinum sacrasse veteres videntur. De Pityde verò Nympha, ob amorem Panos in arborē pinum conuersa Boreæ riualis inuidia, pulchram fabellam ex Pausania cecinit Achilles Bochius, Symbolicarū quæstionum libro vltimo. Ob quam causam pinum volunt Pani Deo in delitijs esse.

A V T V M N V S.

Tertia est Bacchi larua, qui Romanis Liber Pater dicitur, & Græcis Dionysius, quasi *Διδοίνυσος*, quia sit vini dator, vt apud Hesiodi interpretē legimus. Autumno autē præesse constat, ideoque ab Orpheo *βοξυφόρος*, & Homero *πολυτάφυλος* nuncupatur. Nam Solis tertiam anni stationē peragentis, vel declinantis in hiemem, symbolū est Bacchus, qui *τρίγωνος* inde

Pitys nympha.

Bacchi larua.

Trigonus Bacchus.

*Lycus &
Liber.*

ab Orpheo quasi tertiæ genituræ, vel ætatis: quam Sol autumnali conuersione peragit. Porro Lyciū, vel Alysiū & Lyeum à Græcis à soluendo vocari constat, & Liberū Romanis à liberamēto, vti Varro auctor est, non solum quòd animū à curis liberet vinum, sed etiam quòd Sol Autumnalis semina & fructus maturos à stirpibus suis dissoluat, & separet.

*Corona hederacea.
Thyrus &
scutum.*

Insignia laruæ sunt Bacchicæ corona hederacea, quam primus portauit, auctore Plinio, Thyrsus & scutū, victoriæ atq; triumphī Indici argumenta, ob cuius rei memoriam in sollennibus Bacchi sacris Thyrsos, galeas, & scuta hederæ folijs adornata ferre solent Thraces, de quo nos latius alibi.

*Hedera cur
Baccho sacra.*

Hedera verò Bacchū gaudere ab omnibus decātatum est, quam ideo Dionysium vocant Græcorū aliqui,
&

& ipse Deus κισσοφόρος καὶ κισσόβριος à poëtis frequēter appellatur. Causam nonnulli ad fabulā referunt. Bacchū videlicet infantē à nutricibus nymphis hedera occultatum fuisse atque seruātū, cū à Iunone nouerca quæreretur. Plutarchus autem in problematibus Baccho sacram dicit, quòd sit quædam hederæ species, quæ comesta absque vino ebrios reddat, & mentes ad furorem incitet. Atq; hinc etiam poëtarū corona est hedera, vt apud Persium in prologo:

Quorum imagines lambunt, hederae sequaces. Et apud alios frequenter. Poëtis enim facilius est κατ' ἐνδοξασμὸν καὶ μετ' ὀνομασίαν carmina cōdere. Sed quod scopo nostro conuenit, Baccho hederam sacram ob id etiam esse volunt, quòd plantas omnes (veluti Sol autumnalis) quibus adhæret, in senium cogat, alimēta subtra-

hendo: Testatur hoc non solum Plinius, sed extant etiam Laberij carmina, in quibus pulchrè hederam senio comparat dicens:

Vt hedera serpens arborũ vires necat:

Ita vetustas ambitu annorum necat.

HIEMS.

Liberæ larua

R Estat vltima Liberæ deæ larua, extremi temporis symbolũ. Cognoscitur ex Thyrso; nam Romani eam cum Cerere & Libero consecraverunt. Ex Cerere autem natos Liberũ & Liberã affirmat Cicero, & in Verri-
Proserpina. narum sexta Liberam Proserpinã esse dicit, quã terræ vim genitalem esse, qua fruges & herbas producit, ex Mythologorum sententiã docet D. Augustinus. Vnde Proserpinam dictam volũt Latinis à proserpendo, ut
Hecate. & Hecaten Græcis, ob fecunditatẽ, quòd in centuplum plerumque propaget

paget accepta semina; qui numerus frequenter à Græcis pro multitudine incerta solet accipi. Rectè igitur canitur in Orphicis Persephone *καρποῖσι βρύουσα* : & iterum *λειμωνιάσιν χείρουσα ωνοῇσιν*. Eam enim in Ennensium nemore (qui locus, cùm quòd in media insula est, tum quòd perpetuò floreat & fertilissimus sit, Umbilicus Siciliae nuncupatur) à Plutone raptam fingunt poete, quod per hiemem vis illa genitalis ob solis absentiam & circumstantia frigora deficiat, & terræ visceribus abscondatur. Sic inferorū reginam vocant Proserpinā, & Plutonis coniugem fabulantur, cui Deo terrena vis omnis est sacra, Cicerone auctore.

Adferemus & aliam rationem ex Macrobio, huic loco non inconuenientem, quæ Proserpinā vel Liberā *Liberæ symbolum.* hibernū tēpus referre docebit. Astro-

M s nomi

nomi Zodiacum in duo hemisphæria
 secare solēt, superius videlicet, & in-
 ferius. Superius autē ascendentis est
 Solis, lucemq; adaugentis & vitam,
 quod Venerem inhabitare tradunt,
 cuius terminos ponunt ab Arietis si-
 gno ad Libram. Inferius verò quod à
 Libra per vltimos pisces extenditur,
 qua Solis declinantis est via, vt tene-
 brarum & mortis, ita Proserpinę do-
 micilium appellant. Eadem ratione
 Physici terram ipsam partiuntur, su-
 perius eius hemisphæriū, cuius par-
 tem incolimus, Venerem appellātes:
 Inferius verò aliqui Plutona, aliqui
 Proserpinam vocauerunt. Adonim
 igitur Veneris delicias (quem Solem
 esse volunt) Assyrij summa religione
 coluerunt, & sex mensibus esse apud
 Proserpinam dixerunt, id est in infe-
 riori hemisphærio, quod lucem &
 calorem eius minuit, & sex apud Ve-
 nerem

*Veneris domi-
 cilium in Zo-
 diaco.*

*Proserpine
 domicilium.*

*Adonidis
 fabula.*

nerem, cum incipit alterum ascendere cum incremento caloris, & luminis. Sacra verò quæ Adonia ab eius nomine vocabantur, quotannis per omnem Syriam celebrari solent, per flebiles ululatus, & lugubres sonitus mense Iulio, quem D. Hieronymus ideo Adonium appellat, quo ut in venatione ab apro occisum plangebant, ijs ritibus sacris discessum Solis ad inferius hemisphærium prosequentes.

Fingebatur & Venus plangens a-^{Venus plangens.} masij ad Proserpinam abitum, cuius simulachrum visebatur in Libano monte (quod ipsius Adonidis quidam volunt esse) capite obnupto, specie tristi, faciem manu læua intra amictum sustinens, lachrymæ, ut testatur Macrobius, vberes visione conspicientium destillare ex oculis credebantur. Quæ omnia speciem nobis

bis hiemis describunt, quo tempore terra languens & tristis Solis calore destituta est, atque is ipse nubibus obtectus rarum ac breuem sui dat conspectum, aër verò pluuiosus fontium ac fluminū alueos exturgescere cogens, omnia passim lachrymis suis inadefacere videtur.

QUATVOR FERARUM Significationes.

Dicendum nunc erit de quatuor feris, quas larvis intermixtas videmus. Sunt autem ex quadrupedū filuestrium genere pedum, ac corporis naturali pernicitate notissimæ, atque in hoc argumentum selectæ, ut properantis anni fugacitatem exprimerent. Sunt etiam Dianæ ob venerationem sacra, quam Lunam esse auctorum vtriusque linguæ consensu re-

Ferarū pernitas.

Luna.

fu receptum est. Rectè autem Solis annum cōficientis adijciuntur symbolis, quod in generatione propaganda Solis adiutricem esse Lunam Physici tradant. Vitalem enim spiritum & sentiendi vim à Sole: alimentum verò, & augmentationem à Lunari globo sortiri animata, humore denique vnius, & calore alterius inferiorum corporum substantias omnes subsistere volunt.

Hebræorum autem arcana quæ vulgo Cabalistica vocantur, continent siderum atque Idearum cælestium virtutes omnes ad inferiora *Virtutū celestium fluxus.* manantes Lunari globo primū excipi, atque inde tanquam ex Amalthææ quodam cornu per subiecta elementa, vt genitale semen diffundi atque erogari. Itaque Lunam elementorum temperamentis, & inferiorum corporum coaugmentationi &

& dissolutioni non leue momentum adferre constat.

Cornu.

Sed animalium laruis quibusque additorum rationes indagandæ sunt aliquantò diligentius, si prius illud cornu vnicum inter Veris symbola locatum quidnam sibi velit explicauerimus. Quod etiam ad Lunæ significationem referendum videtur, quam Solis in generâdo adiutricem diximus. Eius enim primam *φάσιν* vt Græci vocant, cùm exoritur emergitque à Sole, corniculationem appellant: qua specie cùm visitur *μυνοειδής* dicitur, hoc est falcata, si Martiano Capellæ, & Firmico credimus. Scarabeorum quoque secundum genus quod bicornis est, Lunæ ab Ægyptijs simili ratione consecratur, vt auctor est Orus, quæ *ταυροκέρας* etiam nuncupatur in Orphicis, & Lunę altitudinem Taurum esse tradunt Astrolo-

Luna Ταυροκέρας.

strologi. Item Isis cum cornibus ab *Isis cornuta.*
 Ægyptijs colitur, quæ eadem Luna
 est, vt Diana apud Græcos, cuius nu-
 mini cornua sacrauit antiquitas, non
 radios tantum solares significantia
 (vt supra retulimus) sed etiam sum-
 mam rerum abundantiam & fertili-
 tatem, cum ex humoris ac alimenti
 superfluitate nascantur in corpori-
 bus animantium. Igitur Lunæ aquis,
 & humoribus omnibus dominanti
 τῷ φερικάρῳ (vt Orpheus ait) atque
 Dianæ quam καλοῦς καρπῶς ἀπὸ γαίης
 ἀγειν dicit idem, non ineptè cornua
 dedicarūt. Aequè etiam fluuios pas- *Fluuiorum
cornua.*
 sim ταυροκράνους, cornigeros, vel bicor-
 nes nominant poëtæ, ob vbertatem
 & rerum omnium abundantiam,
 commoditatemque quas vicinis re-
 gionibus subministrant. Qua forma
 Acheloum atque alios fluuios ali-
 quādo pingere solent Romani, apud
 quos

quos etiam fuit vsitatissimū fluuijs cornu omniū fructuū copia & varietate conspicuum adiungere, Veluti etiam Felicitati, Liberalitati, Copiæ, Annonæ, & Fecunditati, quorum omnium symbolis plena sunt veterum numismata, vt & aliorum numinum quę beneficijs suis egestatem & rerum inopiam ab humano genere arcere credebantur. Eò respicere videtur Horatius de Italiæ felicitate ad Iccium scribens,

Aurea fruges

Italiæ pleno diffudit Cópia cornu.

Quid igitur mirum, si Lunæ ac fecunditati proprium cornu, feracissimū veris symbolis adiungatur.

Vt ordinem a nobis propositum feruemus, ex quatuor animalibus occurrit imprimis Veneris laruæ additus Hinnulus, anni noui, Solis crescentis, vel Verni temporis argumen-

*Hinnuli
Symbolum.*

mentum adiuuans. Est enim ceruorū
 fætura à Græcis νεβρός appellata, quasi
 νεως ἰ βορὰν ἐνδεχόμενος, id est, nunc re-
 cens alimentum admittens, vt pul-
 chrè Anacreon insinuat νεβρὸν, νεοθήλεα
 γαλακτινὸν nuncupans, id est nuper vi-
 rescentem & lactantem. Attici, & Io-
 nes indifferèter tam fœminas, quàm
 mares νεβρούς nomināt. Primogenios
 etiam ceruos procas vocari veluti re- Proca.
 pentè, ac nuper natos obseruauit ex
 Græcis auctoribus Cœlius Rhodigi-
 nus, περὶ ἐλάφου γέννημα aiunt Suidas
 & Varinus. Licet Gaza damas velit
 esse procas, & Plinius capreas ita vi-
 deatur appellare. Sanè diuersitas hæc
 nominum & animalium similitudo
 non parū adfert obscuritatis, vt dor-
 cadis, damæ, capreæ, cerui, nomina
 plerumq; confundant auctores, vt-
 que omnes cerui appellatione com-
 prehendere Aristotelem dicat Au-

N gusti-

gustinus Nyphus. Sed parum aut nihil huic nostro argumento illud adfert difficultatis, siue enim nebrum dicamus esse hoc tui Toreumatis symbolum, siue ceruam: semper nascentium cum anno exurgente rerum nobis erit nota. Eiusdem namq; generis sunt animalia, ætate tātum differentia. Cerua etiam huic loco non malè cōueniet, ob Telephi fabulam, quem à cerua nutritum fingunt poëtæ, Solem orientem nobis describentes, *τήλεφος* enim quasi *τηλεφῶς* procul radians lumen est. licet sint qui rationem nominis ad historiam ipsam referant, vt *διὰ τὸ θηλάσαι αὐτὸν ἔλαφον* Telephus sit nominatus. Auges fertur filius, *αὐγή* splendorem significat & aurorā. Cerua quæ eum lactauit, principium motus esse vult, & temporis. *ἔλαφος* enim quasi *ἐλαφρός* agilis, leuis, & velox.

*Telephus à
cerua nutritus.*

Auges.

Sed

Sed nos ad ceruum tranſeamus, *Cerui ſymbolum.*
 qui alto iugo apud Panis larvam
 infidens ſolſtitij æſtiui nobis ima-
 ginem præbet, quando Sol Cancrī
 Tropicum occupans, toto die quieſ-
 cere videtur, viæ reliquum ſibi de-
 cliue reſpiciens. Habet enim hoc ex
 natura ceruus, vt in ipſa pernicioſiſſima
 fuga ſtationem faciat, & requiem in-
 terponat, donec qui ſequitur appro-
 pinquet, tum fugam rurfus arripit.
 Eſſe autem nondum ætatis perfectæ,
 curta, & nō valde ramoſa cornua in-
 dicant, vt iuniori larvæ Panicę aptius
 accommodaretur, quod cur ita factū
 fuerit, ſuperius declarauimus. Ce- *Cemades.*
 madem igitur potius appellabimus,
 quæ proxima adultis ſpecies eſt. No-
 minant & Dorcades τὰ δ' ἐλάφου γεννή- *Dorcades*
 ματα ob acutiem viſus. ὁξυδερεὲς γὰρ τὸ
 ζῶον ἐστὶ καὶ εὐόμματον, inquit Varinus.
 Quapropter non ineptè Soli, quem
 N 2 mundi

*Sol mundi
oculus.*

mundi oculum & luminis fontem nuncupant philosophi, potest attribui. Nocte etiam videre, & oculis apertis dormire Dorcades, auctores asserunt: denique non solum perspicere acerrimè, sed etiam humorem quendam habere intra viscera, qui caliginem depellit oculorù tradunt: vt apud Origenem legimus in vna ex Homelijs quæ extant in Cantica Canticorum. Porrò Solis æstiuo calore rectè ceruum comparasse veteres, ex varijs quas habet huic sideri conuenientes proprietates, animalis naturam indagati facilè patebit. Viuacissimum in primis est, ob idque Soli vitæ principia excitanti sacrum, vt coruus Apollini, qui Sol est exoriens. Mutat annuatim semel cornua, & ijs amissis semet abscondit, quoad altera renasci cœperint, veluti Sol hieme à nobis refugere videtur,

radio-

*Cerui pro-
prietates Soli
conuenientes.*

radiorum vigore destitutus. Seriatim tranant maria, ac flumina porrecto ordine, & capita cornibus pōderosa præcedentiū imponunt clunibus, & primus defatigatus postremum se in locū recipit, requiem capiti quærēs, atq; ita in orbem redeūtes Solis reuolutionē seriatim dies cōnectētis imitari vidētur. Deniq; quod Panicæ libidini vel Solis vigori viuificæ cōuenit, cū coitum appetit ceruus (post Arcturi illud sidus mense Augusto cōtingere scribunt Aristoteles & Plinius) calore exasperatur, & fit ferocior, neq; vna tantū cōtentus est, sed mutat sæpius, & discurrens aliam atq; aliam subito supergreditur, subigitq; nō stando, sed currendo, atq; implet vnus multas breui tēpore. Veluti Sol in cōtinuo motu passim & vbiq; generationē propagat, diuersissimisq; plagis rerū naturæ satisfacit. Hæc ex

Oppiano, Plinio, Solino, atq; etiam Aristotele, qui item simos natura libidinosos esse coniicit, ex ceruorum similitudine, de quibus nunc satis multa diximus.

*Pantheræ
symbolum.*

Panthera Indiæ atque Orienti notissimum animal Bacchi laruæ tertio loco adiunctum est, quod ex mammarū ordine cognoscimus. Auctores enim habemus Aristotelem & Plinium, quatuor mammas medio ventre gerere Pantheram. Difficile alioquin est in picturis vel sculpturis antiquis Leopardos, Lynces, Tigrides & Pantheras cognata & similia ferè animalia ab inuicem discernere, quæ Baccho (in cuius tutela Autumnū esse diximus) ob similes ferè causas sacrarunt veteres. Sed de pardali siue panthera, ne nimis longi simus, quædā solummodo adferemus, quā Baccho dedicatam esse ex varijs auctoribus

*Baccho sacra
Panthera.*

etoribus facile probabimus. Refert
 Philostratus libro secundo de vita
 Apollonij, Pantheram captam fuisse
 in Pamphilia, magnitudine, & aurea
 torque insignem, in qua scriptum
 erat Armenijs litteris, Regem Arfacem
 Armeniæ Nisæo deo sacrasse feram,
 quam ex eo tractu styracis odore il-
 lectam per Caucasii iuga in Pamphi-
 liam penetrasse volunt. Gaudet enim
 mirum in modum aromatibus hoc
 animal. Vidimus Venetijs apud Æ-
 neam Vicum Parmesem, antiquita-
 tis studiosissimum virum, numos Galie-
 ni Imperatoris quamplures, & inter
 eos unum cum Panthera, & hoc titulo:
 LIBERO P. CONS. AVG.
 Recte ait Varinus, Lyæus, à Lyco-
 phrone & alijs, tauro atque pardali
 comparatur, cuius causam referunt
 Plato de legibus, & Athenæus libro
 secundo: nos eam brevitatis causa

omitemus, cùm huic nostro argumento parum seruiat. Baccho imprimis Pantheras sacrarūt veteres, quòd vino delectentur, & inebriatæ facilius capiantur. Hinc *φιλάκρητος* ab Opiano nuncupantur, qui Bacchi nutrices in Pantheras fuisse mutatas, & Penthea dilaniasse scribit libro tertio De venatione. Ob macularum quoque varietatē Bacchus Autumnii præses habet hoc peculiare sibi animal: nam autumnalis temporis incōstantiam naturæ perfidia, & colorum diuersitate refert. Porro moribus variū hominem pardalea vestitum dicunt Græci, atque etiam *παρδαλωτὸν* appellant, teste Varino. Pantherę item hieroglyphico hominem dolosum, & fraudulentum signant Aegyptij, si Oro Apollini credendum est. Itaque per somnium visam Pardalim ab infidis & maleficis periculum portendere

Bacchi nutrices in pantheras mutatas.

dere docent Onirocriti, ob varietatē animalis. Significat etiam morbos, vt Artemidorus auctor est, quorum Autumnus est ferax.

Ex caprarum siluestriū genere est quartum animal hiemali Libere deæ symbolo additū, *αἰγάζιον* Græci vocant, parum aut nihil discrepans ab Ibice. neque enim adeo superstitionem hoc loco differentiā requirimus. Idem est fortè Homero animal *αἰγίξιος* : summos autem vertices alpiū incolit, vbi perpetuæ niues, vbi glacies nūquam soluitur. Natura enim sua frigus requirit Ibex, quòd per calorem cæcutiat, & visum omnino perdat, vt nonnulli scribunt, qui eius animalis naturam diligentius sunt perscrutati. Ceruum cruribus, capite, & corpore exprimit, sed color masculino subfuscus est, caput oneratum vastis cornibus in ceruicem leniter

Capra siluestris symbolū

Ibici natura

reclinantibus, ad quorum magnitudinem respicit Homerus, qui Pandari arcum sedecim palmarum ex feræ capræ cornu fuisse concinnatum fabulatur Iliados lib. quarto: femellæ autem minus fusce masculis sunt, & capris villaticis aliquāto maiores. Ex quarum imagine Capricorni signum traxere Astronomi: quod parti Zodiaci attribuerunt, in qua sol stationem hiemalem facit, dies perbreues, & tenebras longissimas terris distribuens. Tropas Chymærinas appellarunt antiqui solstitium illud, ut vetus Kalendarium rusticum monstrat, *χίμαιρα* enim capra est hieme nata. Hesychius capram feram exponit, & *χίμαρροι* torrētes vel riui, qui ex niuibis liquefactis præcipitantur montibus. Ex hieme autem deducta sunt hæc vocabula Græcis, quibus *χιμῶν* hiems est, eodem Hesychio, & Vari-

*Solstitium
hibernum.*

no auctoribus. Quàm pulchrè igitur hibernæ tempestati caprarum omne genus adsignarunt antiqui, facilè patebit, non oscitanter, sed cum iudicio aucto-^{αἰξ}rum scripta perlegendibus: αἰξ au-^{αἰξ}tem apud Græcos commune vocabulum est caprigeno pecori (liccat poëtæ verbis uti) ut ἔλαφος ceruis, ἵππος equis. Magnos item fluctus caprarū vocabulo αἰγας vocari, ex Homero docet Artemidorus, qui λάβρος ἐπαγίζων dixit, hoc est, fortis caprifans, vel vndosus; αἰγίς, καὶ καταιγίς ventus est, turbo, vel procella: αἰγίζω deniq; capras pascere, & insuper vehementius flare significat. Et idem Artemidorus ait, mare omnium tempestuosissimum, ideo vocari Aegæum, quòd fluctibus & nauigandi periculo sit terribile, cuius etiam Dionysius poëta, & Suidas meminere. Sed iam de caprarum significatione satis multa, si vnū hoc de

*Aegæum
mare.*

Caprarum
siluestriū per
nicitas.

de feris adiecerimus, quo Solis in hiemem euntis præcipitem lapsum imitantur. Stupendæ enim sunt pernicitatis, itaq; venationibus actæ altissima montium petunt, quo etiam si venator euadat, ex præruptissimis scopulis leniter semet præcipitantes cornibus illæ sæ suspiciuntur. Tangit hanc eorum naturam Virgilius Aeneidos quarto:

*Ecce fera saxi deiectæ vertice capra
Decurrere iugis.*

Refert Varro ex Catonis Origini-
bus in Soracti monte Fiscelio capras
feras reperiri solere, quæ saliant è saxo
pedes plus sexagenos, ab his capras
quas pascimus ortas esse.

FVNDI TOREVMATIS

explicatio.

R Eliquū est vt ad vasis *ὕψος* *ἐν τῷ*
vel fundū capax liquoris descē-
damus,

damus, quod vndis marinis (me Her-
 cle) circumluitur aptissimè. Eas secant
 blandi delphines, Bacchi & Veneris
 delitiæ. Continet insuper quatuor a-
 nimalia terrestria in pisces desinentia,
 superiori argumēto haud incongrua.
 Repræsentant enim nobis elementa
 cum quatuor anni partibus, quibus
 quæque dominantur. Sed quia alte-
 rius nobis commentarij sufficientem
 materiam cōmodiore occasione præ-
 bere poterunt, leuiter saltem & quasi
 per transennam hoc loco monstrare
 proposui. Terrestria sunt quidem, sed
 in pisces desinūt: vt terram & aquam
 coniuncta elementa exprimerent, quæ
 generationi sedem præstāt, & anima-
 ta omnia in lucem proferunt. Ex his
 aquam facilius in materiam genita-
 lem transformari, philosophorū quo-
 rundam opinione receptū est, rerum
 principia ex aqua cōstituentium. Nā
 chaos

*Terra & a-
 qua genera-
 tioni sedem
 præstant.*

chaos illud primum ex quo omnia nata fingit Hesiodus fluidum atque aqueum valde fuisse volunt, qui ἀπὸ τοῦ χάσιος illud nomē deriuāt, χυτὸν γὰρ, καὶ πύττον τὸ ὕδωρ, vt inquit ille. Suā opinionem haussisse videtur ex eodem fonte Thales Milesius, qui rerū naturas penitus indagauit, Deū mentem cuncta ex aqua formasse adferens. Virgilius etiam ex Cleantis, & Anaximenis sententia Deum æthera appellans, eum fecundis aquis terrā impregnasse scribit, canens pulcherrimè.

Tum pater omnipotens fecundis imbribus æther,

Coniugis in gremium lætæ descendit, & omneis

Magnus alit magno permixtus corpore fetus.

Venus ex
aqua.

Neq; aberrat Græcorum theologia, quæ Venerē ex aqua progeneratam fingit,

fingit, & aquam illi sacrauit. Nas-
 citur enim ex pluuia hoc piscis genus,
 & apud ignem soluitur rursus in a-
 quâ. Nō igitur mirum, quòd tanto-
 pere aquâ laudauerit Pindarus, cū
 generationis primordia ex ea pro-
 diisse credere videatur, vt etiam qui
 hæc quatuor animalia solis circum-
 uagi, atque anni quadrifidi, tum ele-
 mentorū generationisq; symbola in
 aquis exponere nobis voluit. Quæ
 quid singula sibi velint, quâ breuissi-
 mē potero (vt commentariolo finem
 imponam) percurrere visum est.

*Cur in aquis
 quatuor ani-
 malia visan-
 tur.*

Bos terram & Vernal tempus si-
 gnificat, Telluri enim Cererique &
 Lunæ sacra est, cū ob agriculturā,
 tum quòd fecunditatē naturæ multis
 proprietatibus demonstrat. Quam ob
 causam Verni temporis mediū men-
 sem Tauro designarunt Astronomi,
 sub Veneris almæ quasi productorū
 omniū

Bos.

omnium matris tutela existētem, quā sub bouis effigie à Phrygibus cultam fuisse legimus.

Gryphus.

Gryphus, ignis & æstatis symbolū est, quē Soli vel Apollini sacrarūt. Inter Galieni nūmos Venetijs vidimus etiam cum Grypho, & hoc titulo A P O L L I N I C O N S. AVG. Eius autem currū trahere fingit Claudianus. Ab Indis Soli Gryphos dedicari auctor est Philostratus, quos in Aethiopia, atque Hyperboreis mōtibus reperiri scribit Plinius. Nihilominus fictitium animal esse constat, Romanis in Hieroglyphicis frequēs, & variè depictum, plerumque tamē ex aquila & leone compositum. Sed addunt aures, ob Apollinem, qui à Lacedæmonijs τετράωτος colebatur. Ignita autē prorsus est Leonum, atque Aquilarum natura: huius enim pennæ cæterarū auium plumis commixtæ,

*Leonum &
aquilarum
natura.*

mixtæ, Plutarcho tradente, eas calore suo consumunt; ex illius verò ossibus inter se collisis ignem excitari scribit Aelianus.

De Páthera quæ aërem & autumnum hoc loco notat, superius nōnulla, sed alibi plura dicemus.

Supereſt equus, aquam, & hiemē *Equus* nobis ſignans. Neptuno enim ſacer eſt, qui in equum mutatus cum Cere concubuit, & ſuo tridente ex vndis illud animal primus excitauit, vt habent fabulæ. Extat etiam Galieni nummus inter alios quos Venetijs vidimus cum equo in piſcem deſinente, & his litteris, NEPTVNO CONS. AVG. Coluerunt autē Neptunum equeſtrem Romani, & in eius Dei tutela dicebant eſſe menſem Februarium, quando Sol gelidum & vduſ occupat Aquariū, quem prodigum vrnæ dicit Poëta. Parthi igitur

tur & Thraces equum fluminibus
maſtabant, vt Lacedæmonij ventis,
Lunam quoque, quæ aquis domina-
tur, *φίλιππον* cognominat Orpheus.
Sed horum omnium rationes alibi
cōmodiore occaſione declarabimus
latiùs.

Hæc ſunt Patrone digniſſime,
quæ huc reuerſus, & ſtudioſũ ocium
naſtus, in tui Toreumatis ſymbola
commentatus ſum. In quibus ſi quæ
offendant delicatiora forſan ingenia,
excuſabit me ſpero vix exiguum tem-
poris ſpatium, quod huic operi im-
pendere licuit, cùm me aliò vocarent
occupationes. Grauis inſuper atque
perplexa eſt materia, quæ ſummam
philoſophiæ cognitionem & omni-
genam veterum auctorum lectionẽ
omnino requirit, quam in me (niſi
planè ſim perfrictæ frontis) nullo
modo poſſum agnoſcere. Alio igitur
opus

opus esset Oedipo, imò Morillono quodam, qui hoc argumentum ex plena litterariæ supellectilis suæ synthesi dignè potuisset excolere, nisi eum virum, prò dolor, fata nobis inuidissent. Ego autem tibi satisfaciendi studio *παρέργως* hæc effudi: ex ijs si vel paucula tuo iudicio probari sentiam, non omnino me oleum atque operam perdidisse putabo. Bene vale studioforum Mæcenas optime.

P I N I S.

O 3 AVCTO-

AVCTORVM NOMINA
 QVI IN HOC OPVSCVLO
 CITANTVR.

<i>Aelianus.</i>	<i>Dionysius Afer.</i>
<i>Aeschylus.</i>	<i>Diphilus.</i>
<i>Achilles Bocchius.</i>	<i>Eubulus.</i>
<i>Alcaeus.</i>	<i>Eusebius.</i>
<i>D. Ambrosius.</i>	<i>Fulgentius Placiades.</i>
<i>Anacreon.</i>	<i>Gellius.</i>
<i>Atimachus.</i>	<i>D. Hieronymus.</i>
<i>Antiphanes.</i>	<i>Heliodorus.</i>
<i>Anticleides Atheniēsis.</i>	<i>Herodotus.</i>
<i>Aphthonius.</i>	<i>Hephestion.</i>
<i>Aristoteles.</i>	<i>Hesiodus.</i>
<i>Aristophanes.</i>	<i>Hesychius.</i>
<i>Artemidorus.</i>	<i>Homērus.</i>
<i>Athenaeus.</i>	<i>Horatius.</i>
<i>D. Augustinus.</i>	<i>Ion Chius.</i>
<i>Augustinus Nyphus.</i>	<i>Iulius Pollux.</i>
<i>Ausonius poeta.</i>	<i>Iunius Firmicus.</i>
<i>Celius Rhodiginus.</i>	<i>Laberius.</i>
<i>Cicero.</i>	<i>Lucretius.</i>
<i>Claudianus poeta.</i>	<i>Lycophron.</i>
<i>Clitarchus.</i>	<i>Macrobius.</i>
<i>Diodorus.</i>	<i>Martialis poeta.</i>
<i>Diodorus Siculus.</i>	<i>Martianus Capella.</i>

Mnime-

Mnimerinus.

Mnasitheus.

Nicander Thyatirenus.

Oppianus.

Origenes.

Orpheus.

Orus Apollo.

Ovidius.

Pamphilus.

Pausanias.

Persius.

Philostratus.

Plato.

Plinius.

Plutarchus.

Polemon.

Solinus.

Stesichorus.

Suidas.

Sulpitius Apollinaris.

Theoclytus.

Theocritus.

Theodorus Gaza.


Valerius Probus.

Varinus.

Varro.

Virgilius.

Zenodotus.



SVMMA PRIVILEGIORVM.

CAUTVM est Regio priuilegio, ne quis alius
præter Christophorum Plantinum librū, cui
titulus est, *Themis dea, seu De lege diuina*, imprimat,
vel alibi impressum vendat hinc ad sexennium, sub
pœna confiscationis librorum, vt latiùs patet in
litteris datis Bruxellæ 2. Decembris. M. D. LXVII.

Subsignat.

De Langhe.

Idem cautum est in Consilio Brabantie ad toti-
dem annos, & sub pœnis ijsdem, vt in superiori
Priuilegio: quemadmodum latiùs patet in litteris
datis Bruxellæ 3. Decembris eiusdem anni.


Subsignat. ab eodem

De Langhe.

History of the County of York


The County of York is situated in the north of England, and is bounded by the County of Lincoln to the south, the County of Northampton to the west, and the County of Northumberland to the north. It is a large and fertile county, and is one of the most important in the Kingdom. The River Ouse flows through the county, and is the chief source of its wealth. The county is divided into four parts, viz. the City of York, the West Riding, the East Riding, and the North Riding. The City of York is the capital of the county, and is one of the most ancient and important cities in England. The West Riding is the largest and most fertile part of the county, and is the seat of the County Palatine of York. The East Riding is a fertile and populous part of the county, and is the seat of the County Palatine of Beverley. The North Riding is a fertile and populous part of the county, and is the seat of the County Palatine of Scarborough.













SPECIAL

84-B
9766

THE GETTY CENTER
LIBRARY

